

मत्ती रचति यीशु मसीह का सुसमाचार मत्ती इन द्वारा लखिसद यीशु मसीह अन्द खुशखबरी परचिय

मत्ती इन अनुसार खुशखबरी व्हाशोद नयिम दा नाक कतिबगोळ दा टु ऊंद हुन जो यीशु मसीह अन्द जीवन इन बारा दा हेळतद. अदुर दा टु हर ऊंद कतिब इक “खुशखबरी अनकु आगतद, यदुरद मतलब खुशखबरी.” अवरी मत्ती, मरकुस, लूका अदकि यूहन्ना द्वारा यीशु उन सोत्तुर बाददा लखिसकु आग्याद. याग मत्ती इन अनुसार खुशखबरी लखिसकु आगीत, रा ग्यानी लाँकुरी सही तारीख मालूम हैलेच, लेकीन आग सकतद ईद यीशु मसीह इन जनम इन लगभग ६० साल इन बाददा आगीत. इदुर अलावा, अद जागा येल आद ईद लखिसकु आगीत, मालूम हैलेच, लेकीन हापाळ सा लाँकुर अनुमान हचतार कि ईद फलिस्तीन दा लखिसकु आग्याद अदकि शायद आग सकतद कि यरूशलेम नगर दा भी लखिसकु आग्याद.

लेखक मत्ती हुन, जो यीशु से पयले ऊंद कर ताकोमावाळा ईरोन, आव आंदरी तान चेला बनसोर साटी अंदुन. आंदरी लेवी हेसुर देल भी अरोर. मत्ती हननेळ प्रेरतिगोळ दा टु ऊंद ईरोन अदकि आव यहूदी लाँकुर साटी लखिसीदुन. ईद हाळोद नयिम इन शास्त्रगोळद ६० से यक्कुल संदर्भगोळ देल साफ रूप देल नोळकु आग सकतद. आव ईद तोरसोद इरादा माळदुन कि यीशु मसीह ईरोन, परमेश्वर उन नविळुसूत उद्धारकर्ता, यार बारा दा भवषियवाणी माळकु आगीत. मत्ती भी परमेश्वर उन राज्य अन्द बारा दा हापाळ येनारा लखिस्यान. यहूदीगोळ

इक उम्मीद ईरोद क मसीह ऊंद राजनीतकि राज्य अन्द राजा बनस्यान. मत्ती परमेश्वर उन आध्यात्मकि साम्राज्य अन्द वर्णन माळकु आ वश्वास इक चुनौती कोळोर साटी हापाळ सावधानी बरतुसतान.

मत्ती इन अनुसार खुशखबरी व्हाशोद नयिम इक शूर माळोर साटी ऊंद वळ्लीद कतिब आद, यतकी हाळोद नयिम इन सप्पा संदर्भगोळ्द कारण. ईव येद्व नयिमगोळ इक जोळ्सताव. ग्यानी लांकुर ईद भी सुझाव कोट्टुर क मत्ती मूसा अन्द कतिबगोळ्द रूप इन नकल माळोद कोशशि माळतीदार, जो हाळोद नयिम इन पयला अईद कतिबगोळ हु. पहाळी मा यीशु उन उपदेश ५-७ इन तुलना परमेश्वर उक मूसा अन नयिम कोळोर सांगुळ आग सकतद. व्यवस्थावविरण १९:३-२३:२५.
रूप रेखा

1. मत्ती खुशखबरी इक यीशु मसीह अन्द जनम अदकि आंदुर मंत्रालय इन सुरूवात इन बारा दा हेळकु सुरू माळतान. १-४
2. इदुर बाददा मत्ती यीशु उन बारा दा अदकि आंदुर हापाळ सा उपदेशगोळ्द वर्णन माळ्यान ५-२५
3. मत्ती अन्द आखरी खंड आंदुरद सायोद अदकि पुनरूत्थान दा यीशु मसीह अन्द मंत्रालय इन शखिर इन बारा दा आद २६-२८

यीशु उन लखिसद वंशावली
(लूका ३:२३-३८)

1 अब्राहम उन पार, दाऊद उन पार, यीशु मसीह अन्द वंशावली ई प्रकार देल आद.

2 अब्राहम देल इसहाक पैदा आदुन, इसहाक देल याकूब, याकूब देल यहूदा अदकि आऊन वार्दुर पैदा आदुर. 3 यहूदा अदकि तामार देल फरिसि अदकि जोरह पैदा आदुर, फरिसि देल

हसिस्त्रोन, अदकि हसिस्त्रोन देल एराम पैदा आदुन. 4 एराम देल अम्मीनादाब पैदा आदुन, अम्मीनादाब देल नहशोन, अदकि नहशोन देल सलमोन पैदा आदुन. 5 सलमोन अदकि राहाब देल बोअज पैदा आदुन, बोअज अदकि रूत देल ओबेद, अदकि ओबेद देल यशै पैदा आदुन.

6 *अदकि यशै देल दाऊद राजा पैदा आदुन. अदकि दाऊद देल सुलैमान, आ आर्त इन व्हाट्या टु पैदा आदुन जो पयले उरयियाह अन्द हगिस् ईरोर. 7 सुलैमान देल रहबाम पैदा आदुन, रहबाम देल अबयियाह, अदकि अबयियाह देल आसाफ पैदा आदुन. 8 आसाफ देल यहोशाफात पैदा आदुन, यहोशाफात देल योराम, अदकि योराम देल उज्जियाह पैदा आदुन. 9 उज्जियाह देल योताम पैदा आदुन, योताम देल आहाज, अदकि आहाज देल हजिकयियाह पैदा आदुन. 10 हजिकयियाह देल मनशहहि पैदा आदुन, मनशहहि देल आमोन, अदकि आमोन देल योशयियाह पैदा आदुन. 11 अदकि बाक इस्त्राएल इन लॉकुरी बंदी माळकु बेबीलोन ओया होती योशयियाह देल यकुन्याह, अदकि आऊन वार्टुर पैदा आदुर.

12 बंदी आगकु बेबीलोन पोहचुसदुर बाद्दा यकुन्याह देल शालतएल पैदा आदुन, अदकि शालतएल देल जरूबबाबलि पैदा आदुन. 13 जरूबबाबलि देल अबीहूद पैदा आदुन, अबीहूद देल इल्याकीम, अदकि इल्याकीम देल अजोर पैदा आदुन. 14 अजोर देल सदोक पैदा आदुन, सदोक देल अखीम, अदकि अखीम देल इलीहूद पैदा आदुन, 15 इलीहूद देल इलयियाजार पैदा आदुन, इलयियाजार देल मत्तान, अदकि मत्तान देल याकूब पैदा आदुन. 16 याकूब देल यूसुफ पैदा आदुन, जो मरयिम इनव गांड ईरोन, अदकि मरयिम देल यीशु जो मसीह कहलुस्तान, पैदा आदुन.

17 ईद प्रकार अब्राहम टु हुळकु दाऊद ताका चौदा पीढी आदव, अदकि दाऊद टु बेबीलोन इक बंदी आगकु पोहचुस्कु आगासताका चौदा पीढी, अदकि बंदी आगकु बेबीलोन इक पोहचुस्कु आगा समय टु मसीह ताका चौदा पीढी आदव.

यीशु उन जनम

(लूका १:२६-३८; २:१-७)

18 ✨यीशु मसीह अन्द जनम इत्ता प्रकार देल आत, कि याग आऊन मोय मरयिम इन सगाई यूसुफ उन सांगुळ आगेत, रा आंदुरद मलिन आगेर से पयले अच आक पवतिर आत्मा दी टु व्हाट्या दी ईरोर. 19 इदुरसाटी आकनि गांडूड यूसुफ जो न्यायी मंळसा ईरोन अदकि आकी बदनाम माळोद ईला चाहासोन, आकी चुपचाप बटिट बुळोद वचिर माळदुन. 20 याग आव ईव मातगोळ्द सोच दा का ईरोन रा प्रभु उन स्वर्गदूत आऊक कान्सा दा कांळ्स्कु अनली कुरतुन, “हे यूसुफ! दाऊद उन पार, नी मरयिम उक हगिस् माळली अंजबाळ, यतकी जो आकनि गर्भ दा आद, अद पवतिर आत्मा दी टु आद. 21 ✨आक पार उक हाळदार अदकि नी आऊन हेसुर यीशु ईटेत, यतकी आव तान लाँकुरी आंदुर पापगोळ देल बळिस्यान.”

22 ✨ईद सब इदुरसाटी आत कि जो वचन प्रभु भवषियवक्ता अन्द द्वारा अंददिन, अद पुरा आगुल: 23 “ऊंद कुवारा पोर व्हाट्या दी ईत्तार अदकि ऊंद पार उक हाळदार, अदकि आऊन हेसुर इम्मानुएल ईटकु आदीत,” यदुर्द मतलब आद, “परमेश्वर नाम सांगुळ.”

24 आग यूसुफ जप दा टु यदकु प्रभु अन्द स्वर्गदूत उन आग्या अन्द अनुसार मरयिम उक हगिस् माळकु मान्या तंदुन; 25 ✨अदकि यागासताका आक पार हाळददिल आगासताका

✨ 1:18 १:१८ लूका १:२७ ✨ 1:21 १:२१ लूका १:३१ ✨ 1:22 १:२२ यशायाह ७:१४ ✨ 1:25 १:२५ लूका २:२१

यूसुफ आकनि हात्ती होगीदलि: अदकि आव आ पार उन हेसुर यीशु ईटदुन.

2

पूर्व दशिा नोर पाऊनागोळ्द यीशु से मुलाकात

¹ हेरोदेस राजा अनूद दनिगोळ दा याग यहूदयिा प्रदेश इन बैतलहम ऊरा यीशु उन जनम आत, रा नोळी, पूर्व दशिा टु हापाळ सा जानकार लॉकुर यरूशलेम दा बंदकु केळली कुरतुर, ² “यहूदीगोळव राजा यार्द जनम आग्याद, यल आन? यतकी नाव पूर्व दा आऊन तारा नोळेव, अदकि नाव आऊक प्रणाम माळली बंदेव.”

³ ईद केळकु हेरोदेस राजा अदकि आऊन सांगुळ पुरा यरूशलेम घबरूसेत. ⁴ आग आव यहूदी समाज इन सप्पा प्रधान याजकगोळी अदकि शास्त्रीगोळी जमा माळकु आंदुर से केळदुन, “कॉ मसीह अनूद जनम यल आग पायजे.” ⁵ आंदुर आऊन से अंदुर, “यहूदयिा अनूद बैतलहम दा, यतकी परमेश्वर उन भवषियवक्ता अनूद द्वारा ईद लखिसकु आग्याद: ⁶ हे बैतलहम, नी जो यहूदा अनूद प्रदेश दा आय, नी यातोदारा भी रीतॉ देल यहूदा अनूद अधिकारीगोळ दा सब से स्याणेव हॅलेच; यतकी नीन दा टु ऊंद अधपिती होट्टान, जो नान प्रजा इस्त्राएल इन रखवाली माळयान.’”

⁷ आग हेरोदेस जानकारगोळी चुपचाप कारूकु आंदुर से केळदुन कॉ तारा ठीक याता समय दा कांळसीत, ⁸ इदुरसाटी आव ईद अनकु आंदरी बैतलहम कळुदुन, “होगी, आ पार उन बारा दा बेस-बेस मालूम माळी, अदकि याग आव सकिकेदान रा नानी बातणी कोळी ताकी ना भी बंदकु आऊक प्रणाम माळाईन.”

⁹ आंदुर राजा अनूद मात केळकु होटोदुर, अदकि जो तारा आंदुर पूर्व दी नोळीदुर अदा तारा आंदुर मुंद-मुंद नळोद; अदकि

यल चगिद् ईरोद, आ जागा अन्द म्याकुच पोहचुस्कु रूकसेत. 10 आ तारा अक नोळकु आंदुर हापाळ खुश आदुर. 11 आंदुर आ मान्ना दा पोहचुस्कु आ पार उक आऊन मोय मरयिम इन सांगुळ नोळदुर, अदकि बांगकु आ पार उक प्रणाम माळदुर, अदकि तान-तान झ्वारा खोलसकु आऊक व्हान्ना, लुबान, अदकि गन्धरस इन भेट येर्सदुर.

12 आग परमेश्वर कान्सा दा आंदरी चेतावनी कोटकु ईद अंदुन क्हिरोदेस उन हातूती मातूत होगबाळेतीर, आंदुर दुसरा हादी देल तान द्याश दा होटोदुर.

मसित्तर द्याश इक होगोद

13 आंदुर होगदुर बाद्दा प्रभु उन ऊंद स्वर्गदूत कान्सा दा यूसुफ उक काळसकु अंदुन, “येळ, आ पार उक अदकि आऊन मोय इक हुळकु मसित्तर द्याश इक ओळग; अदकि यागासताका ना नीन से अनालीन, आगासताका अल्या ईरेत; यतकी हेरोदेस ई पार उक दुंदसेत्यान क्हि आऊक कोन्सुस बुळुल.”

14 आग आव ईळलकी इच यदकु पार अदकि आऊन मोय इक हुळकु मसित्तर द्याश इक ओळदुन, 15 *अदकि हेरोदेस उन सायासताका अल्या ईतूतुन. इदुरसाटी क्हि अद वचन जो प्रभु भवष्यवक्ता अन्द द्वारा अंददिन अद पुरा आगुल: “ना तान पार उक मसित्तर द्याश टु कार्सदनि.”

चकिोरी कोन्नोद

16 याग हेरोदेस ईद नोळदुन, क्हितारागोळ्द बारा दा जानकारी ताकोमावाळेर जानकार लॉकुर आऊन सांगुळ ध्वाका माळदुर, आग आव सट्टि देल बेक्की घाई आगेदुन, अदकि लॉकुरी कळुकु जानकार लॉकुर द्वारा तारा नोळोद समय इन अनुसार बैतलहम अदकि अदुर आसपास इन जागा अन्द सप्पा चकिोरी जो येदुद वर्ष इनोर या आंदुर से स्याणेर ईरोर, कोन्सुस बुटुन. 17 आग अद

* 2:15 २:१५ होशे ११:१

वचन जो यरिमयाह भवषियवक्ता अनूद द्वारा अंदकु आगीत, अद पुरा आतः 18 “रामाह ऊर दा दुख भरा ऊंद आवाज केळ बत्त, वोरलोद अदकि हापाळ गयरा वलिाप इन ईरोद; राहेल तान चकिोर साटी वोरलोर, अदकि शांत आगोद ईला चाहासोर, यतकी ईग आ चकिोर सोतोगीदुर.”✧

मसित्त्र द्याश टु वापस बरोद

19 हेरोदेस उन सोत्तुर बाददा, प्रभु उन स्वर्गदूत मसित्त्र दा यूसुफ उक कान्सा दा कांळसकु अंदुन. 20 “येळ, पार उक अदकि आऊन मोय इक हुळकु इस्त्राएल इन द्याश दा होटोग, यतकी जो पार उन जीव ताकोमोद चाहासोर, आंदुर सोतोग्यार.”

21 यूसुफ येदुन, अदकि पार उक अदकि आऊन मोय इक सांगुळ हुळकु इस्त्राएल इन द्याश दा बंदुन. 22 लेकीन ईद केळकु का अरखलिाउस तान आप्प हेरोदेस उन जागा दा यहूदिया मा राज्य माळेत्थान, अल होगोर से अंजदुन. बाक कान्सा दा परमेश्वर उन दी टु बातणी ताकोमकु गलील प्रदेश दा होटोदुन. 23 ✧आव अल नासरत हेसुर इन नगर दा होगकु कुरतुन, ताकी अद वचन पुरा आगुल, जो भवषियवक्तागोळ द्वारा अंदकु आगीतः “आव नासरी कहलुस्यान.”✧

3

बपतस्मा कोळावाळा यूहन्ना अनूद उपदेश

(मरकुस १:१-८; लूका ३:१-१८; यूहन्ना १:१९-२८)

1 आ दनिगोळ दा बपतस्मा कोळावाळा यूहन्ना बंदकु यहूदिया अनूद आळी दा ईद प्रचार माळली कुरतुनः 2 ✧“पापगोळ देल मन तरिगुसी, यतकी स्वर्ग इन राज्य

✧ 2:18 २:१८ यरिमयाह ३१:१५ ✧ 2:23 २:२३ मरकुस १:२४; लूका २:३९; यूहन्ना १:४५ ✧ 2:23 २:२३ लूका ८:१७ ✧ 3:2 ३:२ मन्ती ४:१७; मरकुस १:१५

हात्ती होट बंदाद.” 3 इव आवा हुन यार्द मातकात यशायाह भवषियवकता अन्द द्वारा माळकु आग्याद:

“आळी दा ऊंद कारावाळा अन्द आवाज केळ बरेत्याद,
कि प्रभु उन हादी तयार माळी,

आऊन सळकगोळी सरका माळी.”*

4 *ईव यूहन्ना ऊंट इन चुट्टीगोळ्द फळक्या हाक्कु अदकि नेळु मा तोगुल इन पट्टा कटकु ईरतोगोन. फाफा* अदकि आळी दाकळोद शयद तनितोगोन. 5 आग यरूशलेम अदकि पुरा यहूदिया प्रदेश, अदकि यरदन गांगा अन्द आस-पास इन सप्पा कषेत्तर अन ईरावाळेर लाँकुर आऊंद हात्ती बंदकु जमा आदुर. 6 आंदुर तान-तान पापगोळी मान्सकु यरदन गांगा दा आऊन से बपतस्मा ताकोंडुर.

7 *याग आव हापाळ सा फरीसी अदकि सदूकीगोळी बपतस्मा ताकोमोर साटी तान हात्ती बरत नोळदुन, रा यूहन्ना अंदुन, “हे हाव इन चकिोरा, याव नीमी चतरा माळ बुटुन कि परमेश्वर उन बरावाळा प्रकोप देल ओळी? 8 इदुरसाटी हगि मातगोळ माळी जो नीम पश्चाताप इक तोरसतद, 9 *अदकि तान-तान मन दा ईद वचारि माळवाळी किनाम आप्प अब्राहम हुन; यतकी ना नीम से अनतीन कि परमेश्वर ई कल्लगोळ देल भी अब्राहम उन साटी औलाद पैदा माळ सकतान. 10 *ईग कोळ्ली मार्रगोळ्द जळी मा ईटकु आद, इदुरसाटी जो-जो मार्र वळ्लीद काय तराल, अदरी कळकु अदकि बेक्की दा हाक्कु आदीत. 11 ना रा नीर देल नीमी मन तरिगुसोद बपतस्मा कोळतीन, लेकीन जो नान बाददा बरावाळा आन, आव नान से ताकतवर आन; ना रा आऊन केरू तेगा लायक भी हैलेच. आव नीमी पवतिर आत्मा अदकि बेक्की देल बपतस्मा कोट्टान.

* 3:3 ३:३ यशायाह ४०:३ * 3:4 ३:४ २ राजा १:८ * 3:4 ३:४ फाफा-मतलब टडिडियाँ * 3:7 ३:७ मत्ती १२:३४; २३:३३ * 3:9 ३:९ यूहन्ना ८:३३ * 3:10 ३:१० मत्ती ७:१९

12 आऊन मार्र आऊन कय दा आद, अदकि आव तान केई वळ्लीद तरीका देल साफ माळ्यान, अदकि तान गोदीगोळी रा द्वाला दा जमा माळ्यान, लेकीन भूसा अनन्द गवान्डा अक आ बेक्की दा होताक्यान जो यागलु नुनाल्द.”

यीशु उन बपतस्मा

(मरकुस १:९-११; लूका ३:२१,२२; यूहन्ना १:३१-३४)

13 आ समय यीशु गलील टु यरदन गांगा अनन्द कनिरा मा बपतस्मा कोळावाळा यूहन्ना अनन्द हात्ती आऊन से बपतस्मा ताकोमली बंदुन. 14 लेकीन यूहन्ना ईद अनकु आऊक रोक्सली कुरतुन, “नानी रा नीद कय देल बपतस्मा ताकोमोद जरवत आद, अदकि नी नान हात्ती बंद्या?” 15 यीशु आऊक ईद उत्तर कोट्टुन, “ईग रा हगि अच आगगोळ, यतकी नामी ईदा रीति देल सप्पा न्यायीपन इन क्याल्सागोळी पुरा माळोद उचति आद.” आग यूहन्ना आऊन मात मान्स कौडुन.

16 अदकि यीशु बपतस्मा ताकोमकु तुरन्त नीर दा टु म्याकुच बंदुन, अदकि अदा समय आऊन साटी स्वर्ग खुलसेत, अदकि आव परमेश्वर उन आत्मा अक कबूतर इन घाई ईळुतेला अदकि तान म्याकुच बरतेला नोळदुन. 17 *अदकि स्वर्ग टु ईद आकाशवाणी आत “ईव नान प्रयि पार हुन, ईऊन से ना हापाळ खुश आईन.”

4

यीशु उन परीक्षा

(मरकुस १:१२-१३; लूका ४:१-१३)

1 *आग पवतिर आत्मा यीशु उक सुनसान जागा दा ओईत ताकी शैतान उन द्वारा आऊन परीक्षा आगुल. 2 आव चालीस दिन, अदकि चालीस ईळ्लक, उपास माळ कौडुन, आग आऊक

* 3:17 ३:१७ मत्ती १२:१८; १७:२; मरकुस १:११; लूका ९:३५

इब्रानगिोळ २:१८; ४:१५

* 4:1 ४:१

हशु हत्त. 3 आग परखुसावाळा शैतान हात्ती बंदकु आऊन से अंदुन, “अगर नी परमेश्वर उन पार हुय, रा अंदकोम, काई कल्ल रोट्टगोळ बंसेगुल.”

4 यीशु उत्तर कोट्टुन: “शास्त्र दा लखिसकु आद, ‘मळसा सर्फि रोट्टी देल अच जत्तिता ईरतीदील, लेकीन हर ऊंद वचन देल जो परमेश्वर उन बाय देल होळतद.’”

5 आग शैतान यीशु उक यरूशलेम इन पवतिर नगर दा ओईत अदकि मंदरि इन स्यांडा मा नीदरूस्त, 6 अदकि आऊन से अंत, “अगर नी परमेश्वर उन पार हुय, रा तान तान इक ल्यालमा केळ्दबुळ; यतकी शास्त्र दा लखिसकु आद: ‘आव नीन बारा दा तान स्वर्गदूतगोळी आग्या कोट्टान, अदकि आंदुर नीनी कयगोळ दा नेगु कोंडार; ईलारा हगि आगबाळुल का नीन कालगोळी कल्ल देल ठेस हत्तुल.’”

7 यीशु आऊन से अंदुन, शास्त्र दा ईद भी लखिसकु आद: “नी प्रभु तान परमेश्वर उन परीक्षा माळबाळ.”

8 बाक शैतान यीशु उक ऊंद हापाळ ऊंचा पहाळी मा ओईत अदकि पुरा दुनया अनूद राज्य अदकि अदुर्द वैभव तोरसकु, 9 आग शैतान यीशु से अंत, “अगर नी बांगकु नानी प्रणाम माळ्या, रा ना ईद सब कुछ नीनी कोट बुळाईन.”

10 आग यीशु आ शैतान उक उत्तर कोट्टुन, “हे शैतान दुर आगेग, यतकी शास्त्र दा लखिसकु आद: नी तान प्रभु परमेश्वर उन भक्ती माळ, अदकि सर्फि आऊंदा उपासना माळ.”

11 अदकि नोळी शैतान आऊन हात्ती टु होटोत, अदकि स्वर्गदूत बंदकु आऊन स्यावा माळली कुरतुर.

✧ 4:6 ४:६ भजन संहिता ११:११-१२

✧ 4:7 ४:७ व्यवस्थाविरण ६:१६

✧ 4:10 ४:१० व्यवस्थाविरण ६:१३

यीशु उन स्यावा-कार्य अनन्द सुरूवात
(मरकुस १:१४,१५; लूका ४:१४; १५)

12 ✨याग यीशु ईद केळदुन कबिपतस्मिमा कोळावाळा यूहन्ना बंदी माळकु आगेग्यान, रा आव गलील इक होटोदुन. 13 ✨अदकि आव नासरत इक बटिकु कफरनहूम नगर दा बंदुन, जो झील इन कनिरा जबूलून अदकि नप्ताली इन द्याश दा आद, होगकु ईरली कुरतुन; 14 ताकी जो यशायाह भवषियवक्ता अनन्द द्वारा अंदकु आगीत, अद पुरा आगुल:

15 “जबूलून अदकि नप्ताली इन द्याश,
झील इन हादी देल यरदन इन आप्पाटी,
गैरयहूदीगोळ द्याश गलील दा!

16 जो लाँकुर अंधार जदिगी माळोर,
आंदुर ऊंद धोळ्द महान ज्योतनिोळदुर;
अदकि जो मृत्यु उन द्याश अदकि सावली दा कुर्तकु ईरोर,
आंदुर मा ज्योतचिमकुस्त.”

17 ✨आ समय टु यीशु प्रचार माळोद अदकि ईद अनोद सुरूवात माळदुन, “तान पापगोळ देल मन तरिगुसी यतकी स्वर्ग इन राज्य हातती होट बंदाद.”

नाक मेन हुडावाळेरी कारोद
(मरकुस १:१६-२०; लूका ५:१-११; यूहन्ना १:३५-४२)

18 गलील इन झील इन कनिरा वयाळतेला यीशु येढ्द वारट्टुरी मतलब शमौन उक जो पतरस कहलुस्तान, अदकि आऊन वार्ट अन्रियास उक झील दा जार हाक्त नोळदुन; यतकी आंदुर मेन हुडावाळेरे ईरोर. 19 यीशु आंदुर से अंदुन, “नान हदि बरी, रा ना नीमी मंळसागोळी ह्यांग परमेश्वर उन राज्य दा तरतार

✨ 4:12 ४:१२ मत्ती १४:३; मरकुस ६:१७; लूका ३:१९,२० ✨ 4:13 ४:१३ यूहन्ना २:१२ ✨ 4:17 ४:१७ मत्ती ३:२

अद कलसाईन.” 20 आंदुर तुरन्त जारगोळी बटिकु आऊन हदि होटोदुर.

21 अल टु मुंद वाळुसकु, यीशु मात्त येढ्ढ वार्टुरी मतलब जब्दी इन पार याकूब अदकि आऊन वार्ट यूहन्ना अक नोळदुन. आंदुर तान आप्प जब्दी इन सांगुळ इवांगा मा तान जारगोळी सुधारसोर. आव आंदरी भी कारदुन. 22 आंदुर तुरन्त इवांगा अदकि तान आप्प उक बटिकु आऊन हदि होटोदुर.

यीशु उन सखि, उपदेश अदकि चंगाई

(लूका ६:१७-१९)

23 ✨यीशु पुरा गलील दा वयाळतेला आंदुरद सभागूहगोळ दा उपदेश कोळोन, अदकि राज्य अन्द खुशखबरी प्रचार माळोन, अदकि लॉकुरद हर प्रकार इन बमिरगोळी चंगा माळदुन अदकि कमजोरी इक दुर माळतेला ईत्तुन. 24 अदकि पुरा सीरिया द्याश दा आऊन यश फैलुसेत; अदकि लॉकुर सब बमिरगोळी जो नाना प्रकार इन बमिरगोळ अदकि दुखगोळ दा जकळुसकु ईरोर, अदकि यारदा दुष्टआत्मागोळ ईरव, अदकि मरिगीवाळेर अदकि लकवा नोर रोगीगोळी, आऊन हात्ती तंदुर अदकि आव आंदरी चंगा माळदुन. 25 गलील अदकि दकिापुलसि*, यरूशलेम, यहूदीया अदकि यरदन गांगा अन्द आप्पाटी टु भीळ इन भीळ आऊन हदि आगेत.

5

यीशु उन पहाळी उपदेश

1 यीशु भीळ इक नोळकु पहाळी मा येरेदुन, अदकि याग कुरतोदुन रा आऊन चेलागोळ आऊन हात्ती बंदुर. 2 अदकि आव आंदरी ईद उपदेश कोळली कुरतुन:

✨ 4:23 ४:२३ मत्ती ९:३५; मरकुस १:३९ * 4:25 ४:२५ दकिापुलसि इन मतलब हत्त नगरगोळ्द शयर

धन्य वचन

(लूका ६:२०-२३)

- 3 धन्य आर आंदुर, जो मन देल गरीब आर,
यतकी स्वर्ग इन राज्य आंदुर दा आद.
- 4 “धन्य आर आंदुर, जो शोक माळतार,
यतकी आंदरी दलिासा सक्कीत.
- 5 धन्य आर आंदुर, जो नम्र आर,
यतकी आंदुर धरती इन वारीसदार आदार.”
- 6 “धन्य आर आंदुर, जो न्यायीपन इन हस्तकु अदकि नरिळ्ककु
आर,
यतकी आंदुर संतुष्ट माळकु आदार.”
- 7 “धन्य आर आंदुर, जो दयालु आर,
यतकी आंदुर मा दया माळकु आदीत.”
- 8 धन्य आर आंदुर, यार्द मन शुद्ध आव,
यतकी आंदुर परमेश्वर उक नोळ्यार.
- 9 धन्य आर आंदुर, जो मेल माळावाळेर आर,
यतकी आंदुर परमेश्वर उन चकिर कहलुस्यार.
- 10 *धन्य आर आंदुर, जो न्यायीपन इन कारण सतुस्कु आगतार,
यतकी स्वर्ग इन राज्य आंदुरद अच हुन.
- 11 *धन्य आईर नीव, याग मंळसा नान कारण नीमद अपमान
माळ्यान, अदकि सतुस्यान अदकि ख्वाटा माताळ माताळकु
नीमद वरिध दा सब प्रकार इन बुरा मात अंदान. 12 *आग
खुश अदकि मगन ईरेतीर, यतकी नीम साटी स्वर्ग दा धोळ्द
प्रतफिल आद. यतकी आंदुर आ भवषियवक्तागोळी भी जो
नीम से पयले ईरोर ईदा रीत दिल सतुसीदुर.

ऊप्प अदकि ज्योर्त

(मरकुस ९:५०; लूका १४:३४,३५)

13 ✨“नीव पृथ्वी इन ऊप्प हुईर, लेकीन अगर ऊप्प इन स्वाद बगिळुसेदति, रा अद बाक याता चजि देल नमकीन माळकु आदीत? बाक अद यातोदु क्याल्सा अनन्द हैलेच, सर्फि इदुरद किव्हार्या भटिकु आगुल अदकि मंळसागोळ्द काल देल मेटकु आगुल.”

14 ✨नीव दुनयिा अनन्द ज्योति हुईर. जो नगर पहाळी मा बसुस्कु आद अद होचकु ईरसकाल. 15 ✨अदकि लॉकुर दगिया होत्ताकु बरतन इन ल्यालमा ईटालुर लेकीन दीवट* मा ईटतार, आग अदुर देल मान्ना अनन्द सप्पा लॉकुरी ऊजुळ सकितद. 16 ✨अदा प्रकार नीम ऊजुळ मंळसागोळ्द मुंद चमकुसुल की आंदुर नीम वळ्लीद क्याल्सागोळी नोळकु नीम आप्प उन, जो स्वर्ग दा आन, बळाई माळुल.

व्यवस्था अनन्द बारा दा शकिषा

17 “ईद समसबाळी, कनि ना व्यवस्था या भवषियवक्तागोळ कतिबगोळी नाश माळली बंदीन, नाश माळली ईला, लेकीन पुरा माळली बंदीन. 18 ✨यतकी ना नीम से खरा माताळतीन, कियिगासताका आकाश अदकि पृथ्वी टलुसेगाल, आगासताका व्यवस्था ऊंद ऊंद मात भी बनिा पुरा आगद टलुसतीदलि.” 19 इदुरसाटी जो यावारा इव स्यांळ्द से स्यांळ्द आग्यागोळ दा टु यातोदारा ऊंद आग्या अक मूरुल, अदकि हांग अच लॉकुरी कलसुल, आव स्वर्ग इन राज्य दा सप्पा मुंदुर से स्याणैव कहलुस्यान; लेकीन जो यावारा आ आग्यागोळ्द पालन माळ्यान अदकि अवरी कलस्यान, आवा स्वर्ग इन राज्य दा महान कहलुस्यान. 20 यतकी ना नीम से अनतीन,

✨ 5:13 ५:१३ मरकुस ९:५०; लुका १४:३४,३५ ✨ 5:14 ५:१४ यूहनना ८:१२; ९:५ ✨ 5:15 ५:१५ मरकुस ४:२१; लुका ८:१६; ११:३३ * 5:15 ५:१५ दीवट: मतलब-दगिया ईटोद जागा ✨ 5:16 ५:१६ १ पतरस २:१२ ✨ 5:18 ५:१८ लुका १६:१७ † 5:18 ५:१८ सप्पा चजिगोळ अंत; या इदुरव सप्पा उपदेश खरा आव.

यावारा यातारा आर्त इक बुरा नजर देल नोळतान आव तान मन दा आकनि से व्यभचारि माळ कोंडुन. ²⁹ ✨अगर नीन ऊम्मा कण्ण नीनी ठोकर तनिसुल, रा अदरी तेगुकु भीट बुळ; यतकी नीन साटी ईदा वळ्लीद आद कि नीन शरीर दा टु ऊंद अंग नाश आगोगुल अदकि नीन पुरा शरीर नरक दा हाक्कु आगबाळुल. ³⁰ ✨अगर नीन ऊमा कय नीनी ठोकर तनिसतद, रा अदरी कळकु भीट बुळ; यतकी नीन साटी ईदा वळ्लीद आद कि नीन मय दा टु ऊंद नाश आगुल अदकि नीन पुरा शरीर नरक दा हाक्कु आगबाळुल.”

छोळचट्टी अन्द बारा दा शकिषा

(मत्ती १९:९; मरकुस १०:११; लूका १६:१८)

³¹ ✨✨“ईद भी अंदकु आगीत, ‘जो यावारा तान हगिस उक बळोद चाहास्यान, रा आकी छोळचट्टी कोळुल.’ ³² ✨लेकीन ना नीम से ईद अनतीन की जो यावारा तान हगिस उक व्यभचारि इन शवाय अदकि दुसरा कारण देल बट्टि बुळतान, रा आव आकनि से व्यभचारि माळसुसतान; अदकि जो यावारा आ आर्त इन से जो गांडु उक बट्टिकु आर मदा माळतान, रा आव भी व्यभचारि माळतान.”

करिया अन्द बारा दा शकिषा

³³ “बाक नीव केळ कोंडीर कि पूर्वकाल इन लॉकर से अंदकु आगीत, ‘ख्वाटा करिया तनिबाळेतीर, लेकीन प्रभु उन साटी तान करिया अक पुरा माळेतीर.’ ³⁴ ✨लेकीन ना नीम से ईद अनतीन कि यागलु करिया तनिबाळेतीर; ना रा स्वर्ग इन, यतकी अद परमेश्वर उन सहासन हुन; ³⁵ ना धरती अन्द, यतकी अद

✨ 5:29 ५:२९ मत्ती १८:९; मरकुस ९:४७ ✨ 5:30 ५:३० मत्ती १८:८; मरकुस ९:४३ ✨ 5:31 ५:३१ मत्ती १९:७; मरकुस १०:४ ✨ 5:31 ५:३१ व्यवस्थाविवरण २४:१-१४ ✨ 5:32 ५:३२ मत्ती १९:९; मरकुस १०:११,१२; लूका १६:१८; १ कुरनिथि ७:१०,११ ✨ 5:34 ५:३४ याकूब ५:१२; मत्ती २३:२२

आऊन कालगोळ्द पायदान हुन; ना यरूशलेम इन, यतकी अद महान राजा अन्द नगर हुन. ³⁶ तान ताल्ला अन्द भी करिया तनिबाळेतीर यतकी नीव ऊंद चुट्टी इक भी ना बळ्ळीद, ना करीद माळ सकतीर. ³⁷ लेकीन नीम्द मात 'हव' इन 'हव,' या 'ईला' अन्द 'ईला' आगुल; यतकी जो येनारा इदुर से यक्कुल आगतद अद बुराई देल आगतद.”

बदला ताकोमोद बारा दा शकिषा
(लूका ६:२९,३०)

³⁸ “नीव केळ कोंडीर का अंदकु आगीत, ‘कण्ण इन बदला कण्ण, अदकि हल्ल इन बदला हल्ल.’ ³⁹ लेकीन ना नीम से ईद अनतीन का जो नीम से बुरा व्यवहार माळतान आऊन सामना माळबाळेतीर; लेकीन जो यावारा नीम्द ऊममा गाल्ला मा क्याबरा बळदान, रा आऊन दी दुसरा गाल्ला भी तरिगुस बुळी. ⁴⁰ अगर यावारा नीम मा जबरदस्ती माळकु नीम्द कुळता बेळोद चाहास्यान, रा आऊक कोट भी कोट्ट बुळी. ⁴¹ जो यावारा नीमी कोस तमि जागा दा वोतान, रा आऊन सांगुळ येढ्ढ कोस होटोग. ⁴² जो यावारा नीम से बेळ्यान, आऊक कोळी; अदकि जो नीम से उदार बेळोद चाहासतान, आऊन से बाय तरिगुसबाळी.”

दुश्मनगोळ से प्यार
(लूका ६:२७,२८,३२-३६)

⁴³ “नीव केळ कोंडीर का अंदकु आगीत, ‘तान मान्ना हातळोर से प्यार ईटेतीर, अदकि दुश्मनगोळ से दुश्मनी.’ ⁴⁴ लेकीन ना नीम से ईद अनतीन का तान दुश्मनगोळ से प्यार ईटी अदकि जो नीमी सतुसतार आंदुर साटी प्रार्थना माळी, ⁴⁵ यदुर देल नीव तान स्वरुगीय आप्प उन औलाद ठहूसीर यतकी आव तान सुर्य वळ्ळीद अदकि बुरा येढ्ढु मा उदय माळतान, न्यायी अदकि अन्यायी येढ्ढु मा नीर बरसुस्तान. ⁴⁶ यतकी अगर नीव तान प्यार इट्टावाळेर से अच प्यार ईट्टीर, रा नीम साटी येन फल

आदीत? येन कर ताकोमावाळेर भी हगिा माळालुर?” 47 “अगर नीव सरिफ तान वारटुर्द अच भलाई माळीर, रा यातोद धोळ्द क्याल्सा माळतीर? येन गैर्यहूदी लॉकुर भी हगिा माळालुर? 48 इदुरसाटी नीव सदिध आगी, ह्यांग नीमव स्वरगीय आप्प सदिध आन.”

6

गुप्त दान इन शकिषा

1 ✨“सावधान ईरी! नीव मंळसागोळी तोरसोर साटी तान न्याय इन क्याल्सा माळबाळेतीर, ईलारा नीव तान स्वरगीय आप्प उन से येनु उच प्रतफिल ताकोम सकतीदलि.”

2 “इदुरसाटी याग नीव दान माळी, रा तान मुंद सैनाई मुरसुसबाळी, ह्यांग कपटी लॉकुर, सभागोळ अदकि गलीगोळ दा माळतार, ताकी लॉकुर आंदुर बळाई माळुल. ना नीम से खरा माताळतीन कि आंदुर तान प्रतफिल ताकोम कोंडार. 3 लेकीन याग नीव दान माळी, रा जो नीम ऊम्मा कय माळतद, अद नीव तान डाक्या कय इक मालूम नळुगोळ बाळेतीर. 4 किनीम दान होचकु ईरूल, अदकि आग नीम आप्प जो होचकु नोळतान, नीमी प्रतफिल कोट्टान.”

प्रार्थना अनूद शकिषा

(लूका ११:२-४)

5 ✨“याग नीव प्रार्थना माळीर, रा कपटीगोळ घाई आगबाळी, यतकी लॉकुरी तोरसोर साटी सभागृह दा अदकि सळक इन मोळ मा नदिरकु प्रार्थना माळोद आंदरी वळ्लीद हततद. ना नीम से खरा माताळतीन कि आंदुर तान प्रतफिल ताकोम कोंडार. 6 लेकीन याग नीव प्रार्थना माळी, रा तान कमरा दा होगी; अदकि कवाळ बंद माळकु तान आप्प उन से

गुप्त दा प्रार्थना माळीर. आग नीम आप्प जो होचकु नोळतान नीमी प्रतफिल कोट्टान.”

7 प्रार्थना माळाहोती गैरयहूदीगोळ घाई घळी-घळी माताळ बाळेतोर, यतकी आंदुर सोचतार की आंदुरद हापाळ माताळदुर देल आंदुरद केळकु आदीत. 8 इदुरसाटी नीव आंदुरद घाई आगबाळी, यतकी नीम आप्प नीम बेळा से पयला अच जानसतान की नीम येन येन जरवतगोळ आव. 9 इदुरसाटी नीव ईत्ता रीतदेल प्रार्थना माळतोगी:

“हे नाम आप्प, नी जो स्वर्ग दा आय;
नीन हेसुर पवतिर मान्सकु आगुल.

10 दुनयिया दा नीन राज्य बरूल.

नीन इच्छा हयांग स्वर्ग दा पुरा आगताव, हांग अच पृथ्वी मा भी आगुल.

11 * नाम हागुल तर्मुद रोट्टी ईद नामी कोळ.

12 अदकि यात्ता प्रकार देल नाव तान अपराधीगोळ माफ माळवे,

हांग अच नी भी नाम पापगोळी माफ माळ.

13 † अदकि नामी परीक्षा दा तरबाळ,

लेकीन बुराई देल ऊळ्स.”

14 * “इदुरसाटी अगर नीव मंळसागोळ्द अपराध माफ माळीर, रा नीम स्वर्गीय आप्प भी नीमी माफ माळयान. 15 अदकि अगर नीव मंळसागोळ्द अपराध माफ माळतीदील, रा नीम स्वर्गीय आप्प भी नीमव अपराध माफ माळतीदील.”

उपास इन शक्तिषा

* 6:11 ६:११ तानीक जरवत आद; या ईद इन साटी, या नाळ इन साटी. † 6:13 ६:१३ येनारा वचनगोळ दा कारण राज्य, सामर्थ्य अदकि गौरव सदा अन साटी नीमव आव. आमीन. ☆ 6:14 ६:१४ मरकुस ११:२५,२६

16 “याग नीव उपास माळीर, रा कपटीगोळ घाई नीम मार्रा मा उदासी ईरबाळुल, यतकी आंदुर तान मार्रा हांग अच माळकु ईटतार, यतकी लॉकुर आंदरी उपासी समसुल. ना नीम से खरा माताळतीन कि आंदुर तान प्रतफिल ताकोम कोंडार. 17 लेकीन याग नीव उपास माळीर रा तान तालला मा याण्णा ऊदी अदकि मार्रा तोळी, 18 ताकी लॉकुर ईला लेकीन नीन आप्प जो गुप्त आन, नीनी उपासी जान्सुल ई दशा दा नीन आप्प जो गुप्त कर्मगोळी नोळकु, नीनी अऊर्द प्रतफिल कोट्टान.”

स्वर्गीय धन

(लूका १२:३३,३४)

19 ✨“तान साटी पृथ्वी मा धन जमा माळबाळेतीर, यल कळिा अदकि जंग नाश माळताव, अदकि यल काळ्लुर तजिोरी वडुतार अदकि काळ्लपनी माळतार. 20 लेकीन तान साटी स्वर्ग दा धन जमा माळी, यल न रा कळिा, अदकि जंग नाश माळीत, अदकि यल काळ्लुर ना तजिोरी वळदार अदकि ना चोरी माळ्यार. 21 यतकी यल नीम धन आद अल नीम मन भी हतकु ईत्तीत.”

मय इन ज्योति

(लूका ११:३४-३६)

22 “नीन मय इन दगिया कण्ण हुन: इदुरसाटी अगर नीन कण्ण नरिमल आव रा नीन सप्पा मय भी ऊजुळ इन घाई आदीत. 23 लेकीन अगर नीन कण्ण बुरा ईरूल, रा नीन पुरा मय भी अंधकारमय आदीत; ईद कारण अद ऊजुळ जो नीन दा आद अगर अंधकारमय आद रा अद अंधार याट खोल आदीत!”

परमेश्वर अदकि धन

(लूका १६:१३; १२:२२-३१)

24 “यावारा मंळसा येढ्ढ स्वामीगोळ्द स्यावा माळ सकालुन, यतकी आव ऊंद मंळसा से दुश्मनी अदकि दुसरा मंळसा से प्यार

ईट्यान, या ऊंद से मेल मलिाप माळ्यान अदकि दुसरा मळसा अक नीच जानस्यान. नीव परमेश्वर अदकि धन येदुहु स्यावा सांगुळल्या माळ सकालीर.”

25 “इदुरसाटी ना नीम से अनतीन कितान जीवा अन्द साटी ईद चिन्ता माळबाळी कितान येन तनिदेव अदकि येन कुळदेव; अदकि तान मय इन साटी फळक्यागोळ्द चिन्ता माळबाळी. येन जीव भोजन देल, अदकि मय फळक्यागोळ देल अनमोल हैलेच? 26 आकाश ईनव पक्षीगोळी नोळी! अव ना बीजा हचताव, ना कोयताव, अदकि ना तान तनि जागा दा संगरूसकु ईटताव: तरी भी नीम स्वर्गीय आप्प अवरी पालसतान. येन नीम कमित अऊर से यक्कुल हैलेच? 27 नीम दा टु हगि याव आन, जो चिन्ता माळकु तान जदिगी दा ऊंद घळी भी वाळुस सकतान?”

28 “अदकि फळक्यागोळ साटी येती चिन्ता माळतीर? आळी दाकळव फूलगोळ मा ध्यान माळी कितान अव ह्यांग वाळुसताव; अव ना रा मयनत माळताव, ना तान साटी फळक्यागोळ माळताव. 29 तरी भी ना नीम से अनतीन कितान सुलैमान राजा भी, तान पुरा जीवन दा अऊर दा टु यारदु घाई कपळागोळ हाक्कु ईला ईरोन. 30 इदुरसाटी याग परमेश्वर मैदान इन काड्डा अक, जो ईद आद अदकि नाळ बेक्की दा झोक्सकु आदीत, हगि कपळा हाकसुसतान, रा हे अल्पवशिवासीगोळा, आव नीमी ईऊर से वळ्ळीद येती हाकसुसतदिलि?

31 “इदुरसाटी नीव वचिार माळकु ईद अनबाळी कितान येन तनिदेव, या येन कुळदेव, या येन हाक्केव. 32 यतकी गैरयहूदी ई सप्पा वस्तुगोळ्द खोज दा ईरतार, पर नीम स्वर्गीय आप्प जानसतान कितान नीमी ई सप्पा वस्तुगोळ्द जरवत आद. 33 इदुरसाटी पयले नीव परमेश्वर उन राज्य अदकि आऊन न्याय

‡ 6:27 ६:२७ अदकि थ्वाळासा जीऊसी; या अदकि थ्वाळासा ऊँचा वाळुसी.

इन खोज माळी रा ई सप्पा वस्तुगोळ भी नीमी सकिकेदव.
 34 इदुरसाटी नाळ इन चन्ता माळबाळी, यतकी नाळ इन दनि
 तान चन्ता खुद माळ कोंडीत; ईंद इन साटी ईंद इन दा दुख काफी
 आद.

7

दुसरा मा दोष हचोदाल
 (लूका ६:३७,३८,४१,४२)

1 “दोष हचबाळी कनिम मा भी दोष हचकु आगुल. 2 यतकी
 या प्रकार देल नीव दोष हचतीर, अदा प्रकार देल नीम मा भी
 दोष हचकु आदीत; अदकि याता नाप देल नीव आळुतीर, अदा
 प्रकार देल नीम साटी भी आळुकु आदीत.” 3 “नी येती तान
 वार्ट उन कण्ण इन तनिका अक नोळत्या, अदकि तान कण्ण
 इन लट्टा नीनी ऊमसाल? 4 याग नींद अच कण्ण दा लट्टा
 आद, रा नी तान वार्ट उन से हयांग अन सकत्या, ‘ता ना नीन
 कण्ण दा टु तनिका तेगु कोळतीन?’ 5 हे कपटी, पयले नी तान
 कण्ण दा टु लट्टा तेगु कोम, आग नी तान वार्ट उन कण्ण दा टु
 तनिका वळ्लीसा नोळकु तेगु सकत्या. 6 पवतिर वस्तु नायगोळी
 कोळबाळी, अदकि तान मोती हंदीगोळ मुंद हाक्कबाळी; हगि
 आगबाळुल किव अवरी कालगोळ ल्यालमा मेटबुळुल अदकि
 तरिगकु नीमी हर्द बुळुल.”

प्रार्थना अन महत्व
 (लूका ११:९-१३)

7 “बेळीर, रा नीमी कोटकु आदीत; हुंदसीर रा नीमी सकिकीत;
 ठोकसीर, रा नीम साटी तेरूकु आदीत. 8 यतकी जो यावारा
 बेळ्यान, आऊक कोटकु आदीत; अदकि जो हुंदस्यान, आऊक
 सकिकीत; अदकि जो ठोकस्यान आऊन साटी तेरूकु आदीत.”

9 “नीम दा टु हगि याता मंळसा आन, कि अगर आऊन पार आऊक रोटी बेळुल, रा आव आऊक कलल कोट्टान? 10 या मेन बेळुल, रा आव आऊक हाव कोट्टान? 11 इदुरसाटी याग नीव बुरा ईतक्, तान चकिरी वळ्लीद वस्तु कोळोद जानसतीर, रा नीम स्वर्गीय आप्प तान बेळावाळेरी वळ्लीद वस्तु यती कोळतीदील! 12 *ईद कारण जो येनारा नीव चाहासतीर कि लॉकुर नीम सांगुळ बरताव माळुल, नीव भी आंदुर सांगुळ हांग अच बरताव माळी; यतकी मूसा अन व्यवस्था अदकि भवषियवक्ता अन्द शक्षिा ईदा हुन.”

स्यांळ्द अदकि चौळा हादी
(लूका १३:२४)

13 “स्यांळ्द हादी टु होगोद-बरोद माळी, यतकी चौळा आद अद फाटक अदकि आसान आद अद हादी जो वनिाश दी ओयतद; अदकि हापाळ सा आर जो अल टु होगोद-बरोद माळतार. 14 यतकी स्यांळ्द आद अद फाटक कठनि आद अद हादी जो जीवन दी ओयतद; अदकि थ्वाळासा अच लॉकुर आर जो आ हादी इक हासलि माळतार.

ह्यांग मार्र हांग काय
(लूका ६:४३, ४४; १३:२५-२७)

15 “ख्वाटा भवषियवक्तागोळ से सावधान ईरी, जो म्यांडागोळ्द भेष दा नीम हात्ती बरतार, लेकीन आंदुर बुळ्क टु ह्रूकु तनिवाळेर म्यांडागोळ उर. 16 आंदुर करनी देल नीव आंदरी अरू कौडीर. येन लॉकुर झाळीगोळ दा टु अंगुर, मुळ्लगोळ दा टु अंजीर कोयतार? 17 ईदा प्रकार देल हर ऊंद वळ्लीद मार्र वळ्लीद काय तरतद अदकि बेकार मार्र बेकार काय तरतद. 18 वळ्लीद मार्र बेकार काय तर सकाल, अदकि ना बेकार मार्र वळ्लीद काय तर सकतद. 19 *जो जो मार्र वळ्लीद

काय तरतदील, अद कळकु अदकि बेक्की दा हाक्कु आदीत. 20 *ईद प्रकार देल नीव आंदुर कयाल्सागोळ्द कर्मगोळ देल ख्वाटा भवषियवक्तागोळी अर्त कोंडीर.

ना नीमी यागलु अरालीन
(लूका १३:२५-२७)

21 “जो नान से, ‘हे प्रभु! हे प्रभु!’ अनतान, आंदुर दा टु हर ऊंद स्वर्ग इन राज्य दा प्रवेश माळतीदील, लेकीन आवा जो नान स्वर्गीय आप्प उन इच्छा मा नळुतान. 22 न्याय इन दनि हापाळ सा लॉकुर नान से अंदार, ‘हे प्रभु! हे प्रभु! येन नाव नीन हेसुर देल भवषियवाणी माळीदील, अदकि नीन हेसुर देल दुष्टआत्मागोळी तेगददील, अदकि नीन हेसुर देल हापाळ सा आश्चर्य चकति कयाल्सा माळीदील?’ 23 आग ना आंदुर से खुला शब्द दा अंद बुळाईन, ‘ना नीमी यागलु अरतीदलि. हे कुकर्म माळावाळेर, नान हात्ती टु होटोगी.’

मान्ना कटावाळेर येढ्ढ मंळसा: बुद्धमिान अदकि मूर्ख
(लूका ६:४७-४९)

24 “इदुरसाटी जो यावारा नान ई मातगोळी केळकु अवरी माळतान, आव आ बुद्धमिान मंळसा अन्द घाई ठहरूस्यान याव तान मान्ना चट्टान मा कटदुन. 25 अदकि माळ बत्त, अदकि बाळ बत्त, अदकि आँधी तुफान नळुत, अदकि आ मान्ना से टकरूस्त, फरि भी अद बदिदील, यतकी अदुरद पायवा चट्टान मा अगुळकु आगीत. 26 लेकीन जो यावारा नान ई मातगोळी केळतान अदकि अऊर मा नळालुन, आव आ मूर्ख मंळसा अन्द घाई ठहरूस्यान याव तान मान्ना धुळा मा कटदुन. 27 अदकि माळ बत्त, अदकि बाळ बत्त, अदकि आँधी तुफान नळुत, अदकि आ मान्ना से टकरूस्त अदकि अद जोर देल बदिक् सत्यानाश आगेत.”

यीशु उन अधकार

28 ✨याग यीशु ई मातगोळी माताळ कोंडुन, रा हगि आत की भीळ आऊन उपदेश देल सट्ट आत, 29 यतकी आव आंदुर शास्त्रीगोळ घाई ईला लेकीन अधकारीगोळ घाई उपदेश कोळतोगोन.

8

कोढ इन रोगी इक चंगा माळोद
(मरकुस १:४०-४५; लूका ५:१२-१६)

1 याग यीशु आ पहाळी मा टु ल्यालमा ईळदुन, रा ऊंद धोळ्द भीळ आऊन हदि आगेत. 2 अदकि नोळी, ऊंद कोढ इन रोगी मंळसा हात्ती बंदकु आऊक प्रणाम माळदुन अदकि अंदुन*, “हे प्रभु, अगर नी चाहास्या, रा नानी शुद्ध माळ सकत्या.”

3 यीशु कय मुंद माळकु आऊक मुटदुन, अदकि अंदुन, “ना चाहसतीन, नी शुद्ध आगेग.” अदकि आव तुरन्त कोढ इन रोग देल शुद्ध आगेदुन. 4 बाक यीशु आऊन से अंदुन, “नोळ, यारीकु हेळबाळेत, लेकीन होगकु तान तान इक याजक उक तोर्स अदकि मूसा अन आदेश इन अनुसार भेंट येर्स, ताकी लॉकुर साटी गवाही आगुल.”

रोमी सूबेदार उन दास उक चंगा माळोद
(लूका ७:१-१०)

5 याग यीशु कफरनहूम नगर दा बंदुन रा ऊंद रोमी सपिाहीगोळ्द सुबेदार आऊन हात्ती बंदकु आऊन से वनिती माळदुन, 6 “हे प्रभु, नान दास उक लकवा होळ्द बुटाद अदकि आव हापाळ दुख दा आन.”

7 आग यीशु सुबेदार से अंदुन, “ना बंदकु आऊक चंगा माळाईन.”

✨ 7:28 ७:२८ मरकुस १:२२; लूका ४:३२ * 8:2 ८:२ नानी साफ माळ; हगि मानसोर की ईद बमिारी मंळसा अक न्यायवधि इन प्रती मैला माळोद.

8 सुबेदार उत्तर कोट्टुन, “हे परभु, ना ई लायक हैलेच क्नी नांदा मान्ना ताका बंद्या, लेकीन सरिफ आग्या कोटबुळ रा नान सेवक चंगा आगेदान. 9 यतकी ना भी जमिमेदार मंळसा हुईन, अदकि सपिाही नान हात्ती आर. याग ना ऊंद से अनतीन, ‘होग!’ रा आव होगतान; अदकि दुसरा से अनतीन, ‘बर!’ रा आव बरतान; अदकि याग तान दास से अनतीन, ‘ईद माळ!’ रा आव माळतान.”

10 ईद केळकु यीशु उक अचम्भा आत, अदकि जो आऊन हदि बरोर आंदुर से अंदुन, “ना नीम से खरा माताळतीन क्नी ना इस्त्राएल दा भी हगि मजबुत वशिवास नोळीदील. 11 ✧अदकि ना नीम से अनतीन क्नी पूर्व अदकि पश्चिमि टु हापाळ सा लॉकुर बंदार अदकि आंदुर भोज दा अब्राहम, इसहाक अदकि याकूब उन सांगुळ स्वर्ग इन राज्य दा कुरतार. 12 ✧लेकीन राज्य अनूद औलाद व्हार्या अंधार दा हाक्कु आदार: अल वोरलोद अदकि हल्लगोळ्द कचचोद आदीत.” 13 आग यीशु सुबेदार से अंदुन, “होग, ह्यांग नीन वशिवास आद, हांग अच नीन साटी आगुल.” अदकि आऊन दास अदा घळी दा चंगा आगेदुन.

यीशु हापाळ रोगीगोळी चंगा माळतान
(मरकुस १:२९-३४; लूका ४:३८-४१)

14 यीशु याग पतरस उन मान्या बंदुन, रा आव आऊन आत्ता अक तेज मय देल बदिक्कु नोळदुन. 15 यीशु आकनि कय मुटदुन अदकि आकनि मय ईळदोदव, अदकि आक यदकु आऊन स्यावा माळली कुरतार.

16 याग द्याव आत आग आंदुर आऊन हात्ती हापाळ सा लॉकुरी तंदुर यारदा दुष्टआत्मागोळ ईरव अदकि यीशु आ दुष्टआत्मागोळी तान वचन देल तेग्द बुट्टुन; अदकि सप्पा रोगीगोळी चंगा माळदुन. 17 ✧यतकी जो वचन यशायाह

✧ 8:11 द:११ लूका १३:२९ ✧ 8:12 द:१२ मत्ती २२:१३; २५:३०; लूका १३:२८

✧ 8:17 द:१७ यशायाह ५३:४

भवषियवक्तागोळ दवारा अंदकु आगीत अद पुरा आगुल: “यीशु खुद नाम कमजोरीगोळी हुळदुन अदकि नाम बमिरगोळी नेगुकु दुर माळदुन.”

यीशु उन चेला बनसोद कमित
(लूका ९:५७-६२)

18 यीशु याग तान नाकु दी ऊंद धोळ्द भीळ नोळदुन रा चेलागोळी झील इन आप्पाटी होगोद आग्या कोट्टुन. 19 आग ऊंद शास्त्री हात्ती बंदकु आऊन से अंदुन, “हे गुरु, नी यल होदया, ना नीन हदि होट्ट बराईन.”

20 यीशु आऊन से अंदुन, “कोल्यागोळ गुफा अदकि आकाश इन पक्षीगोळ ग्वादा ईरताव; लेकीन मंळसा अन पार उन साटी ताल्ला होचकोमोद भी जागा हैलेच.”

21 मात्त ऊंद चेला आऊन से अंदुन, “हे प्रभु, नानी पयले होगोळ कनि तान आप्प उक नळसाईन.”

22 यीशु आऊन से अंदुन, “नी नान हदि आगेग, अदकि सोद्द मंळसागोळी तान मुरदा नळसगोळ.”

तुफान इक शांत माळोद
(मरकुस ४:३५-४१; लूका ८:२२-२५)

23 याग यीशु ड्वांगा मा येरदुन, रा आऊन चेलागोळ आऊन हदि आगेदुर. 24 अदकि नोळी, अचानक झील दा ऊंद हगि धोळ्द तुफान येळ्त क्क ड्वांगा लयरगोळ से मुचली हत, लेकीन यीशु मगिगेन. 25 आग चेलागोळ हात्ती बंदकु आऊक येब्सदुर अदकि अंदुर, “हे प्रभु, नामी ऊळस, नाव मुळकतेव.”

26 यीशु आंदुर से अंदुन, “हे अवशिवासीगोळा, यती अंजेतीर?” आग आव यदकु आँधी अदकि नीर इक डटकार्सदुन, अदकि सप्पा शांत आगेत. 27 अदकि आंदुर अचम्भा माळकु अनली कुरतुर, “ईव ह्यांग मंळसा हुन क्क आँधी अदकि नीर भी ईऊन आग्या मान्सताव.”

दुष्टआत्मा-ग्रस्त मंळसागोळी चंगा माळोद
(मरकुस ५:१-२०; लूका ८:२६-३९)

28 याग यीशु आप्पाटी गदरेनयिों अन प्रदेश दा पोहचुसदुन, रा येढ्ढ मंळसागोळ यारदा दुष्टआत्मागोळ ईरव कब्रगोळ दा टु होटकु आऊक सकिदुर. आंदुर ईट भयानक ईरोर की याऊ आ हादी देल होग ईला सकोन. 29 आंदुर चलिळासकु अंदुर, “हे परमेश्वर उन पारा, नाम्द नीन से येन क्याल्सा? येन नी समय से पयले नामी दुख कोळली इल बंद्या?”

30 आंदुर से थ्वाळासा दुर मा हापाळ सा हंदीगोळ्द ऊंद झुण्ड आळोद. 31 दुष्टआत्मागोळ आऊन से ईद अंदकु वनिती माळदव, “अगर नीनी नामी तेगोद अच आद, रा आ हंदीगोळ्द झुण्ड दा कळबुळ.”

32 आव आ दुष्टआत्मागोळ से अंदुन, “होगी!” अदकि आ दुष्टआत्मागोळ होटकु हंदीगोळ दा होक्केदव अदकि नोळी, पुरा झुण्ड ऊतार मा टु झील इन नीर दा होगकु बतित्त अदकि मुळककु सोतोत.

33 आ हंदीगोळी आळसावाळेर अल टु ओळदुर, अदकि नगर दा होगकु ई सप्पा मातगोळी अदकि यारदा दुष्टआत्मागोळ ईरव आंदुरद सप्पा हाल केळसदुर. 34 आग पुरा नगर इन लॉकुर यीशु से भेंट माळोर साटी होटकु बंदुर, अदकि आऊक नोळकु वनिती माळदुर की नाम क्षेत्तर दा टु व्हार्या होटोग.

9

लकवा अन्द रोगी इक चंगा माळोद
(मरकुस २:१-१२; लूका ५:१७-२६)

1 बाक यीशु डवांगा मा कुर्तकु समुदर अन आप्पाटी होदुन, अदकि तान नगर* दा बंदुन. 2 अदकि नोळी, हापाळ लॉकुर ऊंद लकवा अन्द रोगी इक व्हर्स मा मगिंसकु आऊन हात्ती तंदुर.

* 9:1 १:१ आऊंद खुद इन ऊर; कफरनहूम

यीशु आंदुर वशिवास नोळकु, आ लकवा अन्द रोगी से अंदुन, “हे पारा, हमिमत ईट; नीन पाप माफ आदव.”

³ इदुर मा हापाळ शास्त्रीगोळ माताळली कुरतुर, “इव रा परमेश्वर उन अपमान माळतान.”

⁴ यीशु आंदुरद मन इन मातगोळी अरूकु अंदुन, “नीव लॉकुर तान-तान मन दा बुरा वचिर येती माळेतीर? ⁵ आसान येन आद? ईद अनोद, ‘नीन पाप माफ आदव,’ या ईद अनोद कि, ‘येळ नळु अदकि टेट.’ ⁶ लेकीन इदुरसाटी कि नीव जान्स कोमी कि मंळसा अन्द पार उक पृथ्वी मा पाप माफ माळोद अधिकार आद.” इदुरसाटी यीशु लकवा अन्द रोगी से अंदुन, “येळ, तान व्हर्स नेगु, अदकि तान मान्नी होटोग.”

⁷ आग लकवा अन रोगी यदकु तान मान्नी होटोदुन. ⁸ लॉकुर ईद नोळकु अंजेदुर अदकि परमेश्वर उन बळाई माळली कुरतुर याव मंळसा अक हगि अधिकार कोटान.

यीशु मत्ती इक कारूतान

(मरकुस २:१३-१७; लूका ५:२७-३२)

⁹ अल टु मुंद होगकु यीशु मत्ती हेसुर इन ऊंद मंळसा अक कर ताकोमोद चौकी मा कुरतकु नोळदुन, अदकि आऊन से अंदुन, “नान हदि आगेग.”

आव यदकु आऊंद हदि आगेदुन.

¹⁰ ✨याग यीशु मत्ती इन मान्या ऊमोर साटी कुरतुन रा कर ताकोमावाळेर अदकि पापी बंदकु यीशु अदकि आऊन चेलागोळ सांगुळ ऊमली कुरतुर. ¹¹ ईद नोळकु फरीसीगोळ आऊन चेलागोळ से अंदुर, “नीम गुरु कर ताकोमावाळेर अदकि पापीगोळ्द सांगुळ येती तनितान?”

✨ 9:10 ९:१० लूका १५:१,२ † 9:10 ९:१० मत्ती इन मान्या; या आऊन मतलब यीशु उन मान्या

12 ईद केळकु यीशु आंदुर से अंदुन, वैद्य भला चंगागोळ साटी ईला लेकीन बमिारगोळ साटी जरूरी आन. 13 * “इदुरसाटी नीव होगकु इदुरद अर्थ कलत् कोमी: ‘ना बलदान ईला लेकीन दया चाहासतीन.’ यतकी ना न्यायी लॉकुरी ईला, लेकीन पापीगोळी कारूली बंदीन.”

उपास इन प्रश्न

(मरकुस २:१८-२२; लूका ५:३३-३९)

14 आग बपतसिमा कोळावाळा यूहनना अन्द चेलागोळ आऊन हात्ती बंदकु अंदुर, “येन कारण आद की नाव अदकि फरीसी ईट उपास ईटतेव, पर नीन चेलागोळ उपास ईटालुर?”

15 यीशु आंदुर से अंदुन, “येन वराती, यागासताका मंळगार आंदुर सांगुळ आन, शोक माळ सकतार? पर अव दनि बंदव याग मंळगार आंदुर से ब्यार माळकु आदान, आ समय आंदुर उपास माळ्यार.”

16 “क्वारा कपळा अन्द थगिर हाळोद कपळा मा याऊ हचालुन, यतकी अद थगिर आ कपळा से येनारा मात्त जेडु कोमतद, अदकि बाक अद यक्कुल हर्दोगतद. 17 अदकि लॉकुर व्हाशोद अंगुर इन रास्सा हाळोद तोगुल इन चलिा दा तुमालुर, यतकी हगि माळदुर देल तोगुल इन चलिा हर्दोगताव अदकि अंगुर इन रास्सा चेल्लेगतद अदकि तोगुल इन चलिा नाश आगेगताव; लेकीन व्हाशोद अंगुर इन रास्सा व्हाशोद तोगुल इन चलिा दा तुमतार अदकि अव येदु उळ्दकु ईरताव.”

सोतकु पोर अदकि बमिार आरत

(मरकुस ५:२१-४३; लूका ८:४०-५६)

18 यीशु आंदुर से इव मातगोळ अनतेला अच ईरोन, कनिोळी यहूदी सभागृह अन ऊंद सरदार बंदकु आऊक प्रणाम माळदुन

अदकि अंदुन, “नान पोर ईगल्या सोतार, लेकीन नळुकु तान कय आकनि मा ईट, रा आक जत्तिता आगेदार.”

19 यीशु यदकु तान चेलागोळ सांगुळ आऊन सांगुळ होटोदुन.

20 अदकि नोळी, ऊंद आर्त ईरोर आक इक हन्नेळ वर्ष टु खुन होगोद रोग ईरोद, हदि टु बंदकु आऊन कपळा अन्द कनिरा अक मुटदुर. 21 यतकी आक तान मन दा अनतोगोर, “अगर ना आऊन कपळा का मुट बुळाईन रा चंगा आगेगाईन.”

22 यीशु तरिगकु आकी नोळदुन अदकि अंदुन, “पोरी धीरज ईट; नीन वशिवास नीनी वळ्लीद माळ्याद. इदुरसाटी आक आर्त आटोटीका चंगा आगेदुर.”

23 याग यीशु आ सरदार उन मान्या पोहचुसदुन अदकि कोळ्ळ ऊयावाळेर इक अदकि भीळ इक सोरसराबा मचुस्त नोळदुन, 24 आग आव लाँकुर से अंदुन, “सरकुसेगी, पोर सायली आर, लेकीन मगित्यार.” इदुर मा आंदुर आऊन मज्याक हारसली कुरतुर. 25 लेकीन याग भीळ इक व्हार्या तेगुकु आत, रा आव बुळ्क होगकु पोर इन कय हुळदुन, अदकि पोर यदकु कुरतोदुर. 26 अदकि ई मात इन चर्चा द्याश इन सप्पा प्रदेश दा फैलुसेत.

येढ्ढ कुढ्ढगोळी दृष्टीदान

27 याग यीशु अल टु मुंद वाळुसदुन, रा येढ्ढ कुढ्ढ मळसागोळ आऊन हदि ईद कारूतेला नळदुर, “हे दाऊद उन औलाद, नाम मा दया माळ!”

28 याग आव मान्या बुळ्क पोहचुसदुन, रा आ कुढ्ढगोळ आऊन हात्ती बंदुर, अदकि यीशु आंदुर से अंदुन, “येन नीमी वशिवास आद की ना चंगा माळ सकतीन?” आंदुर आऊन से अंदुर, “हव, प्रभु!” 29 आग आव आंदुरद कण्णगोळी कय हचकु अंदुन, नीम वशिवास इन अनुसार नीम साटी हांगा आगुल “हयांग नीव चाहासतीर.” 30 अदकि आंदुरद कण्णगोळ दैल

कांळसली हत्त. यीशु आंदरी चेतावनी कोटकु अंदुन, “सावधान, ईदुर बारा दा यारीकु मालूम ईला नळु पायजे.”

31 लेकीन आंदुर अल टु होटकु पुरा द्याश दा आ समाचार इक फैलुस बुदुर.

ऊंद मुक्का अक चंगा माळोद

32 याग आंदुर व्हार्या होगोर, रा नोळी, लाँकुर ऊंद मुक्का अक यारदा दुष्टआत्मा ईरोद, आऊन हात्ती तंदुर; 33 अदकि याग दुष्टआत्मा तेगद बुट्टुन, रा मुक्का मंळसा माताळली हत्तेदुन. इदुर मा भीळ अचमभा माळकु अंत, “इस्त्राएल दा हगि यागलु नोळकु आगीदील.”

34 ✨लेकीन फरीसीगोळ अंदुर, “इव रा दुष्टआत्मागोळ्द सरदार उन मदत देल दुष्टआत्मागोळी तेगुतान.”

यीशु उन दया

35 ✨यीशु सप्पा नगरगोळ अदकि ऊरगोळ दा वयाळतोगोन, अदकि राज्य अन्द खुशखबरी प्रचार माळतोगोन, अदकि हर प्रकार इन बमिरी अदकि कमजोरी इक दुर माळतेला ईत्तुन. 36 ✨याग आव भीळ इक नोळदुन रा आऊक लाँकुर मा दया बत्त, यतकी आंदुर आ म्यांडागोळ घाई ईरोर यारद याऊ रखवाला ईला ईरोन, आंदुर व्याकुल अदकि भटकुसकु ईरोर. 37 ✨आग आव तान चेलागोळ से अंदुन, “हण्ण केई रा हापाळ आव पर क्याल्सा माळावाळेर मजदुर गोरत आर. 38 इदुरसाटी फसल इन स्वामी से वनिती माळी का आव केई इन फसल कडोर साटी मजदूर कळु बुळुल.”

✨ 9:34 ९:३४ मत्ती १०:२५; १२:२४; मरकुस ३:२२; लूका ११:१५ ✨ 9:35 ९:३५ मत्ती ४:२३; मरकुस १:३९; लूका ४:४४ ✨ 9:36 ९:३६ मरकुस ६:३४ ✨ 9:37 ९:३७ लूका १०:२

10

यीशु उन हन्नेळ चेलागोळ
(मरकुस ३:१३-१९; लूका ६:१२-१६)

1 बाक यीशु तान हन्नेळ चेलागोळी तान हात्ती कारदुन, आंदरी दुष्टआत्मागोळ मा अधिकार कोट्टुन की अवरी तेगुल अदकि सप्पा प्रकार ईनव बमिरगोळ अदकि सप्पा प्रकार ईनव कमजोरीगोळी अक दुर माळुल. 2 इंदुर हन्नेळ प्रेरतिगोळ्द हेसुर हगि आवः पयला शमौन, आऊक पतरस भी अनतान, अदकि आऊन वार्ट अन्दरियास; जब्दी इन पार याकूब, अदकि आऊन वार्ट यूहन्ना; 3 फलिप्पुस, अदकि बरतुलमै, थोमा, अदकि कर ताकोमावाळा मत्ती, हलफई नव पार याकूब, अदकि तद्दै, 4 शमौन कनानी, अदकि यहूदा इस्करियोती याव यीशु उक ध्वाका देल हुळसुस बुटीदुन.

हन्नेळ प्रेरतिगोळ्द स्यावा-कार्य
(मरकुस ६:७-१३; लूका ९:१-६; १०:४-१२)

5 ई हन्नेळ प्रेरतिगोळी यीशु आग्या कोटकु कळुदुनः “गैरयहूदीगोळ दी होगबाळेतीर, अदकि सामरीगोळ्द यात्तोदु नगर दा प्रवेश माळबाळेतीर. 6 लेकीन इस्त्राएल इन घराना अन्द अच काळ्द म्यांडागोळ्द हात्ती होगेतीर. 7 अदकि नळुत-नळुत ईद प्रचार माळीः की ‘स्वर्ग अन राज्य हात्ती होट बंदाद.’ 8 बमिरगोळी चंगा माळी, सोद्द मंळसागोळी जत्तिता माळी, कोदी मंळसा अक शुद्ध माळी, दुष्टआत्मागोळी तेगी. नीमी फुकट दा सकियाद, नीव भी फुकट दा वाटसी. 9 तान खसिा दा ना रा व्हान्ना, अदकि ना बेळ्ली, अदकि ना तांबा ईटेतीर; 10 ✨हादी इन साटी ना झ्वारा, ना दुसरा कुळता, ना जुता अदकि ना कोल हुडी, यतकी क्याल्सा माळावाळा मजदूर उक आऊन मजदूरी सकि पायजे.

✨ 10:10 १०:१० १ कुरन्थि १:१४; १ तीमुथयिस ५:१८

11 “थेल्यारा यातोदारा नगर या ऊरा दा होगी, रा पता हची क् अल याव लायक आन. अदकि यागासताका अल टु होळालीर, अदा मान्या ईरेतीर. 12 मान्या प्रवेश माळाहोती आऊक आशीष कोळेतीर. 13 अगर आ मान्या नौर लाँकुर योग्य ईतीदार रा नीम आशरिवाद आंदुर ताका पोहचुसीत, लेकीन अगर आंदुर योग्य ईला इतीदार रा नीम आशरिवाद नीम हात्ती वापस होट बंदीत. 14 ✨जो यावारा नीमी ग्रहण माळतीदील अदकि नीम मात केळतीदलि, आ मान्ना या आ नगर टु होळावती तान काल इन धुळा झाळ्स बुळी. 15 ✨ना नीम से खरा माताळतीन किन्याय इन दनि आ नगर इन दशा से सदोम अदकि गमोरा अन्द द्याश इन दशा यक्कुल सहन माळा लायक ईत्तीत.

बरावाळा संकट

(मरकुस १३:९-१३; लूका २१:१२-१७)

16 ✨“नोळी, ना नीमी म्यांडागोळ घाई लांडग्यागोळ न्याड्या कळुतीन, इदुरसाटी हावगोळ घाई बुद्धमिान अदकि कबूतरगोळ घाई भोला बन्सी. 17 ✨लेकीन लाँकुर से सावधान ईरी, यतकी आंदुर नीमी महासभागोळ दा सोपस्यार, अदकि तान पंचायतगोळ दा नीमी क्वाळा देल बळदार. 18 नीव नान साटी हाकमिगोळ अदकि राजागोळ मुंद आंदुर मा, अदकि गैरयहूदीगोळ मा गवाह आगोर साटी पोहचुस्कु आदीर. 19 याग आंदुर नीमी हुळसुस्यार रा ईद चनिता माळबाळेतीर क् नाव याता रीत दिेल या येन अदेव, यतकी जो येनारा नीमी अनोद ईत्तीत, अद अदा घळी नीमी हेळकु आदीत. 20 यतकी माताळावाळेर नीव आल्लच, लेकीन नीम स्वर्गीय आप्प उन आत्मा नीम दा माताळतद.

✨ 10:14 १०:१४ प्रेरतिगोळ १३:५१ ✨ 10:15 १०:१५ मत्ती ११:२४ ✨ 10:15 १०:१५ लूका १०:४-१२ ✨ 10:16 १०:१६ लूका १०:३ ✨ 10:17 १०:१७ मरकुस १३:९-११; लूका १२:११,१२; २१:१२-१५

21 ☆“वार्ट, वार्ट उक अदकि आप्प पार उक, कोन्नोर साटी सोपस्यार, अदकि चकिोर मोय-आप्पुर वरिध दा यदकु आंदरी कोन्सुस बुट्टार. 22 ☆नान हेसुर इन कारण सप्पा लॉकुर नीम से दुश्मनी माळ्यार, लेकीन जो आखरी ताका धीरज हुडुकु ईत्तान आऊंदा उदधार आदीत. 23 याग आंदुर नीमी ऊंद नगर दा सतुस्यार, रा नीव दुसरा दी ओळ्ळेगेतीर. ना नीम से खरा माताळतीन, नीव इस्त्राएल इन सप्पा नगरगोळ दा होगा से पयले अच मंळसा अन्द पार होट बंदान.

24 ☆“चेला तान गुरु से धोड्डेव ईरालुन; अदकि न दास तान स्वामी से. 25 ☆चेला तान गुरु अक अदकि दास तान स्वामी इन बराबर आगोद अच काफी आद. याग आंदुर मान्ना अन स्वामी इक शैतान अंदुर रा आऊन मान्नावाळेर इक येन येनारा अनतीदलि!

यार देल अंजेव
(लूका १२:२-७)

26 ☆“इदुरसाटी मंळसागोळ से अंजबाळी; यतकी येनारा होचकु हैलेच जो तेर्दकु आगतीदील, अदकि न येनारा रहस्यमय आद जो प्रगट आगतीदील. 27 जो ना नीम से अंधार दा अनतीन, अद नीव ऊजुळ दा अनी; अदकि जो ना नीम कवि दा अंदीन, अदरी नीव आळा मा टु प्रचार माळी. 28 आंदुर से अंजबाळी जो मय इक नुकसान माळतार, लेकीन आत्मा अक नुकसान माळ सकालुर; लेकीन परमेश्वर से अच अंजी, जो आत्मा अदकि शरीर येदुदु नरक दा नष्ट माळ सकतान. 29 येन ऊंद पैस्या दा येदुदु चमिणी पक्षी मारालव? तरी भी नीम आप्प उन इच्छा अन्द अलावा अऊर दा टु ऊंद भी धरती मा

☆ 10:21 १०:२१ मरकुस १३:१२; लूका २१:१६ ☆ 10:22 १०:२२ मत्ती २४:९; मरकुस १३:१३; लूका २१:१७; मत्ती २४:१३; मरकुस १३:१३ ☆ 10:24 १०:२४ लूका ६:४०; यूहन्ना १३:१६; १५:२० ☆ 10:25 १०:२५ मत्ती ९:३४; १२:२४; मरकुस ३:२२; लूका ११:१५ ☆ 10:26 १०:२६ मरकुस ४:२२; लूका ८:१७

बलिसकाल. 30 नीम ताल्ला अन चुट्टी भी सप्पा आळुकु आव.
31 इदुरसाटी अंजबाळी; नीव हापाळ चमिणीगोळ से भी बार्र
आईर.

यीशु उक स्वीकार या अस्वीकार माळोद
(लूका १२:८; ९)

32 “जो यावारा मळसागोळ मुंद नानी मान्स कोंडान, आऊक
ना भी तान स्वर्गीय आप्प उन मुंद मान्स कोमाईन. 33 *लेकीन
जो यावारा मळसागोळ मुंद नान इनकार माळ्यान, आऊक ना
भी तान स्वर्गीय आप्प उन मुंद इनकार माळाईन.

यीशु उन बरोद परणाम
(लूका १२:५१-५३; १४:२६,२७)

34 “ईद समसबाळी की ना धरती मा शांती तरली बंदीन; ना
शांती तरली ईला, पर तलवार नळसोर साटी बंदीन. 35 ना रा
बंदीन की: ‘पार उक आऊन आप्प उन से, अदकि पोर इक आकनि
मोय इन से, अदकि सास्सा अक आकनि आत्ता से ब्यार्र माळ
कोमाईन; 36 *मळसा अन्द दुश्मन आऊन मान्या अन लॉकुर
अच ईत्तार.’

37 “जो तान मोय या आप्प उक नान से यक्कुल प्रयि
जान्सतान, आव नान लायक हैलेच; अदकि जो तान पार या पोर
इक नान से यक्कुल प्रयि जान्सतान, आव नान लायक हैलेच;
38 *अदकि जो तान क्रूस नेगुकु नान हदि नळालुर आंदुर नान
लायक हैलेच. 39 *जो तान जीव ऊळसोद चाहास्यान, आव
अदरी खोऊस्यान; अदकि जो नान कारण तान जीव खोऊस्यान,
आव अदरी हासलि माळ्यान.

* 10:33 १०:३३ २ तीमथियुस २:१२ * 10:36 १०:३६ मीका ७:६ * 10:38
१०:३८ मत्ती १६:२४; मरकुस ८:३४; लूका ९:२३ * 10:39 १०:३९ मत्ती १६:२५;
मरकुस ८:३५; लूका ९:२४; १७:३३; यूहन्ना १२:२५

प्रतफिल
(मरकुस ९:४१)

40 ✧ “जो नीमी ग्रहण माळतान, आव नानी ग्रहण माळतान; अदकि जो नानी ग्रहण माळतान, आव नानी कळावाळा अक ग्रहण माळतान. 41 जो भवषियवक्ता अक भवषियवक्ता जान्सकु ग्रहण माळुल, आव भवषियवक्ता अन प्रतफिल हासलि माळ्यान; अदकि जो न्यायी इक न्यायी जान्सकु ग्रहण माळुल, आव न्यायी इन प्रतफिल हासलि माळ्यान. 42 जो यावारा ई स्याणेर दा टु ऊंद मळसा अक नान चैला जान्सकु सर्फि ऊंद वाटी नीर कुळस्यान, ना नीम से खरा माताळतीन, आव यातोदु रीत दिेल तान प्रतफिल खोऊसतदिलि.”

11

बपतस्मा कोळवाळा यूहन्ना दी टु बातणी कोळावाळेर
(लूका ७:१८-३५)

1 याग यीशु तान हन्नेळ चेलगोळी नर्देश कोट बुटुन, रा आव आंदुरद नगरगोळ दा उपदेश अदकि प्रचार माळली अल टु होटोदुन.

2 बपतस्मा कोळावाळा यूहन्ना याग बंदीगृह दा मसीह अन क्याल्सागोळ्द समाचार केळदुन अदकि तान चेलगोळी आऊन से ईद केळली कळुदुन, 3 “येन बरावाळा नीना हुय, या नाव यावारा दुसरा अन्द हादी कादेव?”

4 यीशु उत्तर कोट्टुन, “जो येनारा नीव केळतीर अदकि नोळतीर, अद सप्पा होगकु बपतस्मा कोळावाळा यूहन्ना अक हेळबुळी, 5 का कुढगोळ नोळतार अदकि लंगळागोळ नळुतार वयाळतार, कोदी शुद्ध माळकु आगतार अदकि बयरागोळ केळतार, मुर्दागोळ जित्ता माळकु आगताव, अदकि

✧ 10:40 १०:४० लूका १०:१६; यूहन्ना १३:२०; मरकुस ९:३७; लूका ९:४८

कंगालगोळी खुशखबरी केळ्सकु आगतद. 6 अदकि धन्य आर आंदुर, जो नान कारण ठोकर तनालुर.”

7 याग बपतस्मा कोळावाळा यूहन्ना अन चेलागोळ अल टु होदुर, रा यीशु यूहन्ना अनद बारा दा लॉकुर से अनली कुरतुन, “नीव आळी दा येन नोळली होगीदरि? येन हवा देल हालुसतेला सरकण्डा अक? 8 बाक नीव येन नोळली होगीदरि? येन मुलायम कपळा हागद मंळसा अक? नोळी जो मुलायम कपळा हाकतार, आंदुर राजभवनगोळ दा ईरतार. 9 रा बाक येती येन नोळली होगीदरि? येन यावारा भवषियवक्ता अक? हव, ना नीम से खरा अनतीन कि भवषियवक्ता से भी धोड्डेव उक. 10 ईव आवा हुन यार्द बारा दा लखिसकु आद: ‘नोळ, ना तान दूत उक नीन मुंद कळुतीन, जो नीन मुंद नीन हादी तयार माळ्यान.’* 11 ना नीम से खरा माताळतीन कि जो आर्तेर से पैदा आग्यार, आंदुरदा टु यूहन्ना बपतस्मा कोळावाळा से याऊ धोड्डेव आगीदील; पर जो स्वर्ग इन राज्य दा स्याणेव से स्याणेव आन आव यूहन्ना से धोड्डेव आन. 12 *यूहन्ना बपतस्मा कोळावाळा अनद दनिगोळ टु ईगासताका स्वर्ग इन राज्य दा बलपूर्वक प्रवेश आगतेला ईताद, अदकि बलवान अदरी कसुकोमतार. 13 यूहन्ना अन बरासताका सप्पा भवषियवक्तागोळ अदकि मूसा अन व्यवस्था भवषियवाणी माळीत. 14 *अदकि मानसोद चाहासतीर रा मान्सी कि एलयियाह जो बरावाळा ईरोन, आव यूहन्ना अच हुन. 15 यार कवि आव, आव केळ कोमुल.”

16 “ना ई पीढी इन लॉकुरद तुलना यार देल माळाईन? आंदुर आचकिरगोळ घाई आर, जो सात्तागोळ दा कुर्तकु आबुर दाबुर से कारकु अनतार.”

17 “नाव नीम साठी कोळ्ल मुरसदेव,

* 11:10 ११:२० मलाकी ३:१ * 11:12 ११:२२ लूका १६:३६ * 11:14 ११:२४
मत्ती १७:२०-२३; मरकुस ९:११-१३

अदकि नीव कुणदीदलि; नाव वलिाप माळदेव,
अदकि नीव दुखी आगीदील.”

18 “यतकी यूनना बपतस्मा कोळावाळा ना रा रोटी तति बंदुन अदकि ना अंगुर इन रास्सा कुडुत बंदुन, लेकीन लॉकुर अनतार, ‘आऊन दा दुष्टआत्मा आद.’ 19 मंळसा अन्द पार तति कुडुत बंदुन, अदकि लॉकुर अनतार ‘नोळी, व्हाट्टा तुम्मावाळा अदकि सारा कुडावाळा मंळसा, कर ताकोमावाळेर अदकि पापीगोळव संगी!’ लेकीन परमेश्वर उन ग्यान तान क्याल्सा देल सही ठहरूसकु आग्याद.”

अवश्वासी नगरगोळ
(लूका १०:१३-१५)

20 आग यीशु आ नगरगोळी धक्कारसली कुरतुन, यऊरुदा यीशु हापाळ सा सामर्थ्य ईनव क्याल्सा माळीदुन, यतकी आंदुर तान मन ईला तरिगुसीदुर. 21 “हे खुराजीन! नीन मा हाय! हे बैतसैदा! नीन मा हाय! यतकी जो सामर्थ्य ईनव क्याल्सा नीम दा माळकु आदव, अगर अव सूर अदकि सैदा दा माळकु आगायदव रा अव हापाळ पयले बॉरा* होदुकु अदकि राख मा कुरतकु तान पापगोळ देल तरिगेगायदव. 22 लेकीन ना नीम से अनतीन क न्याय इन दशी नीम दशा से सूर अदकि सैदा अन्द दशा यक्कुल सहन माळा लायक ईत्तीत. 23 अदकि हे कफरनहूम, येन नी स्वर्ग ताका म्याकुच नेगुकु आदया? नी पाताल लोक ताका ल्यालमा होदया! यतकी जो सामर्थ्य ईनव क्याल्सा नीन दा माळकु आदव, अगर अव सदोम दा माळकु आगायदव, रा अद नगर ईगासताका बनसकु ईराईत. 24 *लेकीन ना नीम से अनतीन क न्याय इन दशी नीम दयाश से सूर अदकि सैदा अन्द दशा यक्कुल सहन माळा लायक ईत्तीत.”

* 11:21 ११:२१ टाट-चद्वर, दुख इन हासक्या या कतळी ☆ 11:24 ११:२४
मत्ती १०:१५; लूका १०:१२

नान हात्ती बरी अदकि आराम माळी
(लूका १०:२१,२२)

25 आटा होती यीशु अंदुन, “हे आप्पा, स्वर्ग अदकि पृथ्वी नव प्रभु, ना नीन धन्यवाद माळतीन का नी ई मातगोळी आंदुर से जो ग्यानी आर अदकि कलत् माळकु लॉकुर से होचकोमकु ईट्द, अदकि चकिोरगोळ मा प्रगट माळ्द. 26 हव, हे आप्पा, यतकी नीनी ईदा वळ्लीद हत्त.”

27 * “नान आप्पा नानी सप्पा येनारा सोप्स बुटान; आप्पा उन अलावा पार उक याऊ अरालुन, सर्फ आप्पा; अदकि न पार उन अलावा आप्पा उक यावारा अरूतान, सर्फ पार; या आवा यार साटी पार आऊक प्रगट माळतान.”

28 “हे सप्पा मयनत माळावाळेर अदकि कर्ज देल मुळककु लॉकुरा, नान हात्ती बरी; ना नीमी आराम कोळाईन. 29 नान भार तान म्याकुच नेगु कोमी, अदकि नान से कली; यतकी ना नम्र अदकि मुलायम आईन: अदकि तान मन दा वशिराम नोळीर. 30 यतकी नान भार आसान अदकि नान ओझा हल्का आद.”

12

आराम इन दनि इन बारा दा प्रश्न
(मरकुस २:२३-२८; लूका ६:१-५)

1 आ समय यीशु आराम इन दशी केईगोळ दा टु आगतेला होगोन, अदकि आऊन चेलागोळी हसु हत्त रा आंदुर गोदी नव लॉम्बा मुर मुरकु तनिली कुरतुर. 2 फरीसीगोळ ईद नोळकु आऊन से अंदुर, “नोळ, नीन चेलागोळ अद क्याल्सा माळीत्यार, जो आराम इन दशी माळोद मूसा अन व्यवस्था अन अनुसार उचति हैलेच.”

3 यीशु आंदुर से अंदुन, “येन नीव वाचुसीदील, का दाऊद, याग आऊक अदकि आऊन संगीगोळी हसु हत रा येन माळदुर?”

* 11:27 ११:२७ यूहन्ना ३:३५; यूहन्ना १:१८; १०:१५

4 आव ह्यांग परमेश्वर उन भवन दा होदुन, अदकि भेंट येरुसद रोट्टीगोळी तदिन, यवरी तनिद दाऊद उक अदकि आऊन संगीगोळी उचति ईला ईरोद लेकीन सर्फि याजकगोळी उचति ईरोद? 5 येन नीव मूसा अन व्यवस्था दा वाचुसीदील कि याजक आराम इन दशिी सभागृह दा आराम इन दनि इन वधिी इक मुरदुर मा भी नरिदोष ठहूसतार?” 6 पर ना नीम से अनतीन कि ईल आव आन जो सभागृह से भी धोड्डेव आन. 7 अगर् नीव शासुत्रगोळ दा लखिसुद मातगोळुद मतलब जानुसायदीर, “ना दया देल संतुष्ट आगतीन, बलदान देल ईला, रा नीव नरिदोष उक दोषी ईला ठहूसायदीर. 8 मंळसा अन पार रा आराम इन दनि ईनव भी स्वामी हुन.”

लकवा ग्रसुत मंळसा अन चंगाई
(मरकुस ३:१-६; लूका ६:६-११)

9 अल टु नळुकु यीशु आंदुरुद यहूदी लॉकरुद सभागृह दा बंदुन. 10 अल ऊंद मंळसा ईरोन, यार कय वंळगकु ईरोद. फरीसीगोळ यीशु मा दोष हचोर साटी आऊन से केळदुर, “येन आराम इन दशिी चंगा माळोद मूसा अन व्यवस्था अन अनुसार उचति आद?”

11 यीशु आंदुर से अंदुन, “नीम दा हगि याव आन यारुद ऊंद अच म्यांडा ईरूल, अदकि अद आराम इन दशिी ख्वाँदुरा दा बदिगुल, रा आव अदरी हुळकु व्हार्या तेगुतदिल? 12 भला मंळसा अनुद कमित म्यांडा से याट यक्कुल आद! इदुरसाटी आराम इन दशिी भलाई माळोद उचति आद.” 13 आग आव आ मंळसा से अंदुन, “तान कय मुंद माळ.”

आव मुंद माळदुन, अदकि आ कय बाक दुसरा कय इन घाई वळलीद आगेत. 14 आग फरीसीगोळ व्हार्या होगकु आऊन वरिध दा योजना माळदुर कि आऊक याता प्रकार देल कोंदेव.

परमेश्वर उन नविळुसद सेवक

15 ईद जान्सकु यीशु अल टु होटोदुन. अदकि हापाळ लॉकुर आऊन हदि आगेदुर, अदकि आव सप्पा मुंदुरी चंगा माळदुन, 16 अदकि आंदरी चेतावनी कोट्टुन की नानी प्रगट माळबाळेतीर, 17 ताकी जो वचन यशायाह भवषियवक्ता अन्द द्वारा अंदकु आगीत, अद पुरा आगुल:☆

18 “नोळी, ईव नान सेवक हुन, यारी ना नविळुसीन;

नान प्रयि, यार देल नान मन संतुष्ट आद:

ना तान आत्मा आऊन मा हाकाईन,

अदकि आव गैरयहूदीगोळी न्याय इन खुशखबरी कोट्टान.

19 आव ना रा झगळा माळ्यान, अदकि ना धूम मचुस्यान,

अदकि ना रा सात्यागोळ दा यावारा आऊन आवाज केळ्यान.

20 आव मेडद सरकण्डागोळी मूरुतदिलि,

अदकि धुंगा कोळद बत्ती इक भी नुनाकतदिलि,

यागासताका आव न्याय इक वजिय माळ कोमालुन.

21 अदकि गैरयहूदी लॉकुर आऊन हेसुर मा आशा ईट्यार.”

यीशु अदकि बालजबूल

22 आग लॉकुर ऊंद कुढ्ढ अदकि मुक्का अक यारदा दुष्टआत्मा ईरोद, यीशु उन हात्ती तंदुर; अदकि आव आऊक चंगा माळदुन, अदकि आव माताळली अदकि नोळली कुरतुन.

23 ईदुर मा सप्पा लॉकुर चकति आगकु अनली कुरतुर, “ईव येन दाऊद उन औलाद हुन?”

24 ☆लेकीन फरीसीगोळ ईद केळकु अंदुर, “ईव रा दुष्टआत्मागोळव सरदार बालजबूल उन मदत देल दुष्टआत्मागोळी तेगुतान.”

25 आव आंदुरद मन इन मात अरूकु आंदुर से अंदुन, “अगर यातोदारा राज्य दा फूट बळितद, अद ऊजाळसेगतद; अदकि यातोदारा नगर या घराना दा फूट बळितद, अद टीकुसकु ईरतीदील. 26 अदकि अगर शैतान अच शैतान उक तेगदीत, रा अद खुद इन दा वरिधी आगेग्याद; बाक अदुरद राज्य ह्यांग टीकुसकु ईत्तीत? 27 भला, अगर ना शैतान उन सरदार उन सहायता देल दुष्टआत्मागोळी तेगुतीन, रा नीम अनुयायीगोळ यार सहायता देल तेगुतार? इदुरसाटी आंदुर अच नीम न्याय माळ्यार. 28 पर अगर ना परमेश्वर उन आत्मा अन्द सहायता देल दुष्टआत्मागोळी तेगुतीन, रा परमेश्वर उन राज्य नीम हात्ती होट बंदाद.”

29 या ह्यांग यावारा मंळसा यातोवारा ताकतवर मंळसा अन्द मान्या होक्कु आऊन माल कदू सकतान यागासताका कि पयले आव आ ताकतवर मंळसा अक कट कोमालुन? आगासताका आव आऊन मान्या होक्कु माल कदू सकालुन.

30 ☆जो नान सांगुळ हैलेच आव नान वरिध दा आन, अदकि जो नान सांगुळ जमा माळालुन आव बगरूसतान. 31 इदुरसाटी ना नीम से अनतीन किमंळसा अन्द सब प्रकार इन पाप अदकि अपमान माफ माळकु आदीत, लेकीन जो यावारा पवत्रि आत्मा अन अपमान माळतान आऊक माफ माळकु आगतीदील. 32 ☆जो यावारा मंळसा अन्द पार उन वरिध दा येनारा मात अंदान, आऊन ईद अपराध माफ माळकु आदीत, लेकीन जो यावारा पवत्रि आत्मा अन्द वरिध दा येनारा अंदान, आऊन अपराध न रा ई युग दा अदकि न बरावाळा युग दा माफ माळकु आगतीदील.

मारर अदकि अदुरद काय
(लूका ६:४३-४५)

33 ✨“अगर मार्र वळ्लीद आद, रा अदुर्द काय भी वळ्लीद ईत्तीत, या मार्र नकिम्मा आद, रा अदुर्द काय भी नकिम्मा ईत्तीत; यतकी मार्र तान काय देल अच अर्तकु आगतद. 34 ✨हे हाव ईनव चकिोरा, नीव बुरा आगकु हयांग वळ्लीद मातगोळी अन सकतीर? यतकी जो मन दा तुमकु आद, अदा बाय दा बरतद. 35 वळ्लेव मंळसा तान मन इन वळ्लीद भंडार दा टु वळ्लीद मातगोळी तेगुतान, अदकि बेकार मंळसा बेकार भंडार दा टु बेकार मातगोळी तेगुतान.”

36 “अदकि ना नीम से अनतीन कजिो जो नकिम्मा मातगोळी मंळसागोळ अंदार, न्याय इन दशी आंदुर हर ऊंद आ मात इन लेखा कोट्टार. 37 यतकी नी तान मातगोळ कारण नरिदोष, अदकि तान मातगोळ दा कारण दोषी ठहरूसकु आदया.”

स्वर्गीय चनिह अनूद मांग

(मरकुस ८:११-१२; लूका ११:२९-३२)

38 ✨ईदुर मा थ्वाळासा शास्त्रीगोळ अदकि फरीसीगोळ यीशु से अंदुर, “हे गुरु, नाव नीन कय देल ऊंद चमत्कार नोळोद चाहासतेव.”

39 ✨आव आंदरी उत्तर कोट्टुन, “ई दुनिया अनूद बेकार अदकि व्यभिचारी लॉकुर योना अनूद चमत्कार ढुंढसतार, लेकीन योना भवषियवक्ता अनूद चमत्कार इक बटिकु यातोदु दुसरा चमत्कार आंदरी कोटकु आगतीदील. 40 योना मुर दनि अदकि मुर ईळ्लक आ समुद्र अन धोळ मेन इन व्हाट्या ईत्तुन, हांग अच मंळसा अनूद पार मुर दनि अदकि मुर ईळ्लक धरती इन बुळ्क ईत्तान. 41 नीनवे नगर इन लॉकुर न्याय इन दशी ई दुनिया अनूद लॉकुर सांगुळ यदकु आंदरी दोषी ठहरूस्यार, यतकी आंदुर योना अनूद

✨ 12:33 १२:३३ मत्ती ७:२०; लूका ६:४४ ✨ 12:34 १२:३४ मत्ती ३:७; २३:३३; लूका ३:७; मत्ती १५:१८; लूका ६:४५ ✨ 12:38 १२:३८ मत्ती १६:१; मरकुस ८:११; लूका ११:१६ ✨ 12:39 १२:३९ मत्ती १६:४; मरकुस ८:१२

पूरचार केळकु मन तरिगुसीदुर; अदकि नोळी, ईल आव आन जो योना से भी धोड्डेव आन. ⁴² दक्षणि इन रानी न्याय इन दशिी ई दुनया अनूद लोकर सांगुळ यदकु आंदरी दोषी ठहूरस्यार, यतकी आक सुलैमान उन ग्यान केळोर साटी धरती इन क्वाना टु बंदुर; अदकि नोळी, ईल आव आन जो सुलैमान से भी धोड्डेव आन.

दुष्टआत्मा अन वापसी
(लूका ११:२४-२६)

⁴³ “याग दुष्टआत्मा मंळसा दा टु होट बुळतद, रा वंळगींद जागागोळ दा आराम हुंढसली वयाळतद, अदकि अदरी सकाल. ⁴⁴ आग अनतद, ‘ना तान अदा मान्ना दा यल टु होटोदीन, होटोगाईन.’ अदकि होटकु अदरी सूना, झाळ-झुळसकु अदकि सजुसकु नोळतद. ⁴⁵ आग अद होगकु तान से मात्त बेकार येळ आत्मागोळी तान सांगुळ तरतद, अदकि अव आ मान्या समुसकु अल ईरताव, अदकि आ मंळसा अनूद दशा पयला टु भी बेकार आगेगतद. ई दुनया अन बुरा लोकरद दशा भी हगि अच आदीत.”

यीशु उन मोय अदकि वारटुर
(मरकुस ३:३१-३५; लूका ८:११-२१)

⁴⁶ याग यीशु भीळ से मातगोळी हेळत अच ईरोन, आग आऊन मोय अदकि वारटुर व्हार्या नदिरकु ईरोर अदकि आऊन से मात हेळोद चाहासोर. ⁴⁷ *यावारा आऊन से अंदुन, “नोळ, नीन मोय अदकि नीन वारटुर व्हार्या नदिरकु आर, अदकि नीन से मात हेळोद चाहासतार.”

⁴⁸ ईद केळकु आव अनावाळेर इक उत्तर कोट्टुन, “याक हुळ नान मोय? अदकि यार उर नान वारटुर?” ⁴⁹ अदकि तान चैलागोळ दी तान कय वाळुसकु अंदुन, “नोळी, नान मोय अदकि नान वारटुर इंदुरा उर. ⁵⁰ यतकी जो यावारा नान स्वर्गीय आप्प

* 12:47 १२:४७ हाळोद नयिम दा ईद वचन लखिसकु हैलेच

उन इच्छा मा नळदान, आवा नान वार्ट, अदकि नान आकतींग, अदकि नान मोय हुळ.”

13

बीजा बोऊसावाळा अन्द उदाहरण
(मरकुस ४:१-९; लूका ८:४-८)

1 अदा दशी यीशु मान्या टु होटकु झील इन कनारा मा होगकु कुरतुन. 2 *अदकि आऊन हात्ती हगि धोळ्द भीळ जमा आत का आव इवांगा मा येरेदुन, अदकि सप्पा भीळ कनारा मा नदिरकु ईत्त. 3 अदकि आव आंदुर से उदाहरणगोळ दा हापाळ सा मातगोळी अंदुन:

“ऊंद बोऊसावाळा बीजा बोऊसली होट्टुन. 4 बोऊसा होती थ्वाळासा बीजा हादी इन कनारा मा बदिदव अदकि पक्षीगोळ बंदकु अवरी तनिली कुरतव. 5 येनारा बीजा कल्ल इन जागा मा बदिदव, यल अवरी यक्कुल मुण्ण सकिर्दिल अदकि गहरा मुण्ण ईला सकिदुर कारण अव जल्दी बेळदोदव. 6 पर सुर्य होळदुर मा अव होत्तेदव, अदकि जळ ईला हुळदुर देल वळ्गेदव. 7 थ्वाळासा बीजा मार्र दा बदिदव अदकि मार्रगोळ वाळुसकु अवरी वत्त बुट्टव. 8 पर थ्वाळासा बीजा वळ्लीद जागा मा बदिदव, अदकि काय तनदव, यातारा सौ गुणा, यातारा साठ गुणा, अदकि यातारा तीस गुणा.”

9 यार कवि आव आव केळ कोमुल.

उदाहरणगोळ्द उद्देश
(मरकुस ४:१०-१२; लूका ८:९,१०)

10 चेलागोळ हात्ती बंदकु यीशु से अंदुर, “नी लाँकुर से उदाहरण दा येती मातगोळ माळत्या?”

11 यीशु उत्तर कोट्टुन, “नीमी परमेश्वर उन राज्ज्य अनन्द भेदगोळद समझ कोटकु आग्याद, पर आंदरी ईला. 12 यतकी यार हात्ती आद, आऊक मात्त कोटकु आदीत, अदकि आऊन हात्ती यककुल आगेदीत; पर यार्द हात्ती येनु हैलेच, अदुर से जो येनारा आऊन हात्ती आद, अद भी ताकोमकु आगेदीत. 13 ना आंदुर से उदाहरणगोळ दा इदुरसाटी मातगोळी माळतीन कि आंदुर नोळकु भी नोळालुर अदकि केळकु भी केळालुर, अदकि समसालुर.” 14 आंदुर बारा दा यशायाह अनन्द ईद भवषियवाणी पुरा आगतद:

“नीव कविगोळ देल रा केळतीर, पर समसालीर;
अदकि कण्णगोळ देल रा नोळतीर, पर नीमी काळ्साल.”*

15 “यतकी ई लॉकुरद मन कट्टर आगेग्याद,
अदकि आंदुर केळकु भी अनसुना माळतार
अदकि आंदुर तान कण्णगोळी मुच्च बुळतार;
ईलारा हगि आगबाळुल कि आंदुर कण्णगोळ देल नोळुल,
अदकि कविगोळ देल केळुल
अदकि मन देल समसुल,
अदकि आंदुर तरिगकु बरूल,
अदकि ना आंदरी चंगा माळाईन.”

16 *पर धन्य आव नीमव कण्णगोळ, कि अव नोळताव;
अदकि नीमव कवि अद केळताव. 17 यतकी ना नीम से खरा माताळतीन कि हापाळ सा भवषियवक्तागोळ अदकि न्यायीगोळ याता मातगोळी नोळोद चाहासोर अवरी नीव नोळेतीर. लेकीन आंदुर अवरी नोळ सकदील, अदकि याता मातगोळी आंदुर केळोद चाहासोर, अवरी नीव केळेतीर. लेकीन आंदुर अवरी केळ सकदील.

* 13:12 १३:१२ मत्ती २५:२९; मरकुस ४:२५; लूका ८:१८; १९:२६ * 13:14 १३:१४ यशायाह ६:९-१० * 13:16 १३:१६ लूका १०:२३,२४

बीजा बोऊसावाळा उदाहरण इन व्याख्या
(मरकुस ४:१३-२०; लूका ८:११-१५)

18 “इग नीव बीजा बोऊसावाळा अन्द उदाहरण इन अर्थ केळी. 19 जो यावारा राज्य अन्द वचन केळकु समसालुन, आऊन मन दा जो येनारा बोऊस्कु आगीत, अदरी आ दुष्ट बंदकु कसुकु वोयतान. ईद अदा हुन, जो हादी इन कनिरा मा बोऊस्कु आगीत. 20 अदकि जो कल्ल इन जागा मा बोऊस्कु आत, ईद अद हुन, जो वचन केळकु तुरन्त खुशी इन सांगुळ मान्स कोमतान. 21 पर तांदुर दा जळ ईला ईटदुर कारण आंदुर थ्वाळासा अच दर्नी नोर आर, अदकि याग वचन इन कारण क्लेश या उपद्रव आगतद, रा आंदुर तुरन्त ठोकर तनितार. 22 जो झाळीगोळ दा बोऊस्कु आत, ईद अद हुन, जो वचन इक केळतार, पर ईद दुनया अन चन्ता अदकि धन इन ध्वाका वचन इक वत्त बुळतद, अदकि आंदुर काय तरसकालुर. 23 जो वळ्ळीद जागा दा बोऊस्कु आत, ईद अद हुन, जो वचन इक केळकु समसतार, अदकि काय तरतार; यारारा सौ गुणा, यारारा साठ गुणा, अदकि यारारा तीस गुणा.”

आळी दाकळोद बीजा अन उदाहरण

24 यीशु आंदरी मात्त ऊद उदाहरण कोट्टुन: “स्वर्ग इन राज्य आ मळसा अन्द घाई आद याव तान केई दा वळ्ळीद बीजा बोऊसुदुन. 25 पर याग लॉकुर मगिोर रा आऊन दुश्मन बंदकु गोदी इन न्याड्या आळी दाकळोद बीजा बोऊस्कु होटोदुन. 26 याग कोम होट्टव अदकि लॉम्बागोळ हतदव, रा आळी दाकळोद बीजागोळ्द मार्रगोळ भी काळ्सदव. 27 ईदुर मा मान्ना अन्द दासगोळ बंदकु आऊन से अंदुर, ‘हे स्वामी, येन नी तान केई दा वळ्ळीद बीजा बोऊसीदलि? बाक आळी दाकळोद बीजा अन्द मार्रगोळ अदुरदा यल टु बंदव?’ 28 आव आंदुर से अंदुन, ‘ईद यावारा दुश्मन उन क्याल्सा हुन.’ दासगोळ आऊन

से अंदुर, 'येन नीन इच्छा आद, कि नाव होगकु अवरी कति बुटेव?' ²⁹ आव अंदुन, 'ईला, हगि आगबाळुल कि आळी दाकळोद बीजा अनूद मार्रगोळ कति होती नीव अऊर सांगुळ गोदी भी कति कोमी. ³⁰ कटाई ताका येदु उक ऊंद सांगुळ वाळुसगोळी, अदकि कटनी इन समय दा ना कडावाळेर से अनार्इन कि पयले आळी दाकळोद बीजा अनूद मार्रगोळी जमा माळकु होताकोर साटी अऊर गट्टा कट कोमी, अदकि गोदी इक नान केई दा जमा माळी.' "

राई इन बीजा अनूद उदाहरण

(मरकुस ४:३०-३२; लूका १३:१८,१९)

³¹ यीशु आंदरी मातूत ऊंद उदाहरण कोट्टुन: "स्वर्ग इन राज्य राई इन ऊंद बीजा अन घाई आद, यदरी यातोवारा मंळसा हुडुकु तान केई दा बोऊस कोडुन. ³² अद सप्पा बीजागोळ से स्यांळ्द रा ईरतद लेकीन याग धोळ्द आगेगतद आग सप्पा काण्णा-कस से धोळ्द आगेगतद; अदकि हगि मार्र आगेगतद कि आकाश ईनव पक्षी बंदकु अदुर डगालगोळ मा ग्वादा माळ कोमताव."

खमीर इन उदाहरण

(लूका १३:२०,२१)

³³ यीशु आंदरी मातूत ऊंद उदाहरण केळसदुन: "स्वर्ग इन राज्य खमीर इन घाई आद यदरी यातोदारा आरूत हुडुकु हननेळ कल्लो हीट्ट दा मीलुस बुटुर अदकि आगूत-आगूत अद सप्पा हीट खमीर आगेत."

यीशु उन द्वारा उदाहरणगोळ्द प्रयोग

(मरकुस ४:३३,३४)

³⁴ ईव सप्पा मातगोळ यीशु उदाहरणगोळ दा लॉकुर से अंदुन, अदकि बनिा उदाहरण देल आव आंदुर से येनु ईला अनतोगोन,

35 कजि जो वचन भवषियवक्ता अन्द द्वारा अंदकु आगीत, अद पुरा आगुल:

“ना उदाहरण अनली तान बाय खोलसाईन:

ना आ मातगोळी जो दुनया अन्द उत्पत्ती टु होचकु ईताव प्रगट माळाईन.” ☆

आळी दाकळोद बीजा अन्द उदाहरण इन व्याख्या

36 आग यीशु भीळ इक बटिकु मान्नी बंदुन, अदकि यीशु उन चेलागोळ आऊन हात्ती बंदकु अंदुर, “केई इन आळी दाकळोद बीजा अन्द उदाहरण नामी समझुसबुळ.”

37 यीशु आंदरी उत्तर कोट्टुन, “थाव वळ्लीद बीजा अक बोऊसीदुन आव मंळसा अन्द पार हुन. 38 केई दुनया हुन, वळ्लीद बीजा राज्य अन्द औलाद हुन, अदकि आळी दाकळोद बीजा दुष्ट इन औलाद हुन. 39 या दुश्मन अवरी बोऊसयान आव शैतान हुन; कटनी दुनया अन्द अन्त हुन, अदकि कडावाळेर स्वरगदूत उर. 40 इदुरसाटी ह्यांग आळी दाकळोद कचरा जमा माळकु होताककु आगताव हांग अच दुनया अन्द आखरी दा आदीत. 41 मंळसा अन्द पार तान स्वरगदूतगोळ इक कळ्यान, अदकि आंदुर आऊन राज्य दा टु सप्पा ठोकर इन कारणगोळी अदकि कुकर्म्म माळावाळेरी इक जमा माळ्यार, 42 अदकि आंदरी बेक्की इन कुण्ड दा हाक्यार, यल आंदुर वरल्यार अदकि हल्ल कच्यार. 43 आ समय न्यायी तान आप्प उन राज्य दा सुर्य अन्द घाई चमकुस्यार. यार कवि आव आव केळ कोमुल.”

होचकु खजाना अन्द उदाहरण

44 “स्वर्ग इन राज्य केई दा होचकु धन इन घाई आद, या यावारा मंळसा अक सकित अदकि आव अदरी मात होचकु ईटदुन, अदकि हापाळ खुश आदुन अदकि होगकु तान सब येनारा मार बुट्टुन अदकि आ केई इक कौड कौडुन.”

☆ 13:35 १३:३५ नरिगमन; भजन संहिता ७८:२

अनमोल मोती अनूद उदाहरण

45 “बाक स्वर्ग इन राज्य ऊंद व्यापारी इन घाई आद जो वळ्लीद मोतीगोळ्द खोज दा ईरोन. 46 याग आऊक ऊंद बहुमुल्य मोती सकित रा आव होगकु तान सब कुछ मार बुट्टुन अदकि अदरी कोंड कोंडुन.”

जार इन उदाहरण

47 “बाक स्वर्ग इन राज्य आ धोळ्द जार इन घाई आद जो समुद्र दा हाक्कु आत, अदकि हर प्रकार इन जीवगोळी जमा माळकु तर्त. 48 अदकि याग जार मेनगोळ देल तुम्मेत, रा मेन हुडावाळेर अदरी कनिरा मा जेडुकु तंदुर, अदकि कुर्तकु वळ्लेव-वळ्लेव बर्तनगोळ दा जमा माळदुर अदकि बेकार-बेकार मेनगोळी भीट बुट्टुर. 49 दुनिया अनूद आखरी दा हगि अच आदीत. स्वर्गदूत बंदकु पापीगोळी न्यायी लाँकुर से अलग माळ्यार, 50 अदकि आंदरी बेक्की इन कुण्ड दा हाक्यार. यल आंदुर वरल्यार अदकि हल्ल कच्यार.”

हाळोद अदकि व्हाशोद शक्ति अनूद महत्त्व

51 यीशु तान चेलागोळ से केळदुन, “येन नीव ई सप्पा मातगोळ सम्सदीर?”

चेलागोळ उत्तर कोट्टुर, “हव.”

52 यीशु आंदुर से अंदुन, “इदुरसाटी हर ऊंद शास्त्री जो स्वर्ग इन राज्य अनूद चेला बनस्यान, आव आ माननावाळा अनूद घाई आन जो ताम भंडार दा टु व्हाशोद अदकि हाळोद वस्तुगोळी तेगुतान.”

नासरत दा यीशु उन अनादर

(मरकुस ६:१-६; लूका ४:१६-३०)

53 याग यीशु ई सप्पा उदाहरण अंद कोंडुन, रा अल टु होटोदुन. 54 अदकि तान नगर दा बंदकु आंदुरद यहूदी लाँकुरद सभागृह दा आंदरी हगि उपदेश कोळली कुरतुन की आंदुर चकति

आगकु अनली कुरतुर, “ईऊक ईद ग्यान अदकि सामर्थ्य अनन्द कयाल्सा यल टु सकिदव? 55 येन ईव वहरस हुळली माळावाळा अन पार आलच? अदकि येन ईऊन मोय इन हेसुर मरयिम अदकि ईऊन वार्दुरद हेसुर याकूब, यूसुफ, शमौन अदकि यहूदा हैलेच? 56 अदकि येन ईऊन सप्पा आकतींगेर नाम न्याड्या दा ईरालुर? बाक ईऊक ईद सप्पा ग्यान यल टु सकित?” 57 *ईद प्रकार आंदुर आऊन कारण ठोकर तदुर,

यीशु आंदुर से अंदुन, “भवषियवक्ता अनन्द तान द्याश अदकि तान मान्ना अक बटिकु अदकि यल उच अपमान आगाल.”* 58 अदकि आव अल आंदुरद अवशिवास इन कारण हापाळ सा सामर्थ्य इन कयाल्सा माळीदील.

14

यूहन्ना बपतस्मा कोळावाळा अक कोनसुसोद
(मरकुस ६:१४-२९; लूका ९:७-९)

1 आ समय दा चौथाई द्याश इन राजा हेरोदेस यीशु उन बारा दा चर्चा केळदुन, 2 अदकि तान सेवकगोळ से अंदुन, “ईव यूहन्ना बपतस्मा कोळावाळा हुन! आव सोत्तुर दा टु जत्तिता आग्यान, इदुरसाटी आऊन से सामर्थ्य नव कयाल्सा प्रगट आगताव.”

3 *यतकी हेरोदेस राजा तान वार्ट फलिपिपुस उन हगिस हेरोदयिास इन कारण, बपतस्मा कोळावाळा यूहन्ना अक हुडुकु कटसुसदुन अदकि जयलखाना दा हाक्क बुट्टुन. 4 यतकी यूहन्ना आऊन से अंददिन क्ति तान स्याळद वार्ट उन हगिस उक ईटोद नीन साठी उचति हैलेच. 5 इदुरसाटी आव आऊक कोद बुळोद चाहासोन, पर लॉकुर से अंजतोगोन यतकी आंदुर बपतस्मा कोळावाळा यूहन्ना अक भवषियवक्ता मान्सतोगोर.

* 13:57 १३:५७ यूहन्ना ४:४४ * 13:57 १३:५७ यूहन्ना ४:४४ * 14:3 १४:३ लूका ३:१९,२०

6 लेकीन याग हेरोदेस उन जनम दनि बत्त, रा हेरोदयास इनोर पोर हाब्ब दा तान नाच तोर्सकु हेरोदेस उक खुश माळदुर. 7 ईदुर मा आव करिया तनिकु वचन कोट्टुन, “जो येनारा नी नानी बेळ्या, ना नीनी कोळाईन.”

8 आक तान मोय इन भळकुसदुर देल ईद अंदुर, “यूहन्ना बपतस्मा कोळावाळा अन्द ताल्ला टाटी दा ईटकु ईगल्या नानी ईल तंदकोळ.”

9 राजा दुखी आदुन, लेकीन तान करिया अन, अदकि सांगुळ कुरावाळेर कारण, आग्या कोट्टुन क्जो ई पोर अंदुर अद कोटकु आगुल. 10 अदकि आव जयलखाना दा लॉकुरी कळकु यूहन्ना अन्द ताल्ला कळसुस बुट्टुन; 11 अदकि आऊन ताल्ला टाटी दा तनकु आत अदकि पोर इक कोटकु आत, अदरी आक तान मोय इन हात्ती ओतुर. 12 आग यूहन्ना नोर चेलागोळ बंदुर अदकि आऊन लाश इक ओतकु नळसदुर, अदकि होगकु यीशु उक ईद समाचार कोट्टुर.

अईद हजार मंळसागोळी तनिसोद

(मरकुस ६:३०-४४; लूका ९:१०-१७; यूहन्ना ६:१-१४)

13 याग यीशु यूहन्ना अन बारा दा केळदुन, रा आव ड्वांगा मा येरकु अल टु यातोदारा सुनसान जागा अक, आबना दा होटोदुन. लॉकुर ईद केळकु नगर-नगर टु पैदल अच आऊन हदि आगेदुर. 14 यीशु होटकु ऊंद धोळद भीळ नोळदुन अदकि आंदुर मा तरस तदिन, अदकि आंदुरद बमिर मंळसागोळी चंगा माळदुन.

15 याग द्याव आत रा आऊन चेलागोळ आऊन हात्ती बंदकु अंदुर, “ईद सुनसान जागा आद अदकि समय आगेग्याद; लॉकुरी वदि माळकु अन क् आंदुर मोहल्लागोळ दा होगकु तान साठी ऊमोद कोमूल.”

16 पर यीशु आंदुर से अंदुन, “आंदुरद होगोद जरूरी हैलेच! नीव अच इंदरी तनिली कोळी.”

17 आंदुर आऊन से अंदुर, “ईल नाम हात्ती अईद रोट्टी अदकि येद्व मेनगोळी बटिकु मात्त येनु हैलेच.”

18 यीशु अंदुन, “अवरी नान हात्ती ईल तरी.” 19 आग यीशु लॉकुरी काड्डा मा कुरली हेळदुन, अदकि आ अईद रोट्टीगोळी अदकि येद्व मेनगोळी हुळदुन; अदकि स्वर्ग दी नोळकु धन्यवाद माळदुन अदकि रोट्टीगोळी मुरू मुरूकु चेलागोळी कोट्टुन, अदकि चेलागोळ लॉकुरी कोट्टुर. 20 याग सप्पा लॉकुर तनिकु संतुष्ट आगेदुर, रा चेलागोळ मक्कि तुकळागोळ दा टु तुमकु हननेळ फुट्टीगोळी नेगदुर. 21 अदकि तनिवाळेर आर्तेर अदकि चकिोरगोळी बटिकु, अईद हजार मंळसागोळ हात्तीपास ईरोर.

यीशु उन नीर मा नळोद

(मरकुस ६:४५-५२; यूहन्ना ६:१५-२१)

22 आग आव तुरन्त तान चेलागोळी ड्वांगा मा येरोरसाटी मजबुर माळदुन का आंदुर आऊन से पयला आप्पाटी होटोगुल, आगासताका आव लॉकुरी सार माळ्यान. 23 यीशु लॉकुरी सार माळकु, प्रार्थना माळली अलग पहाळ मा होटोदुन; अदकि द्यावगा आव अल आबना ईरोन. 24 आ समय ड्वांगा कनिरा टु दुर ईरोद अदकि झील इन न्याड्या दा नीर इन लयर देल लयरगोळ देल ईत्त आत्त आलगाळोद, यतकी आँधी ड्वांगा अन्द ऊलट ईरोद.

25 अदकि यीशु हुंजकुका अन मुर टु आर मुरा अन दरम्यान झील मा नळुतेला आंदुर हात्ती बंदुन. 26 चेला आऊक झील मा नळुतेला नोळकु घबरूसेदुर. अदकि अनली कुरतुर, “ईव भूत हुन!” अदकि अंज्क इन मारा देल चल्ळास कुरतुर.

27 आग यीशु तुरन्त आंदुर से मातगोळी माळदुन अदकि अंदुन, “हम्मिमत ईटी! ना हुईन, अंजबाळी!”

28 पतरस आऊक उत्तर कोट्टुन, “हे प्रभु, अगर नीच हुय, रा नानी तान हात्ती नीर मा नळ्ळु कु बरोद आग्या कोळ.”

29 आव अंदुन, “बा!” आग पतरस ड्वांगा मा टुईळ्ळु कु यीशु उन हात्ती होगली नीर मा नळ्ळु ली कुरतुन. 30 पर हवा अक नोळ्ळु कु अंजेदुन, अदकि याग मुळ्ळु कली कुरतुन रा चळ्ळिासकु अंदुन, “हे प्रभु, नानी ऊळ्ळुस!”

31 यीशु तुरन्त कय वाडुस्कु आऊक हुडुकोडुन अदकि आऊन से अंदुन, “हे अल्पवशिवासी, नी येती शंका माळ्ळुद?”

32 याग आंदुर ड्वांगा मा येरदुर, रा हवा रूकसेत. 33 ईदुर मा आंदुर जो ड्वांगा मा ईरोर, आऊक दण्डवत माळ्ळु कु अंदुर, “खराखुरा, नी परमेश्वर उन पार हुय.”

गन्नेसरत दा रोगीगोळी चंगा माळोद
(मरकुस ६:५३-५६)

34 आंदुर आप्पाटी ईळ्ळु कु गन्नेसरत इन भूमी मा पोहचुसदुर. 35 अलेर लॉकुर आऊक अर्त कौडुर अदकि आस-पास इन पुरा प्रदेश दा समाचार कळ्ळुदुर, अदकि सब बमिर मंळसागोळी आऊन हात्ती तंदुर, 36 अदकि आऊन से वनिती माळ्ळु ली कुरतुर क्क आव आंदरी तान कपळा अन्द पल्लाक अच मुट गोळ्ळुल; अदकि यास मुंदुर आऊक मुटदुर, आंदुर चंगा आगेदुर.

15

पुर्वजगोळ्ळुद शक्शा
(मरकुस ७:१-१३)

1 आग यरूशलेम टु थ्वाळासा फरीसी अदकि शास्त्री यीशु उन हात्ती बंदकु अनली कुरतुर, 2 “नीन चेलागोळ पुर्वजगोळ्ळुद परंपरागोळी येती टाल्सतार, क्क बनि कय तोळ्ळु कु रोट्टी तनितार?”

3 यीशु आंदरी उत्तर कोट्टुन, “नीव भी तान परंपरागोळ कारण येती परमेश्वर उन आग्या टाल्सतीर? 4 यतकी परमेश्वर अंदान, ‘तान आप्प अदकि तान मोय इन आदर माळेत,’ अदकि ‘जो यावारा आप्प या मोय इक बुरा भला अंदान, आऊक कोंदकु आदीत.’ 5 लेकीन नीव अनतीर कि अगर यावारा तान आप्प या मोय से अनुल, ‘जो येनारा नीनी नान से लाभ पोहचुस सकोद, अद परमेश्वर उक भेट येर्सकु आगोग्याद,’ 6 रा आव तान आप्प उन आदर माळालुन, ईद प्रकार नीव तान परंपरा अनंद कारण परमेश्वर उन वचन टाल्स बुट्टीर. 7 हे कपटीगोळा, यशायाह नीम बारा दा ईद भवषियवाणी खरा अच माळ्यान.”

8 “ई लॉकुर टुटगोळ देल रा नान आदर माळतार,
लेकीन इंदुर मन नान से दुर ईरतद.

9 अदकि आंदुर बेकार नान उपासना माळतार,
यतकी मंळसागोळ वधीगोळी नयिम शास्त्र बनसकु
कल्सतार.”

अशुध्द माळावाळा मातगोळ
(मरकुस ७:१४-२३)

10 आग यीशु लॉकुरी तान हात्ती कारूकु आंदुर से अंदुन, “केळी, अदकि समसी: 11 जो बाय दा होगतद, अद मंळसा अक अशुध्द माळाल, पर जो बाय टु होळतद, अदा मंळसा अक अशुध्द माळतद.”

12 आग चेलागोळ बंदकु आऊन से अंदुर, “येन नी जान्सत्या कि ईद वचन केळकु फरीसीगोळ्द भावनागोळी ठेस पोहचुस्त?”

13 यीशु उत्तर कोट्टुन, “हर मारर जो नान स्वर्गीय आप्प हचीदलि, कतिकु आदीत. 14 ✨आंदरी होगोळी; आंदुर कुढ्द मारगदर्शक आर अदकि कुढ्द अगर कुढ्द मंळसा अक हादी तोरसुल, रा येढ्दु मुंदुर खॉदरा दा बदिदार.”

15 ईद केळकु पतरस आऊन से अंदुन, “ईद उदाहरण नामी समजुस बुळ.”

16 यीशु अंदुन, “येन नीव भी ईगासताका ना समझ आईर?
17 येन नीव जान्सालीर की जो येनारा बाय दा होगतद अद वहाट्टा दा होगतद, अदकि शरीर टु होट्ट बुळतद? 18 *पर जो येनारा बाय दा टु होळतद, अद मन देल होळतद, अदकि अदा मंळसा अक अशुध्द माळतद. 19 यतकी बुरा वचार, कोननोद, परसूत्रीगमन, व्यभचार, काळलपनी, ख्वाटा गवाही अदकि अपमान मन देल अच होळतद. 20 ईवा हुव जो मंळसा अक अशुध्द माळताव, लेकीन बनिा कय तोळ्द ऊमली कुरोद मंळसा अक अशुध्द माळाल.”

आर्त इन वशिवास (मरकुस ७:२४-३०)

21 यीशु अल टु होटक, सूर अदकि सैदा अन्द प्रदेश दी होटोदुन. 22 आ प्रदेश टु ऊंद कनानी आर्त होट्टुर, अदकि चळिलासकु अनली कुरतुर, “हे प्रभु! दाऊद उन पारा, नान मा दया माळ! नान पोर इक दुष्टआत्मा हापाळ सतुसीत्याद.”

23 पर यीशु आकी येनु उत्तर कोटीदील. आग आऊन चेलागोळ बंदकु आऊन से वनिती माळदुर, “ईकी सार माळ, यतकी आक नाम हदि चलिळासतेला बरेत्यार.”

24 आव उत्तर कोट्टुन, “इस्त्राएल इन घराना अन्द काळ्द म्यांडागोळी बटिकु ना यारदु हात्ती कळुकु आगीदील.”

25 लेकीन आक बंदुर, अदकि यीशु उक प्रणाम माळकु अनली कुरतुर, “हे प्रभु, नान मदत माळ.”

26 आव उत्तर कोट्टुन, “चकिरगोळ्द रोट्टी हळुकु नायगोळ्द मुंद हाक्कोद उचति हैलेच.”

* 15:18 १५:१८ मत्ती १२:३४

27 आक अंदुर, “खरा आद प्रभु, पर नायगोळ भी अद चुराचारा तनिताव, जो अऊरद स्वामीगोळ मेज मा टु बळितद.”

28 ईदुर मा यीशु आकी उत्तर कोट्टुन, “हे आरत, नीन वशिवास धोळ्द आद. ह्यांग नी चाहसत्या, नीन साठी हांगा आगुल.” अदकि आकनि पोर अदा घळी चंगा आगेदुर.

अनेक रोगीगोळी चंगा माळोद

29 यीशु अल टु गलील इन समुद्र अनंद हात्ती बंदुन अदकि पहाळी मा येरकु कुरतोदुन. 30 आग भीळ इन भीळ आऊद हात्ती बत्त. आंदुर तान सांगुळ लंगळागोळी, कुढढगोळी, मुक्कागोळी, डुण्डागोळी अदकि मात्त हापाळ सा मुंदरी आऊन हात्ती तंदुर, अदकि आंदरी आऊन कालगोळ मा हाक्क बुटुर, अदकि आव आंदरी चंगा माळदुन. 31 याग लाँकुर नोळदुर कर्मा मुक्कागोळ माताळतार, अदकि डुण्डागोळ चंगा आगतार, अदकि लंगळागोळ नळुतार, अदकि कुढढ नोळतार रा लाँकुर अचम्भा माळदुर अदकि इस्त्राएल इन परमेश्वर उन बळाई माळदुर.

नाक हजार लाँकुरी तनिसोद (मरकुस ८:१-१०)

32 यीशु तान चेलागोळी हात्ती कारूकु आंदुर से अंदुन, “नानी ई भीळ मा हापाळ दया बरेत्याद, यतकी आंदुर मुर दनि टु नान सांगुळ आर अदकि आंदुर हात्ती येनु तनिली हैलेच. ना आंदरी उपासा सार माळोद चाहसालीन, ईलारा हगि आगबाळुल कर्मा आंदुर हादी मा थक्सकु ईतोगुल.”

33 चेलागोळ आऊन से अंदुर, “नामी ई आळी दा यल टु ईस रोट्टीगोळ सकियाव कनिाव ईट धोळ्द भीळ इक संतुष्ट माळेव?”

34 यीशु आंदुर से केळदुन, “नीम हात्ती यास रोट्टीगोळ आव?” आंदुर अंदुर,

“येळ, अदकि थ्वाळासा स्याणेव मेनगोळ.”

35 आग यीशु लाँकुरी ल्याल्मा कुरोद आग्या कोट्टुन.
36 अदकि आ येळ रोटीगोळी अदकि मेनगोळी हुळदुन,
धन्यवाद माळकु मुरदुन, अदकि तान चेलागोळी कोळतोदुन,
अदकि चेलागोळ लाँकुरी. 37 ईद प्रकार देल सप्पा तनिकु संतुष्ट
आगेदुर अदकि चेलागोळ मगिद तुकळागोळ दा टु येळ फुट्टी
नेगदुर. 38 तनिवाळेर आर्तेर अदकि चिकोरी बटिकु नाक हजार
मंळसा ईरोर.

39 याग आव भीळ इक सार माळकु ड्वांगा मा येरेदुन, अदकि
मगदन प्रदेश दा बंदुन.

16

स्वर्गीय चनिह अनूद मांग

(मरकुस ८:११-१३; लूका १२:५४-५६)

1 ✧ फरीसीगोळ अदकि सदूकीगोळ हात्ती बंदकु यीशु उक
परखुसोर साटी आऊन से अंदुर, “नामी स्वर्ग इन येनारा तरी
चमत्कार इन चनिह तोर्स.”

2 यीशु आंदरी उत्तर कोट्टुन, “द्यावमुळका अक नीव
अनतीर, भौसम वळ्लीद ईत्तीत, यतकी आकाश क्याचांद
आद,’ 3 अदकि व्हातर्या अक अंतीर, ‘ईद आंधी बंदीत, यतकी
आकाश क्याचांद अदकि करीद आद.’ नीव आकाश इन लक्षण
नोळकु हवामान इन अंदाजा हच सकतीर, पर समय इन चनिह
अन अंदाज येती हच सकालीर? 4 ✧ ई युग इन बेकार मंळसा
अदकि व्यभचारी लाँकुर चनिह ढुंढसतार, पर योना अनूद
चमत्कार इन चनिह अक बटिकु आंदरी मात्त यातोदु चनिह
कोटकु आगतीदील.” अदकि यीशु आंदरी बटिकु होटोदुन.

✧ 16:1 १६:१ मत्ती १२:३८; लूका ११:१६ ✧ 16:4 १६:४ मत्ती १२:३९; लूका
११:२९

फरीसीगोळ अदकि सदूकीगोळ्द शक्षिषा अन्द खमीर
(मरकुस ८:१४-२१)

5 चेलागोळ झील इन आप्पाटी पोहचुसदुर, पर आंदुर रोट्टी हुडोद मारतोगीदुर. 6 *यीशु आंदुर से अंदुन, “नोळी, फरीसीगोळ अदकि सदूकीगोळ्द खमीर देल सावधान ईरेतीर.”

7 आंदुर आपस दा मातचीत माळली कुरतुर, “नाव रोट्टी तंददिल अनकु आव हगि अनेत्यान.”

8 ईद जान्सकु, यीशु आंदुर से अंदुन, “हे अल्पवशिवासीगोळा, नीव आपस दा यती वचारि माळतीर कि नाम हात्ती रोट्टी हैलेच? 9 *येन नीव ईगासताका समसीदील? येन नीमी आ अईद हजार इन अईद रोट्टीगोळ याद हैलेच, अदकि ना ईद कि नीव यास फुट्टीगोळ नेगददीर? 10 *अदकि ना आ नाक हजार लॉकुर साटी येळ रोट्टीगोळ, अदकि ना ईद कि नीव यास फुट्टीगोळ नेगददीर? 11 नीव यती समसालीर कि ना नीम से रोट्टीगोळ बारा दा अंददिल, लेकीन ईद कि नीव फरीसीगोळ अदकि सदूकीगोळ खमीर देल सावधान ईरेतीर.”

12 आग आंदुर समझ दा बत्त कि आव रोट्टी इन खमीर देल ईला, पर फरीसीगोळ अदकि सदूकीगोळ्द शक्षिषा देल सावधान ईरली हेळीदुन.

पतरस उन यीशु उक मसीह स्वीकार माळोद
(मरकुस ८:२७-३०; लूका ९:१८-२१)

13 यीशु कैसरिया फलिप्पी इन प्रदेश दा बंदुन, अदकि तान चेलागोळ से केळली कुरतुन, “लॉकुर मळसा अन पार उन बारा दा येन अनतार?”

* 16:6 १६:६ लूका १२:१ * 16:9 १६:९ मत्ती १४:१७-२१ * 16:10 १६:१०
मत्ती १५:३४-३८

14 ✨आंदुर अंदुर, “यारारा यूहन्ना बपतस्मा कोळावाळा अंतार, अदकि यारारा एलयियाह, अदकि यारारा यरिम्याह या भवषियवक्तागोळ दा टु ऊंद यावारा अंतार.”

15 यीशु आंदुर से अंदुन, “लेकीन नीव नानी येन अंतीर?”

16 ✨शमौन पतरस उत्तर कोट्टुन, “नी जत्तिता परमेश्वर उन पार मसीह हुय.”

17 यीशु आऊक उत्तर कोट्टुन, “हे शमौन, योना अन्द पारा, नी धन्य आय; यतकी मास अदकि खुन देल ईला, लेकीन नान आप्प जो स्वर्ग दा आन, ईद मात नीन मा प्रगट माळ्यान.

18 अदकि ना भी नीन से अनतीन कि नी पतरस हुय, अदकि ना ईद कल्ल मा तान मंडली माळाईन, अदकि अधोलोक इन फाटक अदुर मा प्रबल आगतीदील. 19 ✨ना नीनी स्वर्ग इन राज्य इन चाबीगोळ कोळाईन: अदकि जो येनारा नी धरती मा कट्टया, अद स्वर्ग दा कट्टीत; अदकि जो येनारा नी पृथ्वी मा खोलसया, अद स्वर्ग दा खुलसीत.”

20 आग यीशु चेलागोळी चेतावनी कोट्टुन कि यारदु से अनबाळेतीर कि ना मसीह हुईन.

तान सायोद बारा दा यीशु उन भवषियवाणी
(मरकुस ८:३१-३३; लूका ९:२२)

21 आ समय टु यीशु तान चेलागोळी हेळली कुरतुन, “जरूरी आद किना यरूशलेम इक होगार्न अदकि पुरनयिों, अदकि प्रधान याजकगोळ, अदकि शास्त्रीगोळ कय देल हापाळ दुख नेगार्न; अदकि कोंदकु आगार्न; अदकि मुर दनि इन बाददा जत्तिता आगार्न.”

22 इदुर मा पतरस यीशु उक अलग दनकुसकु अंदुन, “हे प्रभु, परमेश्वर माळबाळुल! नीन सांगुळ हगि यागलु आगतीदील.”

✨ 16:14 १६:१४ मत्ती १४:१,२; मरकुस ६:१४,१५; लूका ९:१७,८ ✨ 16:16 १६:१६ यूहन्ना ६:६८,६९ ✨ 16:19 १६:१९ मत्ती १८:१८; यूहन्ना २०:२३

23 यीशु तरिगकु पतरस से अंदुन, “हे शैतान, नान मुंद टु दुर आग! नी नान साटी ठोकर इन कारण आय; यतकी नी परमेश्वर उन मातगोळ मा ईला, लेकीन मंळसा अन मातगोळ मा मन हचत्या.”

यीशु उन हदि नळोद मतलब

(मरकुस ८:३४-९:१; लूका ९:२३-२७)

24 ✨आग यीशु तान चेलागोळ से अंदुन, “अगर यावारा नान हदि बरोद चाहासतान, रा तान तान इन इनकार माळुल अदकि तान क्रूस नेगुल, अदकि नान हदि आगेगुल. 25 ✨यतकी जो यावारा तान जीव ऊळसोद चाहास्यान, आव अदरी खोऊस्यान; अदकि जो यावारा नान साटी तान जीव खोऊस्यान, आव अदरी हासलि माळ्यान. 26 अगर मंळसा पुरा दुनया अक हासलि माळ्यान, अदकि तान जीव इन हानि नेगदान, रा आऊक येन लाभ आदीत? या मंळसा तान जीव इन बदला येन कोट्टान? 27 ✨मंळसा अन पार तान स्वर्गदूतगोळ सांगुळ तान आप्प उन महिमा दा बंदान, अदकि आ समय ‘आ हर ऊंद मंळसा अक आऊन क्याल्सा अन्द अनुसार प्रतफिल कोट्टान.’ 28 ना नीम से खरा माताळतीन की जो इल नदिरकु आर, आंदुर दा टु यारारा हगि आर की आंदुर यागासताका मंळसा अन पार उक आऊन राज्य दा बरूत नोळतीदलि, आगासताका मृत्यु उन स्वाद यागलु नेकतीदलि.”

17

यीशु उन रूप बदलुसोद

(मरकुस ९:२-१३; लूका ९:२८-३६)

1 आर दनि इन बाददा यीशु पतरस अदकि याकूब अदकि आऊन वार्ट यूहन्ना अक सांगुळ हुळदुन, अदकि आंदरी आबना

✨ 16:24 १६:२४ मत्ती १०:३८; लूका १४:२७ ✨ 16:25 १६:२५ मत्ती १०:३९; लूका १७:३३; यूहन्ना १२:२५ ✨ 16:27 १६:२७ मत्ती २५:३१; रोमियो २:६

दा यातोदारा ऊँचा पहाळ मा ओतुन. अदकि आंदुर अलावा अल याऊ ईला ईरोन. ² अल आंदुरद मुंद यीशु उन रूप बदलुसेत, अदकि आऊन बाय सुर्य अनूद घाई चमकुस्त अदकि आऊन कपळा ज्योत इन घाई उजुळ आगेदव. ³ अदकि मूसा अदकि एलयियाह आऊन सांगुळ मातगोळ हेळतेला आंदरी कांळसदुर. ⁴ इदुर मा पतरस यीशु से अंदुन, “हे प्रभु, नाम ईल ईरोद ठीक आद. अगर नीन इच्छा आद रा ना इल मुर हांद्रा माळाईन; ऊंद नीन साटी, ऊंद मूसा अन साटी, अदकि ऊंद एलयियाह अन साटी.”

⁵ ✠✠यीशु माताळतेला अच ईरोन क्‌ईऊंद उजला बादल आंदरी झाक्स बुळत, अदकि आ बादल दा टु ईद शब्द होळत: “ईव नान प्रयि पार हुन, ईऊन से ना खुश आईन: ईऊन केळी.”

⁶ चेलागोळ ईद केळकु बाय इन भार देल बदीदुर अदकि हापाळ अंजेदुर. ⁷ यीशु हात्ती बंदकु आंदरी मुटदुन, अदकि अंदुन, “येळी, अंजबाळी.” ⁸ आग आंदुर तान कण्णगोळ नेगदुर अदकि यीशु उक बटिकु अदकि यारीकु नोळीदील.

⁹ याग आंदुर पहाळी मा टु ईळा होती यीशु आंदरी ईद आग्या कोट्टुन, “यागासताका मंळसा अनूद पार सोत्तुर दा टु जत्तिता आगालुन, आगासताका जो येनारा नीव नोळीर यारीकु हेळबाळेतीर.”

¹⁰ इदुर मा यीशु उन चेलागोळ आऊन से केळदुर, “बाक शास्त्री यती अनतार क्‌ई एलयियाह अनूद पयले बरोद जरूरी आद?”

¹¹ यीशु उत्तर कोट्टुन, “एलयियाह जरूर बंदान, अदकि सप्पा येनारा सुधूरस्यान. ¹² ✠लेकीन ना नीम से अनतीन क्‌ई एलयियाह होटबंदुन, अदकि लाँकुर आऊक अरतीदलि; लेकीन

✠ 17:5 १७:५ मत्ती ३:१७; १२:१८; मरकुस १:११; लूका ३:२२ ✠ 17:5 १७:५ २ पतरस १:१७,१८ ✠ 17:12 १७:१२ मत्ती ११:१४

ह्यांग चाहासदुर हांग अच आऊन सांगुळ माळदुर. ईदा रीतर्त देल मळसा अन्द पार भी आंदुरद कय देल दुख नेगदान.”

13 आग चेलागोळ सम्सदुर कर्त यीशु नाम से यूहन्ना बपतसिमा कोळावाळा अन्द बारा दा अंदुन.

दुष्टआत्माग्रस्त पार उक चंगा माळोद
(मरकुस ९:१४-२९; लूका ९:३७-४३)

14 याग आंदुर भीळ इन हात्ती पोहचुसदुर, रा ऊंद मळसा यीशु उन हात्ती बंदुन, अदकि ट्वांगरा टेक्सकु अनली कुरतुन,
15 “हे प्रभु, नान पार उन मा दया माळ! यतकी आऊक मर्गी बरतद, अदकि आव हापाळ दुख नेगुतान; अदकि घळी-घळी बेक्की दा अदकि घळी-घळी नीर दा बीळतोगतान. 16 ना तान पार उक नीन चेलागोळ हात्ती तंदर्दिन, पर आंदुर आऊक चंगा माळ सकर्दिल.”

17 यीशु अंदुन, “हे अवशिवासी अदकि हठीला लॉकुरगोळा, ना यागासताका नीम सांगुळ ईराइन? यागासताका नीमद सहन माळाईन? आ पार उक ईल नान हात्ती तरी.” 18 आग यीशु दुष्टआत्मा अक आग्या कोट्टुन, अदकि अद आऊन दा टु होट बुळ्त; अदकि पार अदा घळी चंगा आगेदुन.

19 आग चेलागोळ आबना दा यीशु उन हात्ती बंदकु अंदुर, “नाव आ दुष्टआत्मा अक यती तेगु सकर्दिल?”

20 यीशु आंदुर से अंदुन, “तान वशिवास इन कमी इन कारण, यतकी ना नीम से खरा अनतीन, अगर नीमद वशिवास राई इन दाना अन बराबर भी आद, रा ईद पहाळी से अन सककीर, ‘ईल टु सरकुसकु अल होटोग,’ रा अद होटोदीत; अदकि यातोदु मात नीम साटी असंभव ईरतीदील. 21 लेकीन ईव दुष्टआत्मागोळ प्रार्थना अदकि उपास इन अलावा यातोदु उपाय देल होळालव.”*

☆ 17:20 १७:२० मत्ती २१:२१; मरकुस ११:२३; १ कुरन्थि १३:२
ईद वचन दस्तावेज दा सकाल

* 17:21 १७:२१

तान सायोद बारा दा यीशु उन मात्तः भवषियवाणी
(मरकुस ९:३०-३२; लूका ९:४३-४५)

22 याग आंदुर गलील क्षेत्त्र दा ईरोर, रा यीशु आंदुर से अंदुन,
“ना मंळसा अन पार मंळसागोळ्द कय देल हुळसुस्कु आगाईन
अदकि सौप्सकु आगाईन; 23 अदकि आंदुर आऊक कोंद बुट्टार,
अदकि आव तीसरा दशी जत्तिता आदान.” ई मात मा चेलागोळ
हापाळ उदास आदुर.

सभागृह अन कर

24 याग यीशु अदकि आऊन चेलागोळ कफरनहूम दा
पोहचुसदुर, रा सभागृह अन कर ताकोमावाळेर पतरस उन हात्ती
बंदकु केळली कुरतुर, “येन नीम गुरु सभागृह अन कर कोळालुन?”

25 पतरस अंदुन, “हव, कोळतान.”

याग आव मान्या बंदुन, रा यीशु आऊन केळा पयले अच
आऊन से अंदुन, “हे शमौन, नी येन सोचत्या? पृथ्वी इन राजा
महसूल या कर यार से ताकोमतार? तान चकिोर से या परायागोळ
से?”

26 पतरस आऊन से अंदुन, “परायागोळ से.” यीशु आऊन से
अंदुन, “आग अच रा चकिोर कर कोळदुर देल ऊळ्दोदुर. 27 तरी
भी इदुरसाटी का नाव आंदरी ठोकर तनिसतीदील, नी समुद्र
अन्द कनिरा मा होगकु गरी हाक, अदकि जो मेन पयले होट्टीत,
अदरी हुडु; अदुरद बाय तेरदुर मा नीनी ऊंद सकिका सकिकीत,
अदरी का हुडुकु नान अदकि तान कर आंदरी कोटबुळेत.”

18

स्वर्ग इन राज्य दा धोड्डेव याव?

(मरकुस ९:३३-३७; लूका ९:४६-४८)

1*अदा घळी चेलागोळ यीशु उन हात्ती बंदकु केळली कुरतुर,
“स्वर्ग इन राज्य दा धोड्डेव याव आन?”

2 इदुर मा यीशु ऊंद पार उक हात्ती कारूकु आंदुरद न्याड्या दा नीदरूसदुन, 3 *अदकि अंदुन, “ना नीम से खरा अनतीन की यागासताका नीव बदलुसालीर अदकि चकीर घाई बनसालीर, नीव स्वर्ग इन राज्य दा प्रवेश माळ सकालीर. 4 जो यावारा तान तान इक ई पार उन घाई स्याणेव माळ्यान, आव स्वर्ग इन राज्य दा धोड्डेव आदान. 5 अदकि जो यावारा नान हेसुर देल ऊंद हगि पार उक ग्रहण माळतान आव नानी ग्रहण माळतान.

पाप माळोद परीक्षा

(मरकुस ९:४२-४८; लूका १७:१,२)

6 “पर जो यारारा ई स्याणेर दा टु जो नान मा वशिवास माळतार ऊंद मळसा अक ठोकर तनिस्यार, आऊन साटी भला आगाईत की धोळ्द चक्की इन पट्टा आऊन कुतक्या दा लटकुसकु आगाईत, अदकि आऊक खोल समुद्र दा मुळकुसकु आगाईत. 7 ठोकरगोळ्द कारण दुनिया मा हाय! ठोकरगोळ्द हत्तोद जरूरी आद; पर हाय आ मळसा मा यार्द कारण ठोकर हत्तद.

8 *अगर नीन कय या नीन काल नीनी ठोकर तनिस्याव, रा अवरी कळकु भटिबुळ; डुण्डा या लंगळा आगकु जीवन दा प्रवेश माळोद नीन साटी इदुर से वळ्दीद आद की येद्व कय या येद्व काल ईतकु नी अनन्त बेक्की दा हाक्कु आगाईद.

9 *अगर नीनव कण्णगोळ नीनी ठोकर तनिस्याव, रा अवरी तेगुकु भटिबुळ; कुद्व आगकु जीवन दा प्रवेश माळोद नीन साटी इदुर से वळ्दीद आद की येद्व कण्ण ईतकु नी नरक इन बेक्की दा हाक्कु आगाईद.

काळ्द म्यांडागोळ्द उदाहरण

(लूका १५:३-७)

* 18:3 १८:३ मरकुस १०:१५; लूका १८:१७ * 18:8 १८:८ मत्ती ५:३० * 18:9 १८:९ मत्ती ५:२९

10 ✨“नीव ई स्याणेर दा टु यारीकु तुच्छ जान्सबाळेतीर; यतकी ना नीम से अनतीन कर् स्वर्ग दा आंदुर स्वर्गदूत नान स्वर्गीय आप्प उन मार्रा हमेशा नोळतार. 11 यतकी मंळसा अन्द पार काळ्द मंळसागोळी उळसली बंदान.

12 “नीव येन सोचतीर? अगर यावारा मंळसा अन्द सौ म्यांडागोळ आव, अदकि अदुरदा टु ऊंद भटकुसेगुल, रा येन आव ननियानबे अक बटिकु, अदकि पहाळीगोळ मा होगकु, आ भटकुसद म्यांडा अक दुँदुसतीदलि? 13 अदकि अगर हगि आत क् अद आऊक सक्ति, रा ना नीम से खरा माताळतीन क् आव आ ननियानबे म्यांडागोळ साटी जो भटकुसकु ईला ईरव, आट खुश आगतीदील याट क् ई म्यांडा अन्द साटी आदान. 14 हगि अच नीम आप्प उन जो स्वर्ग दा आन ईद इच्छा हैलेच क् ई स्याणेर दा टु ऊंद भी नाश आगुल.

वारटुर अदकि आकतगिरद पाप

15 ✨“अगर नीन वार्ट नीन खलिाप अपराध माळुल, रा होग अदकि आबना दा मातचीत हैळकु आऊक समजुस; अगर आव नीद केळ्यान रा नी तान वार्ट उक हासलि माळ कोंड. 16 अगर आव केळालुन, रा ऊंद या येदुद मुंदरी तान सांगुळ मातत्त वीय, क् ‘हर ऊंद मात येदुद या मुर गवाहगोळ्द बाय देल नश्चिति माळोद आगुल.’ 17 अगर आव आंदुरद भी केळालुन, रा मंडली से अंदकोम, लेकीन अगर आव मंडली अन भी केळालुन रा नी आऊक गैरयहूदी अदकि कर ताकोमावाळेर घाई मान्स कोम.

रोकसोद अदकि मौका कोळोद

18 ✨“ना नीम से खरा माताळतीन, जो येनारा नीव पृथ्वी मा कट्टीर, अद स्वर्ग दा कट्टीत अदकि जो येनारा नीव धरती मा कट्टया, अद स्वर्ग दा खुलसीत. 19 बाक ना नीम से अनतीन,

अगर नीम दा टु येढ्ढ मुंदुर पृथ्वी मा यातोदारा मात इन साटी ऊंद मन आगकु अदरी बेळीर, रा अद नान आप्प उन दी टु जो स्वर्ग दा आन, आंदुरद साटी आगेदीत. 20 यतकी येल् येढ्ढ या मुर मुंदुर नान हेसुर मा जमा आगतार, अल ना आंदुर न्याड्या दा ईरतीन.”

नरिदयी सेवक उन उदाहरण

21 ✨आग पतरस हात्ती बंदकु यीशु से अंदुन, “हे प्रभु, अगर नान वार्ट अपराध माळतेला ईत्तान, रा ना यास अनली आऊक माफ माळाईन? येन येळ घन ताका?”

22 यीशु आऊन से अंदुन, “ना नीन से ईद अनालीन क्क येळ घन ताका लेकीन येळ घन इन सत्तर गुणा ताका.”

23 “इदुरसाटी स्वर्ग इन राज्य आ राजा अन्द घाई आद, याव तान दासगोळ से हिसाब ताकोमोद चाहासदुन. 24 याग आव हिसाब ताकोमली कुरतुन, रा ऊंद मळसा आऊन मुंद तनकु आदुन जो करोळो नव कर्जदार ईरोन. 25 याग आऊन हात्ती पैस्या खणळसली येनु ईला ईरोद, रा आऊन स्वामी अंदुन, ‘ईव अदकि ईऊन हगिस अदकि चकिोर चणिंग अदकि जो येनारा ईऊन आद सप्पा मारकु आगुल, अदकि कर्ज तुमकु आगुल.’ 26 इदुर मा आ दास बदिक् आ स्वामी इक प्रणाम माळदुन, अदकि अंदुन, ‘हे स्वामी धीरज हुडु, ना सब कुछ तुम बुळाईन.’ 27 आग आ दास उन स्वामी तरस तनिकु आऊक बटि बुट्टुन, अदकि आऊन कर्जा भी माफ माळ बुट्टुन.

28 “लेकीन याग आव दास व्हार्या होट्टुन, रा आऊन संगी दासगोळ दा टु ऊंद आऊक सकिदुन जो आऊन सौ दीनार इन कर्जदार ईरोन; आव आऊक हुडुकु आऊन कुतक्या ओतदुन अदकि अंदुन, ‘जो येनारा नीन मा कर्ज आद तुमकोम.’ 29 इदुर मा आऊन संगी दास बदिक् आऊन से वनिती माळली कुरतुन,

‘धीरज हुडु, ना सब तुम बुळार्इन.’ ³⁰ आव मानसदिलि, लेकीन होगकु आऊक बंदीगृह दा हाक बुट्टुन कि यागासताका कर्ज तुम कोमालुन, आगासताका अल्या ईरूल. ³¹ आऊन संगी दास ईद जो आगीत नोळकु हापाळ उदास आदुर, अदकि होगकु तान स्वामी इक पुरा हाल हेळ बुटुर. ³² आग आऊन स्वामी आऊक कारूकु आऊन से अंदुन, ‘हे दुष्ट दास, नी जो नान से वनिती माळद, रा ना नीद अद पुरा कर्ज माफ माळदीन. ³³ इदुरसाटी ह्यांग ना नीन मा दया माळदीन, हांग अच नीनी भी तान संगी दास मा दया ईला माळोद हुन?’ ³⁴ अदकि आऊन स्वामी गुस्सा दा बंदकु आऊक सजा कोळावाळेर्द कय दा सौप्स बुट्टुन, कि यागासताका आव पुरा कर्ज तुम कोमालुन, आगासताका आंदुरदा कय दा ईरूल.

³⁵ “ईदा प्रकार अगर नीम दा टु हर ऊंद तान वार्ट उक मन देल माफ माळ्यान, रा नान आप्प जो स्वर्ग दा आन, नीम से भी हांग अच माळ्यान.”

19

छोळचट्टी इन बारा दा यीशु उन शकिषा
(मरकुस १०:१-१२)

¹ याग यीशु ईव मातगोळ अंद कोंडुन, रा गलील टु होटोदुन; अदकि यरदन गांगा अनूद आप्पाटी यहूदिया अनूद प्रदेश दा बंदुन. ² आग धोळद भीळ यीशु उन हदि आगेत, अदकि आव अल आंदरी चंगा माळदुन.

³ आग फरीसी आऊन परीक्षा माळोर साटी हात्ती बंदकु अनली कुरतुर, “येन यातोदारा भी कारण देल तान हगिंस उक छोळ चट्टी कोळोद उचति आद?”

⁴ यीशु आंदरी उत्तर कोट्टुन, “येन नीव शास्त्र दा वाचुसीदील कि याव आंदरी माळ्यान, आव सूरुवात टु गंळ्स अदकि आर्त इन रूप दा माळदुन, ⁵ अदकि अंदुन, ‘इदुरसाटी

मंळसा तान मोय-आपुप उक बटिकु तान हगिस उन सांगुळ ईत्तान अदकि आंदुर येढ्ढु मुंदुर ऊंद तन आदार.* 6 इदुरसाटी आंदुर ईग येढ्ढु ईला, लेकीन ऊंद तन आर. इदुरसाटी यारीक परमेश्वर जोळस्यान, अदरी यावारा भी मंळसा अलग माळबाळुल.”

7 *आंदुर यीशु से अंदुर, “बाक मूसा ईद यती ठहरूसदुन कि छोळचट्टी कोटकु तान हगिस उक बटि बुळी?”

8 यीशु आंदुर से अंदुन, “मूसा नीम मन इन कठोरता अन्द कारण नीमी तान-तान हगिस उक बटि बुळोद आग्या कोटीदुन, लेकीन सुरूवात टु हगि ईला ईरोद. 9 *अदकि ना नीम से अनतीन, किजो यावारा व्यभचार इक बटिकु अदकि याता कारण देल तान हगिस उक त्यागस्कु दुसरा अन सांगुळ मदा माळुल, रा आव व्यभचार माळतान; अदकि जो आ बटिकु आर्त से मदा माळुल, रा आव भी व्यभचार माळतान.”

10 चेलागोळ यीशु से अंदुर, “अगर गंळ्स उन आर्त इन सांगुळ हगि संबंघ आव, रा मदा माळोद वळ्लीद हैलेच.”

11 यीशु आंदुर से अंदुन, “सब मदा अन बनिा ईर सकालुर, सरिफ आंदुर यारीक ईद दान कोटकु आग्याद. 12 यतकी यारारा नपुंसक हगि आर, जो मोय इन व्हाट्या टु उच हगि पैदा आग्यार; अदकि यारारा नपुंसक हगि आर, यारी लॉकुर नपुंसक माळ्यार; अदकि यारारा हगि आर, यार स्वर्ग इन राज्य अन्द साटी तान तान इक नपुंसक माळ्यार. जो इदरी ग्रहण माळ सकतान, आव ग्रहण माळुल.”

चकिोरगोळी आशरिवाद

(मरकुस १०:१३-१६; लूका १८:१५-१७)

13 आग लॉकुर चकिोर इक यीशु उन हात्ती तंदुर कि आव आंदुर मा कय ईटुल अदकि प्रार्थना माळुल, पर चेलागोळ लॉकुरी

* 19:5 १९:५ उत्पत्त २:२८
मत्ती ५:३२; १ कुरनिथि ७:१०, ११

* 19:7 १९:७ मत्ती ५:३१

* 19:9 १९:९

दनकुसदुर. 14 यीशु अंदुन, “चकिोरी नान हात्ती बरगोळी, अदकि आंदरी मना माळबाळी, यतकी स्वर्ग इन राज्य हगि अच चकिोर्द हुन.”

15 अदकि यीशु आंदुर ताल्ला मा कय ईटकु आंदरी आशषीत माळदुन अदकि अल टु होटोदुन.

धनी मंळसा

(मरकुस १०:१७-३१; लूका १८:१८-३०)

16 ऊंद धनी मंळसा यीशु उन हात्ती बंदुन अदकि आऊन से अंदुन, “हे गुरु, ना यातोद वळ्लीद क्वाल्सा माळाईन कनिनी अनन्त जीवन सकिल?”

17 यीशु आऊन से अंदुन, “नी नान से भलाई इन बारा दा यती केळत्या? भला रा ऊन्दा आद, पर अगर नी जीवन दा प्रवेश माळोद चाहासत्या, रा आग्यागोळी मानसतोग.”

18 आव यीशु से अंदुन, “यातव आग्यागोळ?”

यीशु अंदुन, “ईद कि यारीकारा कोन्न बाळी, व्यभचारि माळबाळी, काळलपनी माळबाळी, ख्वाटा गवाही कोळबाळी, 19 तान आप्प अदकि तान मोय इन आदर माळी, अदकि तान मान्ना हातळोर से तान घाई प्यार ईटी.”

20 आ हारोदव मंळसा आऊन से अंदुन, “ई सब रा ना मानसीन; ईग नान दा याता मात इन कमी आद?”

21 यीशु आऊन से अंदुन, “अगर नी सदिध आगोद चाहसत्या रा होग, तान माल मारकु कंगालगोळी कोळ, अदकि नीनी स्वर्ग दा धन सकिकीत; अदकि बंदकु नान हदि आगोग.”

22 लेकीन आव हारोदव मंळसा ईद मात केळकु उदास आगकु होटोदुन, यतकी आव हापाळ धनी ईरोन.

23 आग यीशु तान चेलागोळ से अंदुन, “ना नीम से खरा अनतीन कि धनवान मंळसा अन स्वर्ग इन राज्य दा प्रवेश माळोद मुश्कलि आद. 24 नीन से मात्त अनतीन कि परमेश्वर

उन राज्य दा धनवान उन प्रवेश माळदुर देल ऊँट इन मुग्ग इन खॉदरा दा टु चुजी होटबुळोद आसान आद.”

25 ईद केळकु चेलागोळ हापाळ चकति आगकु अंदुर, “बाक यार्द उद्धार आग सकतद?”

26 यीशु आंदुर दी नोळकु अंदुन, “मंळसागोळ से रा ईद आगसकाल, लेकीन परमेश्वर से सब कुछ आग सकतद.”

27 इदुर मा पतरस आऊन से अंदुन, “नोळ, नाव रा सप्पा येनारा बटिकु नीन हदि आगीदेव: रा नामी येन सकिकीत?”

28 ✨यीशु आंदुर से अंदुन, ना नीम से खरा अनतीन किव्हाशोद सृष्टी दा याग मंळसा अन्द पार तान महमा अन्द सहिसन मा कुरतान, रा नीव भी जो नान हदि आगेगीर, हन्नेळ सहिसनगोळ मा कुरतकु इसत्राएल इन हन्नेळ वंशगोळद न्याय माळीर.

29 अदकि जो यावारा नान साटी तान मान्नगोळ, या वार्दुर, या आकतीगेर, या आप्प, या मोय, या चकिोर-चणिगेर, या केईगोळी नान हेसुर साटी बटि बुटान, आऊक सौ गुणा सकिकीत, अदकि आव अनन्त जीवन इन अधिकारी आदान. 30 ✨लेकीन हापाळ मुंदुर जो पयला आर, हदिळोर आदार; अदकि जो हदिळोर आर, आंदुर पयला आदार.

20

अंगुर इन बेली इन क्याल्सा माळावाळेरुद उदाहरण

1 “स्वर्ग इन राज्य यातोवारा मान्नावाळा अन घाई आद, जो व्हातर्या होट्टुन कति तांद अंगुर इन बेली दा मजदूरगोळी क्याल्सा मा हचुल. 2 आव मजदूरगोळी प्रती ऊंद मंळसा अक ऊंद दीनार रोजी मा ईटदुन अदकि आंदरी तान अंगुर इन बेली दा कळुदुन. 3 व्हातर्या अक लगभग ऊम्बत मुरा आव व्हातर्या होट्टुन रा दुसरा लॉकुरी सात्ता दा बेकार नदिरुत

✨ 19:28 १९:२८ मत्ती २५:३१; लूका २२:३० ✨ 19:30 १९:३० मत्ती २०:१६; लूका १३:३०

नोळकु, ⁴अदकि आव आंदुर से अंदुन, 'नीव भी अंगुर इन बेली दा होगी, अदकि जो येनारा वळ्लीद आद, नीमी कोळाईन.' अदकि आंदुर भी होटोदुर. ⁵ आग आ लॉकुर भी होटोदुर बाक हन्नेळ मुरा अदकि मुर मुरा अन हात्तीपास आव व्हार्या होटकु हांग अच माळदुन. ⁶ अईद मुरा आव मात्त व्हार्या होटकु दुसरा अक नदिरकु नोळदुन, अदकि आंदुर से अंदुन, 'नीव यती हागुल तीम बेकार नदिरकु ईरतीर?' ⁷ आंदुर आऊन से अंदुर, 'इदुरसाटी क्कियाऊ नामी क्क्यालसा मा हचीदलि.' आव आंदुर से अंदुन, 'नीव भी नान अंगुर इन बेली दा होगी.' ”

⁸ “द्यावमुळका अंगुर इन बेली इन स्वामी तान मुनीम से अंदुन, 'क्क्यालसा माळावाळेर इक कारूकु आखरी मजदूर हात्ती टु पयला मजदूर ताका आंदरी मजदूरी कोटबुळ.' ⁹ कम से कम अईद मुरा जो क्क्यालसा मा हचकु आगीदुर रा आंदरी ऊंद ऊंद दीनार सक्ति. ¹⁰ जो पयले बंदीदुर आंदुर ईद सम्सदुर क्कनामी यक्कुल सक्किती, लेकीन आंदरी भी ऊंद ऊंद दीनार अच सक्ति. ¹¹ याग आंदरी ऊंद दीनार सक्ति रा ईद अनकु केईवाळा मा बळबुळ्सकु अनली कुरतुर, ¹² ई जो बाददा बंदार ईदुर रा ऊंद घंटा अच क्क्यालसा माळदुर, अदकि नी आंदरी भी नाम बराबर रोजी कोट, यार हागुल तीम ओझा नेगदुर अदकि बसिल झेल्सदुर.' ”

¹³ आव आंदुर दा टु ऊंद मळसा अक उत्तर कोट्टुन, “हे संगी, ना नीन सांगुळ येनु अन्याय माळालीन. येन नी नान सांगुळ ऊंद दीनार इन मजदूरी पक्का ईला माळीद? ¹⁴ जो नीद आद, नेगु कोम अदकि होटोग; नान इच्छा ईद आद क्कियाट नीनी कोटीन आट अच ई हदिळावाळा अक भी कोळाईन. ¹⁵ येन ईद उचति हैलेच क्कना तान माल से जो चाहसाईन अद माळाईन? येन नान भला ईरोद नीन कण्णगोळी नळतद? ¹⁶ ✨ई प्रकार देल जो हदिळोर आर, आंदुर पयले आदार; अदकि जो पयले आर, आंदुर

हदिळोर आदार.”

तान सायोद बारा दा यीशु उन तीसरा भवषियवाणी
(मरकुस १०:३२-३४; लूका १८:३१-३४)

17 यीशु यरूशलेम इक होगोहोती हन्नेळ चेलागोळी आबना दा ओतुन, अदकि हादी मा आंदुर से अनली कुरतुन, 18 “नोळी, नाव यरूशलेम इक होगीतेव; अदकि मंळसा अन पार प्रधान याजकगोळ अदकि शास्त्रीगोळ्द कय दा हुळसुस्कु आदान, अदकि आंदुर आऊक मृत्यु इन लायक ठहरूस्यार. 19 अदकि आंदुर आऊक गैरयहूदीगोळ कय दा सोपस्यार कि आंदुर आऊन मज्याक हारसुल, अदकि क्वाळा बडुल, अदकि कूस मा येरसुल, अदकि आव तसिरा दनि जतिता आदान.”

ऊंद मोय इन वनिती
(मरकुस १०:३५-४५)

20 आग जबदी इन पारगोळ्द मोय, तान पारगोळ सांगुळ यीशु उन हात्ती बंदकु प्रणाम माळदुर, अदकि आऊन से येनारा तरी बेळली कुरतुर.

21 यीशु आकनि से अंदुन, “नी येन चाहासत्या?”

आक आऊन से माताळदुर, “ईद वचन कोळ कि नानोर ई येदूढ चकिोर नीन राज्य दा ऊंद नीन ऊमा कय अदकि ऊंद नीन डाक्या कय दी कुरतार.”

22 यीशु उत्तर कोट्टुन, “नीव जान्सालीर कि येन बेळेतीर. येन नीव अद प्याला कुडू सकतीर यदरी ना कुडोर मा आईन?”

आंदुर आऊन से अंदुर, “कुडू सकतेव.”

23 आव आंदुर से अंदुन, “नीव नान प्याला रा कुळदीर, पर तान ऊमा कय अदकि डाक्या कय दी यारीकारा कुरसोद नान क्याल्सा आलच, लेकीन यार्द साटी नान आप्प उन दी टु तयार माळकु आग्याद, आंदुर दा साटी हुन.”

24 ईद केळकु हत्त चेलागोळ आ येढ्ढु वार्दुर मा नाराज आदुर. 25 *यीशु आंदरी हात्ती कारूकु अंदुन, “नीव जानसतीर कि गैरयहूदीगोळ हाकमि आंदुर मा वशिवास माळतार; अदकि जो धोड्डेर आर, आ लॉकुर आंदुर मा अधिकार जतुसतार. 26 *लेकीन नीम दा हगि आगतीदील; लेकीन जो यावारा नीम दा धोड्डेव आगोद चाहासयान, आव नीम सेवक आगुल; 27 अदकि जो नीम दा प्रधान आगोद चाहासतान, आव नीम दास आगुल; 28 ह्यांग कि मंळसा अन पार; ना इदुरसाटी बंददील कि आऊन स्यावा माळकु आगुल, लेकीन इदुरसाटी बंदान कि खुद स्यावा टहल माळ सकुल, अदकि हापाळ लॉकुरद छुटकारा साटी तान जीव कोळ सकुल.”

येढ्ढु कुढ्ढुगोळी दृष्टीदान

(मरकुस १०:४६-५२; लूका १८:३५-४३)

29 याग यीशु अदकि आऊन चेलागोळ यरीहो नगर टु होळोर, रा ऊंद धोळ्द भीळ आऊन हदि आगेत. 30 अदकि येढ्ढु कुढ्ढुगोळ, जो हादी इन कनिरा मा कुरतकु ईरोर, ईद केळकु कि यीशु होगेतयान, हेसुर ताकोमकु अनली कुरतुर, “हे प्रभु, दाऊद उन औलाद, नाम मा दया माळ.”

31 लॉकुर आंदरी दनकुसदुर कि सुंगा ईरूल; पर आंदुर मात्त जोर देल चळिलासकु अंदुर, “हे प्रभु, दाऊद उन औलाद, नाम मा दया माळ.”

32 आग यीशु नदुरिकु, आंदरी कारदुन अदकि अंदुन, “नीव येन चाहासतीर कि ना नीम साटी माळाईन?”

33 आंदुर यीशु उक अंदुर, “हे प्रभु, ईद किनाव कण्णगोळ देल नोळ सक्केव.”

34 यीशु दया माळकु आंदुर कण्णगोळी मुटदुन, अदकि आंदुर तुरन्त नोळली कुरतुर, अदकि आऊन हदि आगेदुर.

* 20:25 २०:२५ लूका २२:२५,२६ * 20:26 २०:२६ मत्ती २३:११; मरकुस ९:३५; लूका २२:२६

21

यरूशलेम दा वजिय प्रवेश

(मरकुस ११:१-११; लूका १९:२८-४०; यूहनना १२:१२-१९)

1 याग आंदुर यरूशलेम इन हात्ती पोहचुसदुर अदकि जैतून पहाळ मा बैतफगे नगर इन हात्ती बंदुर, रा यीशु येढढ चेलागोळी ईद अनकु कळुदुन, 2 “मुंदळोद ऊर दा होगी. अल होगतेला ऊंद गधा कटक, अदकि अदुर सांगुळ पाड्डा नीमी सकिकीत. अवरी खोल्सकु नान हात्ती तरी. 3 अगर नीम से यावारा येनारा अनुल, रा अनेतीर की प्रभु अक ईऊरुद जरवत आद, आग आव तुरन्त अवरी कळु बुट्टान.” 4 ईद इदुरसाटी आत कजिो वचन भवषियवक्ता अन्द द्वारा अनकु आगीत, अद पुरा आगुल:

5 “सयियोन इन पोर इन से अनी,

‘नोळ, नीन राजा नीन हात्ती बरेत्यान;

आव नमूर आन, अदकि गधा मा कुरतकु आन;

मतलब गधा इन पाड्डा मा.’”✧

6 चेलागोळ होगकु, ह्यांग यीशु आंदरी अंददिन, हांग अच माळदुर. 7 अदकि गधा अदकि अदुरद पाड्डा अक तनकु, अऊर मा तान कपळा हाकदुर, अदकि आव आ पाड्डा मा कुरतुन. 8 आग हापाळ सा लाँकुर तान कपळा हादी मा हासदुर, अदकि दुसरा लाँकुर माररगोळ्द डगाली कडुकु हादी मा हासदुर. 9 जो भीळ मुंद-मुंद होगतोगोद अदकि हदि-हदि बरतोगोद, कारू-कारूकु अनतोगोर, “दाऊद उन औलाद उक सतुतति, धन्य आन आव जो प्रभु उन हेसुर देल बरतान, दाऊद उन औलाद उन सतुतति आगुल.”

10 याग यीशु यरूशलेम दा प्रवेश माळदुन, रा पुरा नगर दा हलचल मचुसेत, अदकि लाँकुर अनली कुरतुर, “ईव याव हुन?”

11 लाँकुर अंदुर, “ईव गलील इन नासरत उन भवषियवक्ता यीशु हुन.”

✧ 21:5 २१:५ जकर्याह ९:९

मंदरि इन शुद्धीकरण

(मरकुस ११:१५-१९; लूका १९:४५-४८; यूहन्ना २:१३-२२)

12 यीशु परमेश्वर उन मंदरि दा होगकु आ सप्पा मुंदरी, जो मंदरि दा लेन-देन माळोर, तेग्द बुट्टुन, अदकि सर्राफागोळ्द पांळ्सीगोळ अदकि कबूतर मारावाळेर्द चौकगिोळ उलटुस बुट्टुन; 13 अदकि आंदुर से अंदुन, “शास्त्र दा लखिसकु आद, ‘नान मान्ना प्रार्थना अन्द मान्ना कहलुसीत,’ लेकीन नीव अदरी डाकूगोळ्द हड्डा माळतीर.”✧

14 आग कुदढ अदकि लंगळागोळ, मंदरि दा आऊन हात्ती बंदुर, अदकि आव आंदरी चंगा माळदुन. 15 लेकीन याग प्रधान याजकगोळ अदकि शास्त्रीगोळ ई अदभुत क्याल्सागोळी, जो आव माळदुन, अदकि चकिोर इक मंदरि दा “दाऊद उन औलाद उक स्तुर्ता” अनतेला नोळदुर, रा आंदुर गुस्सा आदुर, 16 अदकि आऊन से अनली कुरतुर, “सयेन नी कळत्या कर् इंदुर येन अंतर?”

यीशु आंदुर से अंदुन, “हव; येन नीव ईद यागलु वाचुसीदील: चकिोर अदकि हाल कुडुत चगिद उर बाय देल अपार स्तुर्ता माळसुसद?”

17 आग यीशु आंदरी बटिकु नगर इन व्हार्या बैतनयियाह अक होदुन अदकि अल आव ईळ्लक बतिसदुन.

यीशु द्वारा श्रापति अंजीर इन मार्र

(मरकुस ११:१२-१४; ११:२०-२४)

18 व्हातर्या का याग यीशु नगर इक वापस बरोन रा आऊक हसु हत्त. 19 हादी इन कनिरा अंजीर इन ऊंद मार्र नोळकु यीशु अदुर हात्ती होदुन, अदकि याल्ला अक बटिकु अद मार्र मा मात्त येनु ईला ईरोद आव आ मार्र इक अंदुन, “ईग टु नीन

✧ 21:13 २१:१३ यशायाह ५६:७; यर्मियाह ७:११

दा बाक यागलु काय हततर्दिल.” अदकि अंजीर इन मार्र तुरन्त वंळगेत.

20 ईद नोळकु चेलागोळी अचम्भा आत अदकि आंदुर अंदुर, “ईद अंजीर इन मार्र तुरन्त ह्यांग वंळगेत?”

21 यीशु आंदरी उत्तर कोट्टुन, “ना नीम से खरा अंतीन, अगर नीव वशिवास ईटी अदकि संदेह माळबाळी, रान सरिफ ईद माळेतीर जो ईद पहाळी इक भी अंदीर, ‘कतितेग, अदकि समुद्र दा होगकु बळि,’ रा ईद आगेदीत. 22 अदकि जो येनारा नीव प्रार्थना दा वशिवास देल बेळतीर अद सब नीमी सकिकीत.”

यीशु उन अधिकार मा प्रश्न
(मरकुस ११:२७-३३; लूका २०:१-८)

23 यीशु मंदिर दा मात्त होगकु उपदेश कोळली कुरतुन, रा प्रधान याजकगोळ अदकि लाकुरद पुरनयागोळ आऊन हात्ती बंदकु केळदुर, “नी ईद क्याल्सा यार्द अधिकार देल माळत्या? अदकि नीनी ईद अधिकार याव कोटान?”

24 यीशु आंदरी उत्तर कोट्टुन, “ना भी नीम से ऊंद मात केळतीन; अगर अद नानी हेळेतीर, रा ना भी नीमी हेळाईन कि ईव क्याल्सा यातोद अधिकार देल माळतीन. 25 यूहन्ना अन्द बपतस्मा यल टु ईरोद? स्वर्ग दी टु या मंळसागोळ दी टु?”

आग आंदुर आपस दा मातगोळ माळली कुरतुर, “अगर नाव अंदेव ‘स्वर्ग दी टु,’ रा आव नाम से अंदान, ‘बाक नीव आऊन वशिवास यती माळीदलि?” 26 अदकि अगर अंदेव ‘मंळसागोळ दी टु,’ रा नामी भीळ इन अंज्क आद, यतकी आंदुर सप्पा यूहन्ना अक भवषियवक्ता मानसतार.” 27 इदुरसाटी आंदुर यीशु उक उत्तर कोट्टुर, “नाव अरालेव.”

आव भी आंदुर से अंदुन, “रा ना भी नीमी हेळालीन कि ई क्याल्सा ना याता अधिकार देल माळतीन.

येढ्ढ पारगोळ्द उदाहरण

28 “नीव येन सोचेतीर? यावारा मंळसा अन येढ्ढ पारगोळ् ईरोर; आव पयला पार उन हात्ती होगकु अंदुन, ‘हे पारा, ईद अंगुर इन बेली दा क्याल्सा माळ.’ 29 आव उत्तर कोट्टुन, ‘ना होग सकालीन,’ लेकीन बाद्दा पसतास्कु होदुन. 30 बाक आप्प दुसरा पार उन हात्ती होगकु हगि अच अंदुन, आव उत्तर कोट्टुन, ‘हव जी होगतीन,’ लेकीन होगीदलि. 31 इंदुर येढ्ढु दा टु यार तान आप्प उन इच्छा पुरा माळदुर?”

आंदुर अंदुर, “पयला पार.”

यीशु आंदुर से अंदुन, “ना नीम से खरा अनतीन कि कर ताकोमावाळेर अदकि वेश्या नीम से पयले परमेश्वर उन राज्य दा प्रवेश माळतार. 32 *यतकी यूहन्ना न्यायीपन इन हादी दर्शुसतेला नीम हात्ती बंदुन, अदकि नीव आऊन वशिवास माळीदील; पर कर ताकोमावाळेर अदकि वेश्यागोळ आऊन वशिवास माळदुर: अदकि नीव ईद नोळदीर, लेकीन नीव पश्चाताप माळीदील अदकि आऊन मा वशिवास माळीदील.”

दुष्ट कसानगोळ्द उदाहरण

(मरकुस १२:१-१२; लूका २०:९-१९)

33 “मात्त ऊंद उदाहरण केळी: ऊंद केई इन मालकि ईरोन, आव अंगुर इन बेली हचीदुन, अदुर्द नाकु दी भाळा कटदुन, अदुर्दा रास्सा अन्द कुंड अगुळदुन अदकि मचान माळदुन, अदकि कसानगोळी अदुर्द ट्याका कोटकु परदेश होटोदुन. 34 याग काय इन समय हात्ती बत्त, रा आव तान दासगोळी अदुर्द काय तरोरसाटी कसानगोळ हात्ती कळुदुन. 35 पर कसानगोळ आऊन दासगोळी हुडुकु, यारीकारा रा बळदुर, अदकि यारीकारा कोंद बुदुर, अदकि तसिरा अक कल्लगोळ बळदुर. 36 बाक आव पयले टु यक्कुल अदकि दासगोळी

☆ 21:32 २१:३२ लूका ३:१२; ७:२९,३०

कळुदुन, अदकि आंदुर आ दासगोळ सांगुळ भी हांग अच माळदुर. 37 आखरी दा आव तान पार उक आंदुर हात्ती ईद सोचकु कळुदुन कि आंदुर नान पार उन आदर माळ्यार. 38 लेकीन कसिानगोळ पार उक नोळकु आपस दा अंदुर, 'ईव रा वारीस हुन, बरी, ईऊक कोंद बुळाता अदकि ईऊन धन संपत्ती हुडु कोमाता.' 39 इदुरसाटी आंदुर आऊक हुळदुर अदकि अंगुर इन बेली टु व्हार्या तेगुकु कोंद बुटुर. 40 इदुरसाटी याग अंगुर इन बेली इन मालकि बंदान, रा आ कसिानगोळ सांगुळ येन माळयान?"

41 आंदुर आऊन से अंदुर, "आव आ बुरा लॉकुरी बुरा रीतवि देल नाश माळयान; अदकि अंगुर इन बेली इन ट्याका दुसरा कसिानगोळी कोट्टान, जो उचित समय मा काय तनकु कोट्टार."

42 यीशु आंदुर से अंदुन, "येन नीव यागलु पवतिरशास्त्र दा ईद वाचुसीदील: 'याता कल्ल इक राजमस्त्रिगोळ बेकार ठहरसेदुर, अदा कोना अन्द सरिा अन्द कल्ल आगेत? ईद प्रभु उन दी टु आगीत, अदकि नाम नजर दा अदभुत आद.' 43 इदुरसाटी ना नीम से अनतीन कि परमेश्वर उन राज्य नीम से ताकोमकु आदीत अदकि हगि लॉकुरी कोटकु आदीत जो ईदुर प्रतफिल तरतार. 44 जो ईद कल्ल मा बदिदान आव चकनाचुर आगेदान; अदकि यदुर मा अद बदिदीत, अदरी पीसुस बुट्टीत."

45 प्रधान याजक अदकि फरीसी यीशु उन उदाहरणगोळी केळकु समसेदुर कि आव आंदुर बारा दा अनतान. 46 अदकि आंदुर आऊक हुडोद चाहासोर, लेकीन लॉकुर से अंजेदुर यतकी आंदुर आऊक भवषियवक्ता मानसतोगोर.

22

मदा अन भोजन इन उदाहरण
(लूका १४:१५-२४)

- 1 यीशु मात्त आंदुर से उदाहरणगोळ दा अनली कुरतुन,
- 2 "स्वर्ग इन राज्य आ राजा अन घाई आद, जो तान पार उन

मदा अन भोजन कोट्टुन. ³अदकि आव तान दासगोळी ईद अनकु कळुदुन की आमन्त्रति लॉकुरी मदा दा ऊमली कारी; लेकीन आंदुर बरोद चाहासीदलि. ⁴बाक आव मात्त दासगोळी ईद अनकु कळुदुन, 'आमन्त्रति लॉकुरी अनेतीर: नोळी ना ऊमोद तयार माळ कोंडीन, नान वस्ता अदकि नानव पालसदव जनावर कडुकु आदव, अदकि सब कुछ तयार आद; मदा अन्द भोज दा बरी.' ⁵लेकीन आंदुर ध्यान कोटीदील अदकि तान हादी इक होटोदुर: यावारा तान केई दा रा यावारा तान व्यापार इक. ⁶दुसरा लॉकुर जो मक्कि ईरोर आऊन दासगोळी हुडुकु आंदुरद अपमान माळदुर अदकि आंदरी कोंद बुटुर. ⁷आग राजा अक सट्टि बत्त, अदकि आव तान सेना अक कळुकु आ कोन्नावाळेरद नाश माळदुन, अदकि आंदुरद नगर इक होताक बुट्टुन."

⁸"आग आव तान दासगोळ से अंदुन, 'मदा अन्द भोज रा तयार आद लेकीन नमिन्त्रति लॉकुर आ लायक ईला ईरोर. ⁹इदुरसाटी हादी इन कनिरा मा होगी अदकि यास लॉकुर नीमी सकियार, सप्पा लॉकुरी मदा अन्द भोजन दा कारूकु तरी.' ¹⁰इदुरसाटी आ दासगोळ हादी इन कनिरा मा होगकु जो भी वळ्लेर या बेकार लॉकुर आंदरी सकिदुर जमा माळदुर; अदकि मदा अन्द मान्ना पावनागोळ देल तुम्मेत."

¹¹"याग राजा पाऊनागोळी नोळली बंदुन, रा आव अल ऊंद मंळसा अक नोळदुन, जो मदा अन्द कपळा हाक्कु ईला ईरोन. ¹²राजा आऊन से केळदुन, 'हे संगी; नी मदा अन्द कपळा हाग्द बनि इल यती बंद्या?' आऊन बाय बंद आगेत. ¹³☆आग राजा नवकरगोळ से अंदुन, 'ईऊन कय-काल कटकु ईऊक व्हार्या अंधार दा हाक बुळी, अल वोरलोद अदकि हल्ल कचचोद आदीत.' ¹⁴यतकी कारदोर रा हापाळ आर लेकीन नीवळुसदोर थ्वाळासा अच आर."

☆ 22:13 २२:१३ मत्ती ८:१२; २५:३०; लूका १३:२८

कर कोळोद बारा दा प्रश्न
(मरकुस १२:१३-१७; लूका २०:२०-२६)

15 आग फरीसीगोळ होगकु आपस दा वचिार माळदुर कि यीशु उक याता प्रकार देल मातगोळ दा फसुसेव. 16 इदुरसाटी आंदुर तान चेलागोळी हेरोदिया अन सांगुळ आऊन हात्ती ईद अनली कळुदुर, “हे गुरु, नाव जान्सतेव कि नी खरा आय, अदकि परमेश्वर उन हादी सच्चाई देल कल्सत्या, अदकि यारदु परवा माळाल, यतकि नी मळसागोळद मार्रा नोळकु मातगोळ माळाल. 17 इदुरसाटी नामी हेळ नी येन सोचत्या? रोमी सरकार उक कर कोळोद उचति आद कि हैलेच.”

18 यीशु आंदुरद कपट पन नोळकु अंदुन, “हे कपटीगोळा, नानी येती परखुसेतीर? 19 नानी अद ऊंद दीनार तोर्स, यदुर देल कर कोटकु आगतद.”

आग आंदुर आऊन हात्ती ऊंद चाँदी इन सकिका तंदुर. 20 आव आंदुर से केळदुन, “ईद छाप अदकि हेसुर यारद हुन?”

21 आंदुर यीशु से अंदुर, “कैसर सरकार उन हुन.” आग आव आंदुर से अंदुन, “जो कैसर सरकार उन हुन, अद कैसर सरकार उक; अदकि जो परमेश्वर उन हुन, अद परमेश्वर उक कोळी.”

22 ईद केळकु आंदुर अचम्भति आदुर, अदकि आऊक बटिकु होटोदुर.

पुनरूत्थान इन बारा दा प्रश्न
(मरकुस १२:१३-१७; लूका २०:२०-२६)

23 अदा दनि सदूकी जो पुनरूत्थान इक मान्सालुर, यीशु उन हात्ती बंदुर अदकि आऊन से केळदुर, 24 “हे गुरु, मूसा अंददिन कि अगर यावारा मळसा बनि औलाद सोतोदान, रा आऊन वार्ट आऊन हगिंस उन सांगुळ मदा माळकु तान वार्ट उन साटी औलाद पैदा माळ्यान. 25 ईग नाम मान्या येळ वार्टुर ईरोर;

पयला मदा माळकु सोतोदुन, अदकि औलाद ईला आगदुर कारण तान रांड्या हगिस् उक तांद वार्ट उन साटी बट्टि बुटुन. 26 ईदा प्रकार देल दुसरा अदकि तसिरा भी माळदुन, अदकि येळु वार्टुर ताका हगि अच आत. 27 आखरी दा सप्पा मुंदुरद बाददा आ आर्त भी सोतोदुर. 28 इदुरसाटी जत्तिता आगदुर मा आ आर्त येळु दा टु यारोर हगिस् आदार? यतकी आक सप्पा मुंदुरद हगिस् आगदुर.”

29 यीशु आंदरी उत्तर कोट्टुन, “नीव पवतिरशास्त्र अदकि परमेश्वर उन महमा जान्सालीर; ई कारण नीव भूल दा बदिक्कु आईर. 30 यतकी जत्तिता आगदुर मा आंदुर न मदा माळ्यार अदकि न मदा दा कोटकु आदार लेकीन स्वरग दा परमेश्वर उन स्वरगदूतगोळ घाई आदार. 31 लेकीन सोत्त मंळसा अनूद जत्तिता आगोद बारा दा येन नीव ईद वचन वाचुसीदील जो परमेश्वर नीम से अंदुन: 32 ‘ना अब्राहम उन परमेश्वर, अदकि इसहाक उन परमेश्वर, अदकि याकूब उन परमेश्वर हुईन?’ आव सोत्त मंळसा नव आलच? लेकीन जत्तिता लाँकुरद परमेश्वर हुन.”☆

33 ईद केळकु लाँकुर आऊंद उपदेश देल चकति आदुर.

सब से धोळ्द आग्या

(मरकुस १२:२८-३४; लूका १०:२५-२८)

34 याग फरीसीगोळ केळदुर क् यीशु सद्कीगोळ्द बाय बंद माळ बुट्टुन, रा आंदुर जमा आदुर. 35 आंदुर दा टु ऊंद यहूदी व्यवस्था अन शक्षिक यीशु उक परखुसोर साटी आऊक केळदुन, 36 “हे गुरु, व्यवस्था दा यातोद आग्या सब से धोळ्द आद?”

37 यीशु आऊन से अंदुन, “नीव परमेश्वर तान प्रभु से तान पुरा मन अदकि तान पुरा जीव अदकि तान पुरा बुद्धी इन सांगुळ प्यार ईट. 38 सब से धोळ्द अदकि मुख्य आग्या रा ईदा हुन. 39 अदकि

अदुर्दा घाई ईद दुसरा आग्या भी आद की नी तान मान्ना हातळोर से तान घाई प्यार ईट. 40 *ईवा येदद आग्यागोळ पुरा व्यवस्था अदकि भवषियवक्तागोळ्द आधार आद.”

मसीह यार पार हुन?

(मरकुस १२:३५-३७; लूका २०:४१-४४)

41 याग फरीसी लॉकुर जमा ईरोर, रा यीशु आंदुर से केळदुन,

42 “मसीह अन्द बारा दा नीव येन सोचतीर? आव यार औलाद हुन?”

आंदुर यीशु उक अंदुर, “दाऊद ईनव.”

43 यीशु आंदुर से केळदुन, रा दाऊद आत्मा दा ईत्तकु आऊक प्रभु यती अनतान?

44 “प्रभु, नान प्रभु से अंदुन,

नान ऊम्मा कय दी कुर,

यागासताका की नाव नीद दुश्मनगोळी नीद काल इन ल्यालमा तंदकोमालेव.”*

45 “याग दाऊद आऊक प्रभु अनतान, रा आव आऊन पार ह्यांग आदान?” 46 इदुर्द उत्तर दा याऊ भी ऊंद मात अन सकदील. आ दनि टु यारीकु बाक आऊन से येनु केळोद हमिमत आगीदील.

23

शास्त्रीगोळ अदकि फरीसीगोळ देल सावधान ईरी

(मरकुस १२:३८-३९; लूका ११:४३-४६; २०:४५-४६)

1 आग यीशु भीळ से अदकि तान चेलागोळ से अंदुन, 2 “न्याय कल्सावाळेर शास्त्री अदकि फरीसी मूसा अन्द गद्दी मा कुर्तकु आर; 3 इदुरसाटी आंदुर नीम से जो येनारा अंदार अद माळेतीर अदकि मान्सेतीर, लेकीन आंदुर घाई क्याल्सा

* 22:40 २२:४० लूका १०:२५-२८

* 22:44 २२:४४ भजन संहिता ११०:१

माळबाळेतीर; यतकी आंदुर अंतर पर माळालुर. 4 आंदुर ऊंद भारी ओझा अक यदरी नेगोद मुशकलि आद, कटकु अदरी मंळसागोळ्द खांदा मा ईटतार; लेकीन खुद अदरी तान बेळ्ल देल सरकुसोद चाहासालुर. 5 *आंदुर तान सप्पा क्याल्सा लॉकुरी तोरसोर साटी माळतार” आंदुर तान ताबीजगोळी चौळा माळतार अदकि तान कपळा अन्द झालर ऊदान माळतार ताकी लॉकुर आंदरी न्यायात्मा समसुल. 6 आंदुर हाबबगोळ दा मुख्य-मुख्य जागा हासलि माळोद चाहासतार, सभागोळ दा मुख्य-मुख्य आसनगोळ मा कुरोद चाहासतार. 7 सात्तागोळ दा आदर सत्कार चाहसोद, अदकि मंळसागोळ दा गुरु अंदकु आगोद आंदरी वळ्लीद हततद. 8 लेकीन नीव गुरु अनबाळेतीर, यतकी नीमव ऊंदा गुरु आन, अदकि नीव सप्पा वार्दुर हुईर.

9 पृथ्वी मा यारीकु आप्प अनबाळेतीर, यतकी नीमव ऊंदा आप्प आन, जो स्वरग दा आन. 10 अदकि स्वामी भी अनबाळेतीर, यतकी नीमव ऊंदा स्वामी आन, मतलब मसीह. 11 *जो नीम दा धोड्डेव आगव चाहास्यान आव नीमव सेवक आगुल. 12 *जो यावारा तान तान इक धोळ्द माळ्यान, आव स्याण माळकु आदान: अदकि जो यावारा तान तान इक नम्र माळ्यान, आव धोळ्द माळकु आदान.

यीशु उन द्वारा पाखंडीगोळ्द भतरसना

(मरकुस १२:४०; लूका ११:३९-४२, ४४, ५२; २०:४७)

13 “हे कपटी शास्त्रीगोळा अदकि फरीसीगोळा, नीम मा हाय! नीव मंळसागोळ साटी स्वरग इन राज्य अन्द दरवाजा बंद माळतीर, अदकि न रा खुद अदुर्दा होगतीर अदकि न रा अदुर्दा होगवाळेरी होगगोळालीर. 14 *हे कपटी शास्त्री अदकि

* 23:5 २३:५ मत्ती ६:१ * 23:11 २३:११ मत्ती २०:२६, २७; मरकुस १:३५; १०:४३, ४४; लूका २२:२६ * 23:12 २३:१२ लूका १४:११; १८:१४ * 23:14 २३:१४ ईद वचन हाळोद हस्तलेखगोळ दा सकाल्द

फरीसीगोळा, नीम मा हाय! नीव रांड्यागोळ्द माननागोळी बरबाद माळ कोमतीर, अदकि आ लाँकुर दखावा माळोर साटी हापाळ होत ताका प्रार्थना माळतेला ईरतीर: इदुरसाटी नीमी यककुल दण्ड सक्कीत.

15 “हे कपटी शास्त्री अदकि फरीसीगोळा, नीम मा हाय, नीव ऊंद मंळसा अक तान मत दा तरोरसाटी पुरा जल अदकि थल मा टेटतीर, अदकि याग आव नीम मत दा होट बरतान रा आऊक तान से येद्व गुणा कपटी माळ कोमतीर.

16 “हे कुद्व अगुवागोळा†, नीम मा हाय! जो अनतार कि अगर यावारा मंदरि इन करिया तदिान रा येनु ईला, लेकीन अगर यावारा मंदरि इन व्हानना अनद करिया तदिान रा अऊर देल कट्टोदान. 17 हे मूर्खगोळा अदकि कुद्वगोळा, याव धोड्डेव आन; व्हानना या अद मंदरि यदुर देल व्हानना पवतिर आगतद? 18 बाक अनतीर कि अगर यावारा वेदी इन करिया तदिान रा येनु ईला, लेकीन जो भेट अदुर मा आद, अगर यावारा अदुरद करिया तदिान रा अदुर देल कट्टोदान. 19 हे कुद्वगोळा, याव धोड्डेव आन; भेट या वेदी यदुर देल भेट पवतिर आगतद? 20 इदुरसाटी जो वेदी इन करिया तनितान, आव अऊरुद भी करिया तनितान जो आ वेदी मा आद. 21 जो मंदरि इन करिया तनितान, आव मंदरि अदकि अदुर दा ईरावाळा परमेश्वर उन भी करिया तनितान. 22 ✨जो स्वर्ग इन करिया तनितान, आव परमेश्वर उन सहासन इन अदकि अदुर मा कुरावाळेरुद भी करिया तनितान.

23 “हे कपटी शास्त्री अदकि फरीसीगोळा, नीम मा हाय, नीव पदीना, अदकि सौफ, अदकि जीरा अनद दसवा अंश रा कोळतीर, लेकीन नीव व्यवस्था अनद गंभीर मातगोळी मतलब न्याय, अदकि दया, अदकि वशिवास इक बटिबुटीर; आगली पायजे होता कि इवरी भी माळतेला ईरायदीर अदकि अवरी भी

† 23:16 २३:१६ स्याणा, नायक

✨ 23:22 २३:२२ मत्ती ५:३४

ईला बळायदरि. 24 हे कुढ्ढ अगुवागोळा, नीव मच्छर इक रा दुंदस कोमतीर, लेकीन ऊँट इक तीन कोमतीर.

25 “हे कपटी शास्त्री अदकि फरीसीगोळा, नीम मा हाय, नीव वाटी अदकि तंळग्या अक म्याक म्याकुच टु रा ऊदतीर लेकीन अव बुळ्क करेव अदकि लालच खुद इन दा भला माळदुर दा तुमकु आव. 26 हे कुढ्ढ फरीसी, पयले कटोरा अदकि तंळग्या अक बुळ्क टु ऊद्द क्क अव व्हाऱ्या टु भी वळ्लेव कांळ्सुल.

27 ✧ “हे कपटी शास्त्री अदकि फरीसीगोळा, नीम मा हाय, नीव चुना हज्द मटगोळ घाई आईर जो म्याकुच टु रा सुंदर कांळसताव, लेकीन बुळ्क मुर्दा अनद येल्गोळ अदकि सब प्रकार इन गंदगी देल तुमकु आव. 28 ईदा रीत दिेल नीव भी म्याकुच टु मंळसागोळी न्यायी कांळ्स तोगतीर, लेकीन बुळ्क कपट अदकि बुराई देल तुमकु आईर.

शास्त्रीगोळ अदकि फरीसीगोळ मा दण्ड इन भवषियवाणी
(लूका ११:४७-५१)

29 “हे कपटी शास्त्री अदकि फरीसीगोळा, नीम मा हाय, नीव भवषियवक्तागोळ्द कब्रगोळी सुधारसतीर अदकि न्यायीगोळ्द कब्रगोळी सजुसतीर, 30 अदकि अनतीर, ‘अगर नाव तान आज्ञा बाबागोळ्द जमानानोर ईरायदेव रा भवषियवक्तागोळी कोन्नोर दा भागीदार ईला ईरायदेव.’ 31 इदुर देल रा नीव खुद अच गवाही कोळतीर क्क नीव भवषियवक्तागोळी कोन्नावाळेर औलाद हुईर. 32 इदुरसाटी नीव तान आज्ञा बाबागोळ्द पाप इन माळका पुरा तरीका देल तुमकोमी. 33 ✧ हे हावगोळा, हे हावगोळ चकिरगोळा, नीव नरक इन दण्ड देल ह्यांग ऊळदीर? 34 इदुरसाटी नोळी, ना नीम हात्ती भवषियवक्तागोळ अदकि बुद्धमिानगोळी अदकि शास्त्रीगोळी कळुतीन; अदकि नीव आंदुर दा टु यावारा अक

✧ 23:27 २३:२७ प्रेरतिगोळ २३:३ ✧ 23:33 २३:३३ मत्ती ३:७; १२:३४; लूका ३:७

कोंद बुट्टीर अदकि कूस मा येरसीर, अदकि यावारा तान सभागृहगोळ दा क्वाळा बळदीर अदकि ई नगर टु आ नगर दा जेडुतेला ओयाळीर. ³⁵ याव न्यायी हाबील टु हुडुकु बरिक्व्याह अन्द पार जकरयाह ताका, यारी नीव मंदरि अदकि वेदी इन न्याड्या दा कोंद बुटीदीर, यास न्यायीगोळ्द खुन धरती मा वाहुसकु आग्याद अद सप्पा नीम ताल्ला मा बदिदीत. ³⁶ ना नीम से खरा माताळतीन, ई सप्पा मातगोळ ईद समय इन लॉकुर मा बंदकु बदिदीत.

यीशु उन यरूशलेम इन साटी प्यार
(लूका ११:४७-५१)

³⁷ “हे यरूशलेम, हे यरूशलेम! नी भवषियवक्तागोळी कोंद बुळत्या, अदकि जो नीद हात्ती कळुकु आग्यार, आंदुर मा कल्लगोळ देल हमला माळत्या. यास अनली ना चाहासदीन कि ह्यांग कोळी तान पाड्गोळी तान पक्कागोळ्द ल्यालमा जमा माळतद, हांग अच ना भी नीन चकिोरगोळी जमा माळ कोमाईन, लेकीन नी चाहासीदलि. ³⁸ नोळी, नीम मान्ना नीम साटी सुनसान बटिकु आगतद. ³⁹ यतकी ना नीम से अनतीन कि ईगी टु आगासताका नीव नानी बाक यागलु नोळतीदलि यागासताका नीव अनतीदलि, “धन्य आन आव, जो प्रभु अन्द हेसुर देल बरतान.”

24

मंदरि इन वनाश इन भवषियवाणी
(मरकुस १३:१-२; लूका २१:५-६)

¹ याग यीशु मंदरि टु होटकु होगोन, रा आऊन चेलागोळ आऊक मंदरि इन रचना तोरसोर साटी आऊन हात्ती बंदुर.
² यीशु आंदुर से अंदुन, “नीव ईद सप्पा नोळेतीर ना! ना नीम

से खरा माताळतीन, ईल कल्ल मा कल्ल भी ईला बळितीदील जो मळ्स्कु आगतीदील.”

संकट अदकि क्लेश

(मरकुस १३:३-१३; लूका २१:७-१९)

3 याग यीशु जैतून पहाळी मा कुर्तकु ईरोन, रा चेलागोळ आबना अंदा आऊन हातूती बंदकु अंदुर, “नामी हेळ कि ई सब मातगोळ याग आदव? नीन बरोद अदकि दुनयिा अन्द आखरी इन येन चमत्कार ईत्तीत?”

4 यीशु आंदरी उत्तर कोट्टुन, “सावधान ईरी! याऊ नीमी भरमुस बाळुल, 5 यतकी हापाळ सा लॉकुर हगि ईत्तार जो नान हेसुर देल बंदकु अंदार, ‘ना मसीह हुईन,’ अदकि हापाळ मुंदरी भरमुस्यार. 6 नीव लळाईगोळ मातचीत केळीर अदकि लळाईगोळ्द बारा दा अफवाह केळीर, रा घबरूस बाळेतीर यतकी इदुर्द आगोद जरूरी आद, लेकीन आ समय दा अन्त आगतीदील. 7 यतकी द्याश मा द्याश, अदकि राज्य मा राज्य चढाई माळेव, अदकि हर जागा दा अकाल बदिदव, अदकि भूकम्प आदव. 8 ईव सप्पा मातगोळ दुखगोळ्द सुरवात माळेव.”

9 ✨आग आंदुर क्लेश कोळोर साटी नीमी हुळसुस्कु सोपस्यार, अदकि नीमी कौंद बुट्टार, अदकि नान हेसुर इन कारण सप्पा जातीगोळ लॉकुर नीम से दुश्मनी ईट्यार. 10 आग हापाळ सा लॉकुर ठोकर तदार, अदकि आबुर दाबुर हुळसुस्यार, अदकि आबुर दाबुर से दुश्मनी ईट्यार. 11 हापाळ सा ख्वाटा भवषियवक्तागोळ बंदार, अदकि हापाळ मुंदरी भरमुस्यार. 12 अन्याय इन वाळुसदुर देल हापाळ मुंदुर्द प्यार ठंडा बदिदीत, 13 ✨लेकीन जो आखरी ताका धीरज हुळकु ईत्तान, आऊंदा उद्धार आदीत. 14 अदकि राज्य इन ईद खुशखबरी पुरा दुनयिा दा

प्रचार माळकु आदीत, कसिपपा जातीगोळ मा गवाही आगुल, आग अन्त होट्ट बंदीत.

महासंकट इन सुरूवात

(मरकुस १३:१४-२३; लूका २१:२०-२४)

15 “इदुरसाटी याग नीव आ उजुळसावाळा बेकार वस्तुगोळ्द यदुरद चर्चा दानयियेल भवषियवक्ता अन्द द्वारा आगीत, पवतिर जागा दा नीदुरकु आद हगि नोळी, वाचुसावाळा खुद अच समसुल किईदुर येन मतलब आद. 16 आग जो यहूदयिया प्रदेश दा ईतीदार आंदुर पहाळगोळ मा ओळेगुल. 17 *जो छत मा ईतीदार, आव तान मानना दा टु सामान ताकोमली ईळुबाळुल; 18 अदकि जो केई दा ईतीदार, आंदुर तान कपळा ताकोमली हदि होगबाळुल. 19 आ आर्तेर साटी हाय जो आ दनिगोळ दा व्हाट्या दी ईततार अदकि जो हाल कुळसतेला ईततार! 20 प्रार्थना माळतेला ईरी कसि नीमी सोळ इन दनिगोळ दा या आराम इन दनि ओळोद बळिबाळुल. 21 *यतकी आ समय दा हगि भारी क्लेश आदीत, जसा न रा दुनयिया अन्द सुरूवात टु ईग ताका आगदील अदकि न यागलु आदीत. * 22 अदकि अगर परमेश्वर आ दनिगोळी घटुसोद नशिचय ईला माळायदुन रा ऊंद भी जीव ईला ऊळाईत, लेकीन तान नविळुसूद लॉकुर साटी आव दनिगोळी गोरत माळयान.

23 “आ समय अगर यावारा नीम से अनुल, ‘नोळी, मसीह इल आन’ या ‘आव अल आन,’ रा वशिवास माळवाळेतीर. 24 यतकी ख्वाटा मसीह अदकि ख्वाटा भवषियवक्ता यदकु नदिर्यार, अदकि धोळ्द चनिह, अदकि लॉकुरी ध्वाका कोळोर साटी अदभुत क्वालसा तोरस्यार की अगर आग सकुल रा नविळुसकु आग्यार आंदरी भी बैकुश बुळुल. 25 नोळी, ना नीमी सपपा मातगोळ पयले टु ना हेळ बुटीन.”

* 24:17 २४:१७ लूका १७:३१ * 24:21 २४:२१ प्रकाशतिवाक्य ७:१४

* 24:21 २४:२१ दानयियेल १२:१; प्रकाशतिवाक्य ७:१४

26 ✨“इदुरसाटी अगर आंदुर नीम से अनुल, ‘नोळी, आव आळी दा आन,’ रा व्हार्या होळबाळेतीर; या ‘नोळी, आव कोठरीगोळ दा आन,’ रा वशिवास माळबाळेतीर. 27 यतकी जसा सुर्य अनन्द करिण पूर्व टु होटकु पश्चमि ताका चमकुसतद, हांग अच मळसा अन पार उन भी बरोद आदीत.”

28 ✨“यल लाश ईततीत, अल्या गीधाळ जमा आदव.” ✨

मळसा अन पार उन दुबारा बरोद

(मरकुस १३:२४-२७; लूका २१:२५-२८)

29 ✨अचानक आ दनिगोळ दा क्लेश इन तुरन्त बाददा सुर्य अन्धकारमय आगेदीत, अदकि चन्द्रमा अनन्द प्रकाश होगतेला ईततीत, अदकि तारा आकाश टु बीळतेला ईततव अदकि आकाश इन शक्तगिोळी हालुस्कु आदीत. 30 ✨आग ना मळसा अन पार उन चनिह आकाश दा काळसीत, अदकि आग पृथ्वी इन सप्पा कुलगोळ लॉकुर याददा पीटस्यार; अदकि मळसा अन पार उक धोळद सामर्थ्य अदकि महमा अन सांगुळ आकाश इन बादलगोळ मा बरतेला नोळ्यार. ✨ 31 आव तुरही इन धोळद आवाज इन सांगुळ तान स्वर्गदूतगोळी कळ्यान, अदकि आंदुर आकाश इन ईद छोर टु आ छोर ताका, नाकु क्वाना टु आऊन नविळुसद लॉकुरी जमा माळ्यार.

अंजीर इन मार्र इन उदाहरण

(मरकुस १३:२८-३१; लूका २१:२९-३३)

32 “अंजीर इन मार्र देल ईद शकिषा ताकोमी: याग अदुरद डगाली मुलायम आगताव अदकि याल्ला होळली कुरताव, रा नीव जान्स कोमतीर की बसिल इन दनि हातती आद. 33 ईदा रीतदि देल याग नीव ईव मातगोळी आगतेला नोळीर, रा जान्स

✨ 24:26 २४:२६ लूका १७:२३,२४ ✨ 24:28 २४:२८ लूका १७:३७ ✨ 24:28 २४:२८ लूका १७:३७ ✨ 24:29 २४:२९ प्रकाशतिवाक्य ६:१२; प्रकाशतिवाक्य ६:१३ ✨ 24:30 २४:३० प्रकाशतिवाक्य १:७ ✨ 24:30 २४:३० दानथियेल ७:१३; जकर्याह १२:१०-१४

कोमी की अद दरवाजा मा का आद*, अदकि अद दरवाजा मा का आद. 34 ना नीम से खरा अनतीन की यागासताका इव सप्पा मातगोळ पुरा आगालव, आगासताका ईद पीदी इन अन्त आगतीदील. 35 आकाश अदकि पृथ्वी टलुसेदति, लेकीन नान मात्तगोळ यागलु टलुसतीदलि.”

अनजान दनि अदकि समय

(मरकुस १३:३२-३७; लूका १७:२६-३०,३४-३६)

36 “लेकीन आ दनि अदकि आ समय इन बारा दा यारू जानसालुर, न स्वर्गदूतगोळ अदकि ना मंळसा अन पार, लेकीन सरिफ आप्प जानसतान.” 37 “ह्यांग नूह अन दनि ईरव, हांग अच मंळसा अन पार उन भी बरोद आदीत. 38 ह्यांग नीर इन बाळ बरा से पयला अन्द दनिगोळ ताका लॉकुर तति-कुडुत ईत्तुर, अदकि मदा माळ्त्त ईत्तुर यागासताका नूह जहाज मा येरीदलि. 39 अदकि यागासताका जल प्रलय बंदकु आ सप्पा मुंदरी वाहुसकु ओतीदलि, आगासताका आंदरी येनु उच पता नळददील; हांग अच मंळसा अन पार उन भी बरोद आदीत. 40 आ समय दा येढ्ढ मुंदुर केई दा क्यालसा माळ्त्त ईत्तार, ऊंद नेगुकु आदान अदकि दुसरा बटिकु आदान. 41 येढ्ढ आर्तेर जाता दा पीसुसतेला ईत्तार, ऊंद नेगुकु आदार अदकि दुसरा बटिकु आदार”

42 “इदुरसाटी जागुसतेला ईरी, यतकी नीव जानसालीर कि नीम प्रभु याता दशिी बंदान. 43 *लेकीन ईद जानस कोमी कि अगर मान्ना अन्द स्वामी जानस कोमायदुन कि चोर यास मुरा बंदान रा च्याता ईरायदुन, अदकि तान मान्ना अन काळ्लपनी ईला आग गोळायदुन. 44 इदुरसाटी नीव भी तयार ईरी, यतकी याता घळी आऊन बरोद बारा दा नीव सोच भी सकालीर, अदा घळी मंळसा अन पार होट बंदान.”

* 24:33 २४:३३ समय हात्ती बरेत्याद ☆ 24:43 २४:४३ लूका १२:३९,४०

वश्वासयोग्य दास अदकि दुष्ट दास
(लूका १२:४१-४८)

45 “इदुरसाटी आव वश्वासयोग्य अदकि बुद्धमिान दास याव हुन, यारी स्वामी तान नौकर-चाकरगोळ मा अधिकारी ठहूसदुन की समय मा आंदरी ऊमली कोळुल? 46 धन्य आन आव दास, यारी आऊन स्वामी बंदकु हगि अच माळतेला नोळुल. 47 ना नीम से खरा अनतीन, आ स्वामी आऊक तान सप्पा संपत्ती मा अधिकारी नयिक्त माळयान.” 48 लेकीन अगर आ दुष्ट दास ईद सोचुल की नान स्वामी इक बरली समय आद, 49 अदकि तान संगी दासगोळी बडुली हतुल, अदकि सारा कुडावाळेर सांगुळ तनिल-कुडुल. 50 रा आ दास उन स्वामी ईत्ता दनि दा बंदान, याग आव आऊन हादी ईला कायतीदान, अदकि हगि समय यदरी आव जान्सालुन, 51 आग स्वामी आऊक कठोर दण्ड कोट्टान अदकि आऊन पापगोळी कपटीगोळ सांगुळ आळदान: यल लाँकुर सर्फि वलतोदार अदकि हल्ल कचतोदार.

25

हत्त कुवारा पोरगोळ्द उदाहरण

1 * “सवर्ग इन राज्य आ हत्त कुवारा पोरगोळ घाई ईत्तीत जो तान मशाल हुडुकु मळगार से भेट माळली होटार. 2 आंदुर दा टु अईद मूर्ख अदकि अईद समझदार ईरोर. 3 आ अईद मूर्ख पोरगोळ तान मशालगोळ रा हुळदुर, लेकीन तान सांगुळ याण्णा हुळदीदलि; 4 लेकीन समझदार पोरगोळ तान मशालगोळ सांगुळ तान चाळीगोळ दा याण्णा भी तुम कौडुर. 5 याग मळगार उक बरली समय आत्त, रा आंदुर सप्पा पोरगोळ जपस्ली कुरतुर अदकि मगिदुर.”

6 “आर्धा ईळ्लक इक धूम मचुस्त: ‘नोळी, मळगार बरेत्यान! आऊन से भेट माळोर साटी नळी.’ 7 आग आंदुर सप्पा कुवारा

* 25:1 २५:१ लूका १२:३५

पोरगोळ यदकु तान मशालगोळी ठीक माळली कुरतुर. 8 अदकि मूर्ख पोरगोळ समझदार पोरगोळ से अंदुर, 'तान याण्णा दा टु थ्वाळासा नामी भी कोळी, यतकी नाम मशालगोळ नूनेत्याव.' 9 लेकीन समझदार पोरगोळ उत्तर कोट्टुर, ईला! नाव कोळ सकालेव. कदाचति ईद नाम अदकि नीम साटी पुरा आगदिल, 'भला रा ईद आद कि नीव याण्णा मारावाळेर हात्ती होगकु तान साटी कोंडकु तंदकोमी.' 10 याग आंदुर याण्णा कोमोर साटी होगोर रा मंळगार होटबंदुन, अदकि जो तयार ईरोर, आंदुर आ मंळगार उन सांगुळ यल मदा आगताव आ मान्ना दा होटोदुर अदकि दरवाजा बंद माळकु आगीत."

11 ✧ "इदुर बाददा आंदुर दुसरा कुवारा पोरगोळ भी बंदकु अनली कुरतुर, 'हे स्वामी, हे स्वामी, नाम साटी दरवाजा तेरू अदकि नामी बुळ्क बरगोळ!' 12 आ मंळगार उत्तर कोट्टुन, 'ना नीम से खरा अनतीन, ना नीमी अरालीन.'"

13 इदुरसाटी जागसतेला ईरी, यतकी नीव न आ दनि इक जान्स्तीर, न आ समय इक. ✧

मुर दासगोळद उदाहरण (लूका १९:११-२७)

14 ✧ "स्वर्ग इन राज्य आ मंळसा अन्द घाई ईत्तीत याव परदेश होगाहोती तान दासगोळी कारूकु तान धन आंदरी सौप्स बुट्टुन. 15 आव पयला अक अईद हजार व्हान्ना अन सक्किगोळ कोट्टुन, दुसरा अक येढ्ढ, अदकि तीसरा अक ऊंद; मतलब हर ऊंद मंळसा अक आऊन सामर्थ्य इन अनुसार कोट्टुन, अदकि आग परदेश होटोदुन. 16 आग, याऊक अईद हजार व्हान्ना अन सक्किगोळ सक्कीदव, आव तुरन्त होगकु सक्किगोळ देल लेन देन माळदुन, अदकि अईद हजार

✧ 25:11 २५:११ लूका १३:२५ ✧ 25:13 २५:१३ मरकुस १३:३५; लूका १२:४०

✧ 25:14 २५:१४ लूका १९:११-२७

सक्का मात्त कमुसदुन. 17 ईदा रीत दिेल याऊक येढ्ढ हजार सक्कागोळ सक्कीदव, आव भी येढ्ढ हजार सक्कागोळ मात्त कमुसदुन. 18 लेकीन याऊक ऊंद हजार वहान्ना अन सक्कागोळ सक्कीदव, आव होगकु मुण्ण अगुळदुन, अदकि तान स्वामी इन धन मुण्ण दा होचकु ईटदुन.”

19 “हापाळ दनि इन बाद्दा आ दासगोळ्द स्वामी बंदकु आंदुर से हसिाव ताकोमली कुरतुन. 20 याऊक अईद हजार वहान्ना अन सक्कागोळ सक्कीदव, आव अईद हजार सक्कागोळ मात्त तनकु अंदुन, हे स्वामी, नी नानी अईद हजार वहान्ना अन सक्का कोटीद, नोळ, ना अदुर मा अईद हजार सक्कागोळ मात्त कमुसीन.’ 21 आऊन स्वामी आऊन से अंदुन, ‘शाब्बास, हे वळ्लेव अदकि वश्वासयोग्य दास, नी थ्वाळासा दा वश्वासयोग्य ईत्त; ना नीनी हापाळ वस्तुगोळ्द अधिकारी माळाईन. तान स्वामी इन खुशी दा सहभागी आग.’”

22 “अदकि याऊक येढ्ढ हजार सक्कागोळ सक्कीदव, आव भी बंदकु अंदुन, हे स्वामी, नी नानी येढ्ढ हजार सक्कागोळ सौप्सीद, नोळ, ना येढ्ढ हजार सक्कागोळ मात्त कमुसदनि.’ 23 आऊन स्वामी आऊन से अंदुन, ‘शाब्बास, हे वळ्लेव अदकि वश्वासयोग्य दास, नी थ्वाळासा दा वश्वासयोग्य ईत्त; ना नीनी हापाळ वस्तुगोळ्द अधिकारी माळाईन. तान स्वामी इन खुशी दा सहभागी आग.’

24 “आग याऊक ऊंद हजार वहान्ना अन सक्कागोळ सक्कीदव, आव बंदकु अंदुन, हे स्वामी, ना नीनी अरूतीन का नी कठोर मंळसा आय: नी यल टु बोऊसाल अल टु कडुत्या, अदकि यल बीजा हाकाल अल टु ताकोमत्या. 25 इदुरसाटी ना अंजेदीन अदकि होगकु नीन वहान्ना अन सक्कागोळ मुण्ण दा होचकु इटदीन. नोळ, जो नीद आद, अद ईद हुन.’”

26 आऊन स्वामी आऊक उत्तर कोट्टुन, “हे दुष्ट अदकि

आलसी दास, याग नी ईद जानस्या कियल ना बोऊसीदलि अल टु कडुतीन, अदकि यल ना बीजा हाकीदील अल टु ताकोमतीन; 27 आग नी ईद माळाईद कनिान धन सावकार उन हात्ती ईट बुळाईद, आग ना बंदकु तान धन ब्याज समेत आऊन से ताकोम कोमायदीन. 28 इदुरसाटी आऊन से अव ऊंद हजार सक्कागोळ ताकोमकोमी, अदकि यार्द हात्ती हत्त हजार सक्कागोळ आव, आऊक कोटबुळी. 29 यतकी यार हात्ती आद, आऊक मात्त कोटकु आदीत; अदकि आऊन हात्ती हापाळ आगेदीत: लेकीन याऊन हात्ती हैलेच, आऊन से अद भी जो आऊन हात्ती आद, ताकोमकु आदीत. 30 अदकि ई नकिममा दास उक व्हार्या अंधार दा हाक्क बुळी, यल वोरलोद अदकि हल्ल कचचोद आदीत.”

आखरी न्याय

31 यथाग मंळसा अन पार तान महमिा दा बंदान अदकि सप्पा स्वरगदूत आऊन सांगुळ बंदार, रा आव तान महमिा अन्द सहासन मा वरिाजमान आदान. 32 अदकि सप्पा राज्य अन लॉकुर आऊन मुंद जमा माळकु आदार; अदकि ह्यांग चरवाह लांडग्यागोळी मरगोळ से अलग माळ बुळतान, हांग अच आव आंदरी आबुर दाबुर से अलग माळ्यान. 33 आव लांडग्यागोळी ऊम्मा कय मा अदकि मरगोळी डाक्या कय मा नीदरूस्यान. 34 आग राजा तान ऊम्मा कय दी नीदरावाळेरे से अंदान, हे नांद आप्प उन धन्य लॉकुरा, बरी, आ राज्य अन्द अधिकारी आगेगी, जो दुनयिा अन्द पयला टु उच नीम साटी तयार माळकु आग्याद. 35 यतकी ना हस्तकु ईरीन, अदकि नीव नानी तनिली कोट्टीर; ना नरिळ्कु ईरीन, अदकि नीव नानी नीर कुळसदीर; ना अनजान ईरीन, अदकि नीव नानी ताम मान्या ईटदीर; 36 ना ऊगळा ईरीन,

☆ 25:29 २५:२९ मत्ती १३:१२; मरकुस ४:२५; लूका ८:१८ ☆ 25:30 २५:३० मत्ती ८:१२; २२:१३; लूका १३:२८ ☆ 25:31 २५:३१ मत्ती १६:२७; मत्ती १९:२८

अदकि नीव नानी कपळा हाक्सुसदीर; ना बमिर ईरीन, अदकि नीव नान देखभाल माळदीर, ना बंदीगृह दा ईरीन, अदकि नीव नान से भेट ताकोमली बंदीर.’

37 “आग न्यायी लाँकुर आऊक उत्तर कोट्टार, हे प्रभु, नाव याग नीनी हस्तकु नोळदेव अदकि तीन्सदेव? या नरिळ्कु नोळदेव अदकि नीर कुळसदेव? 38 नाव याग नीनी अनजाना नोळदेव अदकि तान मान्या ईटदेव? या ऊगळा नोळदेव अदकि कपळा हाक्सुसदेव? 39 नाव याग नीनी बमिर या बंदीगृह दा नोळदेव अदकि नीन से भेट माळली बंदेव?” 40 आग राजा आंदरी उत्तर कोट्टान, ‘ना नीम से खरा अनतीन क्नीव जो नान स्यांळ्द से स्यांळ्द वार्दुर दा टु यावारा ऊंद मंळसा अन्द सांगुळ माळदीर, अद नांदा सांगुळ माळदीर.’ ”

41 “आग आव डाक्या कय दी नीदरावाळेर से अंदान, हे शापति लाँकुरा, नान मुंद टु अद अनन्त बेक्की दा होटोगी, जो शैतान अदकि आऊन दूतगोळ साटी तयार माळकु आग्याद. 42 यतकी ना हस्तकु ईरीन, अदकि नीव नानी तनिली कोटीदील; ना नरिळ्कु ईरीन, अदकि नीव नानी नीर कुळसदील; 43 ना अनजाना ईरीन, अदकि नीव नानी तान मान्या ईटीदील; ना ऊगळा ईरीन, अदकि नीव नानी कपळा हाक्सुसीदलि; ना बमिर अदकि बंदीगृह दा ईरीन, अदकि नीव नान देखभाल माळीदील.’

44 “आग आंदुर उत्तर कोट्टार, हे प्रभु, नाव नीनी याग उपासा, या नरिळ्कु, या परदेशी, या ऊगळा, या बमिर, या बंदीगृह दा नोळदेव, अदकि नींद स्यावा टहल माळीदलि?” 45 आग आव आंदरी उत्तर कोट्टान, ‘ना नीम से खरा अनतीन क्नीव जो ई स्यांळ्द टु स्याणेर दा टु यावारा ऊंद मंळसा अन सांगुळ माळीदलि, अद नांद सांगुळ भी माळीदलि.’ 46 अदकि इंदुर अनन्त दण्ड भोगसोर साटी कळुकु आदार लेकीन न्यायी लाँकुर अनन्त जीवन दा प्रवेश माळ्यार.’”

26

यीशु उन खलिाप साजीश

(मरकुस १४:१-२; लूका २२:१-२; यूहन्ना ११:४५-५३)

1 याग यीशु इव सप्पा मात अंद बुट्टुन रा तान चेलागोळ से अनली कुरतुन, 2 “नीव जान्सतीर का येढ्ढ दनि इन बाद्दा फसह अन्द हाब्ब आद, अदकि मंळसा अन्द पार क्रूस मा येरसोर साटी हुळसुसकु आदान.”*

3 आग प्रधान याजक अदकि प्रजा अन्द पुरनणि कैफा हेसुर इन महायाजक उन भवन दा जमा आदुर, 4 अदकि आपस दा वचिार माळली कुरतुर कियीशु उक गुप्त तरीका देल हुळकु कोंद बुटेव. 5 लेकीन आंदुर अनतोगोर, “हाब्बा अन समय दा ईला, ईलारा हगि आगवाळुल किलोंकुर दा दंगा फसाद आगोगुल.”

बैतनय्याह दा यीशु उन अभषिक

(मरकुस १४:३-९; यूहन्ना १२:१-८)

6 याग यीशु बैतनय्याह दा शमौन कोढी इन मान्या ईरोन, 7 *रा ऊंद आरत संगमरमर इन बाटुल दा बार ईत्तर हुळकु यीशु उन हात्ती बंदुर, अदकि याग आव ऊमोर साटी कुरतीदुन रा आऊन ताल्ला मा ऊलटुसदुर. 8 ईद नोळकु आऊन चेलागोळी सट्टि बत्त अदकि आंदुर अनली कुरतुर, “ई ईत्तर येती बरबाद माळकु आग्याद? 9 इदरी रा वळ्लीद दाम दा मारकु कंगालगोळ दा वाटस्कु आग सकोद.”

10 ईद जानसकु यीशु आंदुर से अंदुन, “आ आरत इक येती सतुसतीर? आक नान साटी भलाई इन क्याल्सा माळ्यार. 11 कंगाल रा नीम सांगुळ हमेशा ईरतार, लेकीन ना नीम सांगुळ हमेशा ईर सकालीन. 12 आक नान मय मा जो ईत्तर हाक्यार, अद नान सोत्तुर बाद्दा नळसकु आगोद तयारी हुन. 13 ना नीम से खरा माताळतीन, कसि सप्पा दुनयिा दा येल्यारा भी ईद

* 26:2 २६:२ नरिगमन १२:१-२७

* 26:7 २६:७ लूका ७:३७,३८

खुशखबरी प्रचार माळकु आदीत, अल आकनि ईद क्याल्सा अन्द वर्णन भी आकनि याद दा माळकु आदीत.”

यहूदा इस्करियोती इन वश्वासघात
(मरकुस १४:१०-११; लूका २२:३-६)

14 आग यहूदा इस्करियोती, जो हन्नेळ चेलागोळ दा टु ऊंद ईरोन, प्रधान याजकगोळ्द हात्ती होदुन, 15 अदकि आव अंदुन, “अगर ना आऊक नीम कय दा हुळसुस कोळाईन रा नानी येन कोट्टीर?” आंदुर आऊक तीस चाँदी नव सकिकागोळ आळुकु कोट बुटुर. 16 अदकि आव अदा समय टु आऊक हुळसुसोद सही मवका हुँदसली कुरतुन.

चेलागोळ्द सांगुळ फसह हाब्ब इन आखरी भोज
(मरकुस १४:१२-२१; लूका २२:७-१३,२१-२३; यूहन्ना १३:२१-३०)

17 अखमीरी रोट्टी इन हाब्बा इन पयला दनि, चेलागोळ यीशु उन हात्ती बंदकु केळली कुरतुर, “नी येन चाहासत्या कनि नाव नींद साटी फसह तनोद तयारी माळेव?”

18 यीशु अंदुन, “नगर दा अमुक मंळसा अन्द हात्ती होगकु आऊन से अनी, गुरु अनेत्यान कनि नांद समय हात्ती आद. ना तान चेलागोळ्द सांगुळ नीन मान्या फसह हाब्ब मानसाईन.”

19 इदुरसाटी चेलागोळ यीशु उन आग्या स्वीकार माळदुर अदकि फसह तयार माळदुर.

20 याग द्याव आत रा आव हन्नेळ चेलागोळ सांगुळ ऊमली कुरतीदुन. 21 याग आंदुर तीनोर रा यीशु अंदुन, “ना नीम से खरा अनतीन कनि नीम दा टु ऊंद नानी हुळसुस्यान.”

22 इदुर मा आंदुर च्याच उदास आदुर, अदकि हर ऊंद चेला यीशु से केळली कुरतुन, “हे गुरु, येन आव ना हुईन?”

23 यीशु उत्तर कोट्टुन, “आव जो नान सांगुळ तंळग्या दा ऊमतान, आवा नानी हुळसुसकु सोपस्यान. 24 ना मंळसा अन्द

पार ह्यांग नान बारा दा शास्त्र दा लखिसकु आद, अद आदीत अच; लेकीन आ मंळसा अन्द साटी शोक आद याऊन द्वारा मंळसा अन पार हुळसुसकु आदान: अगर आ मंळसा अन्द जनम अच ईला आगाईत, रा आऊन साटी भला आगाईत.”*

25 आग यीशु उक हुळसुसकु सौपसावाळा यहूदा अंदुन, “हे गुरु, येन आव ना हुईन?”

यीशु आऊन से अंदुन, “नी रा अंदबुट.”

प्रभु भोज

(मरकुस १४:२२-२६; लूका २२:१४-२०; १ कुरनिथि ११:२३-२५)

26 “याग आंदुर ऊमोर रा यीशु रोटी ताकोडुन, अदकि आशीष बेळकु मुरदुन, अदकि चेलागोळी कोटकु अंदुन, हुडी, तनी; ईद नांद मय हुन.”

27 बाक यीशु कटोरा हुळकु धन्यवाद माळदुन, अदकि आंदरी कोटकु अंदुन, “नीव सप्पा लॉकुर इदुर दा टु कुडी, 28 यतकी ईद वाचा अन्द नान अद रक्ता हुन, जो सप्पा लॉकुर पापगोळ माफ अन्द साटी वाहुसकु आगतद. 29 ना नीम से खरा अनतीन कि अंगुर इन ईद रास्सा आ दनि ताका यागलु कुढालीन, यागासताका नीम सांगुळ तान आप्प उन राज्य दा व्हाशोद रास्सा कुडू कोमालीन.”

30 बाक आंदुर भजन हाळ्त-हाळ्त जैतून पहाळी मा होदुर.

पतरस उन इनकार इन भवषियवाणी

(मरकुस १४:२७-३१; लूका २२:३१-३४; यूहन्ना १३:३६-३८)

31 आग यीशु चेलागोळ से अंदुन, “नीव सप्पा मुंदुर ईदल्या ईळलक इक नांद बारा दा ठोकर तदीर, यतकी शास्त्र दा लखिसकु आद: ‘ना चरवाह अक कोनाईन, अदकि झुण्ड इन

* 26:24 २६:२४ भजन संहिता २२:७-८; यशायाह ५३:९

म्यांडागोळ ततिर-बतिर आगोदव.* 32 ✨लेकीन ना तान जत्तिता आगदुर बाद्दा नीम से पयले गलील इक होगार्ईन.”

33 इदुर मा पतरस यीशु से अंदुन, “अगर सप्पा मुंदुर नीन बारा दा ठोकर तदिर रा तदिर, लेकीन ना यागलु ठोकर तनितीदील.”

34 यीशु आऊन से अंदुन, “ना नीन से खरा अनतीन कर्ईदल्या ईळ्ळकी हुंज इन कुग्गोर से पयले, नी मुर घन नांद इनकार माळया.”

35 पतरस यीशु से अंदुन, “अगर नानी नीन सांगुळ सायोद भी बदिदीत, तरी ना नींद यागलु इनकार माळतीदील.” अदकि हगि अच सप्पा चेलागोळ भी अंदुर.

गतसमनी दा प्रार्थना

(मरकुस १४:३२-४२; लूका २२:३९-४६)

36 आग यीशु तान चेलागोळ्द सांगुळ गतसमनी हेसुर इन ऊंद जागा दा बंदुन अदकि तान चेलागोळ से अनली कुरतुन, “ईल्या कुर्तकु ईरेतीर, आगासताका ना अल होगकु प्रार्थना माळतीन.” 37 यीशु पतरस अदकि जब्दी इन येदुदु पारगोळी सांगुळ ओतुन, अदकि उदास अदकि व्याकुल आगली कुरतुन. 38 आग यीशु आंदुर से अंदुन, “नान मन च्याच उदास आद. इल ताका कर् नान जीव होळतेला आद. नीव ईल्या ठहरूसी अदकि नांद सांगुळ च्याता ईरी.”

39 बाक यीशु थ्वाळासा मात्त मुंद होगकु बाय इन भार देल बदिदुन, अदकि ईद प्रार्थना माळदुन, “हे नांद आप्पा, अगर आग सकुल रा ईद संकट नान मा टु टलसेगुल, तौभी ह्यांग ना चाहासतीन हांग ईला, लेकीन ह्यांग नी चाहासत्या हांग अच आगुल.”

40 बाक यीशु चेलागोळ्द हात्ती बंदकु आंदरी मगितेला नोळदुन अदकि पतरस से अंदुन, “येन नीव नान सांगुळ ऊंद घळी

भी च्याता ईला ईर सकीर? 41 नीव परीक्षा दा बळितीदील इदुरसाटी च्याता ईरी, अदकि प्रार्थना माळतेला ईरी: आत्मा रा तयार आद, लेकीन शरीर कमजोर आद.”

42 बाक यीशु दुसरा बार होगकु ईद प्रार्थना माळदुन, “हे नांद आप्पा, अगर ईद नांद कुढा बनिा ईला हट्सतीदाद रा नींद इच्छा पुरा आगुल.” 43 आग यीशु बंदकु आंदरी मात्त मगितेला नोळदुन, यतकी आंदुरव कण्णगोळ जप देल तुमकु ईरव.

44 आंदरी बटिकु यीशु मात्त होटोदुन, अदकि अवा आवाजगोळ दा मात्त तीसरा बार प्रार्थना माळदुन. 45 आग यीशु चेलागोळद हात्ती बंदकु आंदुर से अंदुन, “ईग मगितेला ईरी, अदकि आराम माळी: नोळी, घळी होट बंदाद, अदकि ना मंळसा अन्द पार पापीगोळ कय देल हुळसुसकु आगाईन. 46 येळी, होगता; नोळी, नानी ध्वाका देल हुळसुसकु सौप्सावाळा नान हात्ती होट्ट बंदान.”

यीशु उन ध्वाका देल हुळसुसकु आगोद

(मरकुस १४:४३-५०; लूका २२:४७-५३; यूहन्ना १८:३-१२)

47 यीशु ईद अनतेला अच ईरोन कि यहूदा जो हन्नेळ चेलागोळ दा टु ऊंद ईरोन बंदुन, अदकि आऊन सांगुळ प्रधान याजकगोळ अदकि लॉकुरद पुरनयागोळ दी टु धोळ भीळ तलवारगोळ अदकि कोलगोळ हुळकु बंदुर. 48 यीशु उक हुळसुसावाळा आंदरी ईद संकेत कोटीदुन: “थार्द ना चुम्मा ताकोमाईन आवा हुन; आऊक हुडु कोमेतीर.”

49 अदकि तुरन्त यीशु उन हात्ती बंदकु अंदुन, “हे गुरु, नमस्कार!” अदकि आऊंद हापाळ चुम्मा ताकोडुन.

50 यीशु आऊन से अंदुन, “हे संगी, या क्याल्सा अन्द साटी नी बंद्या, अदरी माळकोम.”

आग आंदुर हात्ती बंदकु यीशु मा कय हाकदुर अदकि आऊक हुडुकोडुर. 51 यीशु उन संगीगोळ दा टु ऊंद संगी कय मुंद माळकु

तान तलवार जेडु कौडुन अदकि महायाजक उन दास मा नळसकु आऊन कवि हार्स बुट्टुन. ⁵² आग यीशु आऊन से अंदुन, “तान तलवार मयान दा ईट कोम यतकी जो तलवार नळसतार आंदुर सप्पा मुंदुर तलवार देल नाश माळकु आदार. ⁵³ येन नी जान्साल कि ना तान आप्प उन से वनिती माळ सकतीन, अदकि आव स्वरगदूतगोळद हन्नेळ पलटन से यक्कुल नान हात्ती ईगल्या उपस्थति माळ बुटान? ⁵⁴ लेकीन पवतिरशास्त्र नव अव मातगोळ कि हगि अच आगोद जरूरी आद, ह्यांग पुरा आदव?”

⁵⁵ ✧आ समय यीशु भीळ से अंदुन, येन नीव तलवारगोळ अदकि कोलगोळी हुळकु नानी डाकूगोळ घाई हुडुली होटीर? ना हर रोज मंदिर दा कुरतकु उपदेश कोळतोगिन, आग रा नीव नानी हुळददील.

⁵⁶ “लेकीन ई सप्पा इदुरसाटी आग्याद कि भवषियवक्तागोळद वचन पुरा आगुल.” आग सप्पा चेलागोळ यीशु उक बटिकु वोळेदुर.

महासभा अन्द मुंद यीशु

(मरकुस १४:५३-६५; लूका २२:५४-५५, ६३-७१; यूहन्ना १८:१३-१४, १९-२४)

⁵⁷ आग यीशु उक हुडावाळेर आऊक कैफा हेसुर इन महायाजक उन हात्ती ओतुर, यल नयिम इन गुरु अदकि पुर्वजगोळ जमा आगीदुर. ⁵⁸ पतरस दुर दुर टु उच आऊन हदि-हदि महायाजक उन आंगुळ ताका होदुन, अदकि बुळ्क होगकु यीशु उन अन्त नोळली सपिाहीगोळ सांगुळ कुरतोदुन. ⁵⁹ प्रधान याजक अदकि सप्पा महासभा यीशु उक कोन्नोर साटी आऊन वरिध दा खवाटा गवाही इन खोज दा ईरोर, ⁶⁰ लेकीन हापाळ सा खवाटा गवाहगोळ बंदुर मा भी आंदरी येनु हासलि आगीदील. आखरी दा

येढ्ढ मुंदुर बंदुर, 61 अदकि अंदुर, “ईव अंदान कि ना परमेश्वर उन मंदरि इक केडु सकतीन अदकि अदरी मुर दनि दा माळ सकतीन.”

62 आग महायाजक नीदुरकु यीशु से अंदुन, “येती नी येनु उत्तर कोळाल? ई लॉकुर नीन वरिध दा येन गवाही कोळेत्यार?”

63 लेकीन यीशु सुंगा ईत्तुन. आग महायाजक यीशु से अंदुन, “ना नीनी जत्तिता परमेश्वर उन करिया कोळतीन कि अगर नी परमेश्वर उन पार मसीह हुय, रा नाम से अंद बुळ.”

64 यीशु आऊन से अंदुन, “नी रा खुद अच अंदबुट; लेकीन ना नीम से ईद भी अनतीन कि ईगी टु नीव मंळसा अन पार उक सर्वशक्तमान उन ऊमा कय दी कुरत, अदकि आकाश इन बादलगोळ मा बरत नोळीर.”

65 इदुर मा महायाजक तानव कपळा हरदुन अदकि अंदुन, “ईव परमेश्वर उन अपमान माळ्यान, ईग नामी गवाहगोळ्द येन जरवत आद? नोळी, नीव ईगल्या ईद अपमान केळीर! 66 नीव येन सोचेतीर?”

आंदुर उत्तर कोट्टुर, “ईव मृत्यु दण्ड इन योग्य आन.”

67 आग आंदुर यीशु उन बाय मा ऊगुळदुर अदकि आऊक बुक्की बळदुर, दुसरा लॉकुर क्याबरा बळकु अंदुर, 68 “हे मसीह, नाम से भवषियवाणी माळकु अन कियार नीनी बळदुर?”

पतरस उन इनकार

(मरकुस १४:६६-७२; लूका २२:५६-६२; यूहनना १८:१५-१८, २५-२७)

69 पतरस व्हार्या आंगुळ दा कुरतकु ईरोन कि ऊंद दासी आऊन हात्ती बंदुर अदकि अंदुर, “नी भी यीशु गलीली इन सांगुळ ईर्या.”

70 आव सपपा मुंदुरद मुंद ईद अनतेला इनकार माळदुन, “ना जान्सालीन नी येन अनीत्या.” 71 याग आव व्हार्या दरवाजा

मा होदुन, रा दुसरा दासी आऊक नोळकु आंदुर से अंदुर जो अल ईरोर, “ईव भी रा आ यीशु नासरी इन सांगुळ ईरोन.”

72 आव करिया तनिकु मात्त इनकार माळकु अंदुन: “ना आ मंळसा अक अरालीन.”

73 घळी तमिर बाददा लॉकुर जो अल नीदुरकु ईरोर, पतरस उन हात्ती बंदकु आऊन से अंदुर, “खराखुरा नी भी आंदुर दा टु ऊंद ह्य, यतकी नीन बोली भाषा नीद भेद खोलस बुळतद.”

74 आग आव मना माळली अदकि करिया तनिली कुरतुन: “ना आ मंळसा अक अरालीन.” अदकि तुरन्त हुंज कुग्त्. 75 आग पतरस उक यीशु उन आ मात याद बत्त: “हुंज इन कुग्गोर से पयले नी मुर घन नान इनकार तुम्या.” अदकि आव व्हार्या होगकु हापाळ दुखी आगकु वर्लदुन.

27

पलातुस उन मुंद यीशु

(मरकुस १५:१; लूका २३:१,२; यूहन्ना १८:२८-३२)

1 याग व्हातुर आत रा सब प्रधान याजक लॉकुरद पुरनएिगोळ यीशु उक कौंद बुळोद साटगाट माळदुर. 2 आंदुर आऊक कटदुर अदकि वोतकु पलातुस न्यायाधीश उन कय दा कोट बुट्टुन.

यहूदा तान कय देल सोत्तुन

(प्रेरतिगोळ १:१८,१९)

3 *याग यहूदा, याव यीशु उक हुळसुसीदुन, ईद नोळदुन क् यीशु उक दोषी ठहरसकु आग्याद, रा आव पछ्रतासदुन, अदकि चाँदी नव तीस सक्कागोळी प्रधान याजक अदकि पुरनएिगोळी वापस माळदुन 4 अदकि अंदुन, “ना ऊंद नरिदोष मंळसा अक ध्वाका देल कोननोर साटी हुळसुसकु पाप माळदीन!” आंदुर अंदुर, “नामी येन माळोद आद? नी तान जान्स.”

✧ 27:3 २७:३ प्रेरतिगोळ १:१८,१९

5 आग आव आ सक्कागोळी मंदरि दा भटिकु होटोदुन, अदकि होगकु खुद तान-तान इक फाँसी हचदुन.

6 प्रधान याजकगोळ आ सक्कागोळी हुळकु अंदुर, “इवरी, दान भंडार दा ईटोद उचति हैलेच, यतकी ईद खुन इन दाम हुन.”

7 अदकि आंदुर आपस दा साटगाट माळदुर अदकि आ पैस्यागोळ देल परदेशीगोळी नळसोर साटी गळग्या माळावाळा अनूद केई कोंडुर. 8 इदुर कारण आ केई ईगासताका खुन इन केई कहलुसतद.

9 आग आ वचन यरिमयाह भवषियवक्ता अनूद द्वारा अंदकु आगीत अद पुरा आत: “आंदुर आ तीस सक्का मतलब आ जो ठहरूसद दाम इक (यदरी इस्त्राएल इन औलाद दा टु यास मुंदुर ठहरूसीदुर) ताकोम कोंडुर, 10 अदकि हयांग प्रभु नानी आग्या कोटीदुन हांग अच अवरी गळग्या माळावाळेरुद केई इन दाम दा कोट बुट्टुन.”

पल्लितुस उन प्रश्न

(मरकुस १५:२-५; लूका २३:३-५; यूहन्ना १८:३३-३८)

11 याग यीशु न्यायाधीश उन मुंद नदिरकु ईरोन रा न्यायाधीश आऊन से केळदुन, “येन नी यहूदीगोळद राजा हुय?”

यीशु आऊन से अंदुन, “नी खुद अच अनेत्या.” 12 याग प्रधान याजक अदकि पुरनणि आऊन मा दोष हचचोर, रा यीशु येनु उत्तर कोटीदील.

13 इदुर मा पल्लितुस यीशु से अंदुन, “येन नी येनु केळाल कि इंदुर नीन वरिध दा याट गवाही कोळेत्यार?”

14 लेकीन यीशु आऊक ऊंद मात इन भी उत्तर कोटीदील, इल ताका कनि न्यायाधीश उक हापाळ आश्चर्य आत.

यीशु उक मृत्यु-दण्ड इन आग्या

(मरकुस १५:६-१५; लूका २३:१३-२५; यूहन्ना १८:३९; १९:१६)

15 न्यायाधीश उन ईद रीति ईरोद कि आ हाब्ब दा लॉकरुद साटी यावारा ऊंद कैदी इक यारी आंदुर चाहासतोगोर,

बळितोगोन. 16 आ समय दा आंदुर बंदीगृह दा बरअब्बा हेसुर ईनव ऊंद जाना माना कैदी ईरोन. 17 इदुरसाटी याग आंदुर जमा आदुर, रा पलातुस आंदुर से अंदुन, “नीव यार इक चाहासतीर क्फि ना नीम साटी बटि बुळाईन? बरअब्बा अक, या यीशु उक जो मसीह कहलुस्तान?” 18 यतकी आव जानसोन क्फि आंदुर यीशु उक ध्वाका देल हुळसुसकु सोपस्यार.

19 याग पलातुस राजा न्याय इन गद्दी मा कुर्तकु ईरोन रा आऊन हगिस आऊक बुलावा कळदुर क्फि, “नी आ न्यायी मळसा अन्द मामला दा कय हाकबाळ, यतकी ना ईद कान्सा दा आऊन कारण हापाळ दुख नेगदीन.”

20 प्रधान याजकगोळ अदकि पुरनएिगोळ लॉकुरी भळकुसदुर क्फि आंदुर बरअब्बा अक बेळ कोमुल, अदकि यीशु उन नाश माळसुसुल. 21 न्यायाधीश आंदुर से केळदुन, “इंदुर येढु मुंदुर दा टु यार इक चाहासतीर क्फि ना नीम साटी बटि बुळाईन? आंदुर अंदुर, बरअब्बा अक.”

22 पलातुस आंदुर से केळदुन, “बाक यीशु उक जो मसीह कहलुस्तान, येन माळाईन?”

सप्पा मुंदुर पलातुस राजा से अंदुर, “आऊक क्रूस मा येर्स बुळ!”

23 न्यायाधीश अंदुन, “यती, आव येन बुराई माळ्यान?”

लेकीन आंदुर मात्त चिल्वास-चळिलासकु अनली कुरतुर, “आऊक क्रूस मा येर्स बुळ.”

24 याग पलातुस नोळदुन क्फि नान से येनु आगसकाल लेकीन उलटा झगळा वाळुसेत्याद, रा आव नीर हुडुकु भीळ इन मुंद तान कय तोळदुन अदकि अंदुन, “ना ई मळसा अन्द रक्ता देल नरिदोष आईन; नीव अच नोळी.”

25 सप्पा लॉकुर उत्तर कोट्टुर, “ईऊन खुन नाम मा अदकि नाम औलाद मा आगुल!”

26 इदुर मा पलिातुस राजा बरअब्बा अक आंदुर साटी बटि बुट्टुन, अदकि यीशु उक क्वाळा बळ्दकु सौप्स बुट्टुन, कि आऊक क्रूस मा येर्सकु आगुल.

सपिाहीगोळ द्वारा यीशु उन अपमान माळोद

(मरकुस १५:१६-२०; यूहनना १९:२-३)

27 आग न्यायाधीश ईनोर सपिाहीगोळ यीशु उक कलिा दा वोतकु सप्पा पलटन आऊन नाकु दी जमा माळदुर, 28 अदकि आऊन कपळा ईळसकु आऊक क्वाचांद रंग इन कपळा हाक्सुसदुर, 29 अदकि मुळ्ळ इन मुकुट तयार माळकु यीशु उन ताल्ला मा ईटदुर, अदकि आऊन ऊम्मा कय दा सरकण्डा कोट्टुर अदकि आऊन मुंद ट्वांगरा टेक्सकु आऊन मज्याक हारसली कुरतुर अदकि अंदुर, “हे यहूदीगोळ्द राजा, नमस्कार!” 30 अदकि आऊन मा ऊगुळदुर; अदकि अदा सरकण्डा हुळकु आऊन ताल्ला मा बडुली कुरतुर. 31 याग आंदुर यीशु उन मज्याक हारस बुट्टुर, रा अद च्वांगगा आऊन मा टु ईळसकु आऊन अच कपळा आऊक हाक्सुसदुर, अदकि क्रूस मा येरसोर साटी वयली कुरतुर.

यीशु उक क्रूस मा येर्सकु आगोद

(मरकुस १५:२१-३२; लूका २३:२६-४३; यूहनना १९:१७-२७)

32 याग आंदुर व्हार्या होळोर रा आंदरी शमौन हेसुर ईनव ऊंद कुरेनी मंळसा सकिदुन. आंदुर आऊक बेकार दा हुळदुर कि आऊन क्रूस नेगुकु नळुल. 33 अदकि याग आंदुर आ जागा मा बंदुर जो गुलगुता कहलुसतद, मतलब खोपळी इन जागा, पोहचुस्कु, 34 आंदुर पतित्त मलिसकु अंगुर इन रास्सा यीशु उक कुडुली कोट्टुर, लेकीन आव नेकदुन रा आऊक केय हत्त अनकु आव हुळदीदलि.

35 आग आंदुर आऊक क्रूस मा येर्सदुर, अदकि चटिठी हाक्कु आऊन कपळागोळ वाटा माळदुर, 36 अदकि अल कुर्तकु आऊक

कायली कुरतुर. 37 अदकि आऊन दोषपत्र आऊन ताल्ला अनन्द म्याकुच हचदुर, कि “इव यहूदीगोळ्द राजा यीशु हुन.” 38 आग आऊन सांगुळ येढ्ढ डाकूगोळ ऊंद ऊम्मा कय दी अदकि ऊंद डाक्या कय दी, क्रूस मा येर्सकु आदुर.

39 होगा-बरावाळेरे ताल्ला आलगाळ्स्-आलगाळ्स्कु आऊन अपमान माळतोगोर, 40 ✨अदकि ईद अनतोगोर, “हे मंदिर इक केळावाळा अदकि मुर दनि दा माळावाळा, तान तान इक रा ऊळ्स्! अगर नी परमेश्वर उन पार हुय, रा क्रूस मा टु ईळ्दकु बर.”

41 ईदा रीतदिल प्रधान याजक भी नियम इन गुरुगोळ्द अदकि पुरनयागोळ्द सांगुळ मज्याक माळ माळकु अनतोगोर, 42 “ईव रा च्याच मुंदुर इक ऊळ्स्यान, अदकि तान तान इक ऊळ्स् सकालुन. इव रा ‘इस्त्राएल इन राजा’ हुन. ईग क्रूस मा टु ईळ्दकु बंदान रा नाव आऊन मा वशिवास माळेव. 43 आव परमेश्वर मा भरोसा ईटदुन; अगर आव ईऊक चाहासतान, रा ईग इऊक बळ्स् कोमुल, यतकी ईव अंददिन, ‘ना परमेश्वर उन पार हुईन.’”

44 ईदा प्रकार डाकू भी जो आऊन सांगुळ क्रूस मा येर्सकु आगीदुर, आऊन अपमान माळतोगोर.

यीशु उन जीव त्यागसोद

(मरकुस १५:३३-४१; लूका २३:४४-४९; यूहन्ना १९:२८-३०)

45 हन्नेळ मुरा टु रा मुर मुरास ताका आ सप्पा प्रदेश दा अंधार आगकु ईत्त. 46 मुर मुरा अनन्द हात्तीपास यीशु धोळ्द आवाज दा चळ्िलासकु अंदुन, “एली, एली, लमा शबक्तनी?” मतलब “हे नान परमेश्वर, हे नान परमेश्वर, नी नानी येती बटिबुट?”

47 जो अल नीदुरकु ईरोर, आंदुर दा टु यास मुंदुर ईद केळ्दकु अंदुर, “आव रा एलयियाह अक कारूतान.” 48 आंदुर दा टु ऊंद

मंळसा तुरन्त हरदुन, अदकि स्पंज हुळकु सरिका दा डोब्सदुन, अदकि सरकण्डा मा ईटकु आऊक नेक्सदुन.

49 अदकि च्याच मुंदुर अंदुर, “ईल्या ईरी, नोळाता एलयियाह आऊक ऊळसली बरतान का ईला.”

50 आग यीशु मात्त धोळ्द आवाज देल चळिलासकु जीव बटि बुटुन.

51 अदकि नोळी, मंदिर इन परदा म्याकुच टु ल्यालमा ताका हरदकु येढ्ढ तुकळा आगेत: अदकि धरती डोलसेत अदकि चट्टानगोळ तळकुसेदव, 52 अदकि कब्रगोळ तेरदोदव, अदकि जो कब्रगोळ दा मगिकु ईरोर आ पवत्रि लॉकुरद हापाळ सा लाश जत्तिता आदव, 53 अदकि आऊन जत्तिता आगदुर बाद्दा आंदुर कब्रगोळ दा टु होटकु पवत्रि नगर दा होदुर अदकि हापाळ मुंदुर इक काळसदुर.

54 आग सूबेदार अदकि जो लॉकुर आऊन सांगुळ यीशु उक कायोर, याग आंदुर भूकम्प अदकि जो येनारा आगीत अदरी नोळकु हापाळ अंजेदुर अदकि अंदुर, “खराखुरा ईव परमेश्वर उन पार ईरोन!”

55 ✨अल हापाळ सा आर्तेर जो गलील टु यीशु उन स्यावा माळतेला आऊन सांगुळ बंदीदुर, दुर टु ईद नोळोर. 56 आंदुरदा मरयिम मगदलीनी, अदकि याकूब अदकि योसेस उन मोय मरयिम, अदकि जब्दी इन चकिोरगोळ्द मोय ईरोर.

यीशु उक नळसोद

(मरकुस १५:४२-४७; लूका २३:५०-५६; यूहन्ना १९:३८-४२)

57 याग द्याव आत रा यूसुफ हेसुर ईनव अरमितिया अन्द ऊंद धनी मंळसा, जो खुद अच यीशु उन चेला ईरोन, बंदुन. 58 आव पल्लितुस उन हात्ती होगकु यीशु उन लाश बेळदुन. इदुर मा पल्लितुस कोळोद आग्या कोट्टुन. 59 आग यूसुफ लाश

इक वोतकु बळ्ळीद मलमल इन चद्दर दा गुळ्ळसदुन, ⁶⁰ अदकि यीशु उक तान व्हाशोद कब्र दा ईटदुन, जो आव चट्टान दा अगळुसीदुन, अदकि कब्र अन्द दरवाजा मा धोळ्द कल्ल ढकलुसकु होटोदुन.

⁶¹ मरयिम मगदलीनी अदकि दुसरा मरयिम अल कब्र अन्द मुंद कुर्तकु ईरोर.

कब्र मा पहरा कोळोद

⁶² दुसरा दशिी जो तयारी इन दनि इन बाद इन दनि ईरोद, प्रधान याजकगोळ अदकि फरीसीगोळ पलातुस उन हात्ती जमा आगकु अंदुर, ⁶³ ✨“हे स्वामी, नामी याद आद कि आ भरमुसावाळा याग आव जत्तिता ईरोन, अंददिन, ‘ना मुर दनि इन बाद्दा जत्तिता आगाईन.’ ⁶⁴ इदुरसाटी आग्या कोळ कि तीसरा दनि ताका कब्र अन्द रखवाली माळकु आगुल, हगि आगबाळुल कि आऊन चेलागोळ बंदकु आऊक काळताना माळकु वोयुल अदकि लॉकुर से अनली हतुल, ‘आव सोत्तुर दा टु जत्तिता आग्यान.’ आग हदिळोद ध्वाका पयला टु भी बुरा आदीत.”

⁶⁵ पलातुस आंदुर से अंदुन, “नीम हात्ती पहरेदार रा आन. होगी, तान समझ इन अनुसार रखवाली माळी.”

⁶⁶ इदुरसाटी आंदुर पहरेदारगोळी सांगुळ ओतुर, अदकि कल्ल मा मोहर हचकु कब्र अन्द रखवाली माळदुर.

28

यीशु उन पुनरूत्थान

(मरकुस १६:१-१०; लूका २४:१-१२; यूहन्ना २०:१-१०)

1 आराम इन दनि इन बाद्दा हप्ता अन्द पयला दनि व्हातुर आगतेला अच मरयिम मगदलीनी अदकि दुसरा मरयिम कब्र

✨ 27:63 २७:६३ मत्ती १६:२१; १७:२३; २०:११; मरकुस ८:३१; ९:३१; १०:३३,३४; लूका ९:२२; १८:३१-३३

अक नोळली बंदुर. ² अदकि नोळी, ऊंद हापाळ अच भारी भूकम्प आत, यतकी परमेश्वर उन ऊंद स्वर्गदूत स्वर्ग टु ईळुकु बंदुन अदकि आव कल्ल इक अलग ढकलुस्कु अदुर मा कुरतुन. ³ आऊन रूप बजिली इन घाई अदकि आऊन कपळा बरफ इन घाई बळिवे ईरव. ⁴ आऊन अंजक देल पहरेदार नळगली कुरतुर, अदकि सोत्तुर घाई आगेदुर.

⁵ स्वर्गदूत आ येढ्ढ आर्तेर से अंदुर, “अंजबाळी ना जानसतीन की नीव यीशु उक जो क्रूस मा येर्सकु आगीदुन आऊक ढुंदसेतीर. ⁶ आव ईल हैलेच, तान वचन इन अनुसार जतिता आग्यान. बरी, आ जागा अक नोळी यल प्रभु बंदिकु ईरोन. ⁷ आऊन चेलागोळी इक तुरन्त होगकु हेळी की आव सोत्तुर दा टु जतिता आग्यान, अदकि नोळी, आव नीम से पयला गलील इक होदान. अल नीमी आऊन अव दर्शन सकिकेव अदकि नीव आऊक नोळ सकीर. नोळी, ना नीमी हैळ बुटीन.”

⁸ इदुर मा आंदुर अंजक अदकि बळा खुशी इन सांगुळ तुरन्त कर् टु वापस आगकु अदकि चेलागोळी इक ईद समाचार कोळोर साटी वोळली कुरतुर.

⁹ आग यीशु आंदरी सकिदुन. अदकि अंदुन, “सलाम.” आंदुर हात्ती बंदकु अदकि आऊन नव काल हुळकु प्रणाम माळदुर. ¹⁰ आग यीशु आ आर्तेरी अंदुन, “अंजबाळी; नांद वार्दुरी होगकु अनी कागलील इक होगी, अल नानी नोळ्यार.”

पहरेदारगोळ्द सुचना कोळोद

¹¹ आंदुर होगतेला अच ईरोर की पहरेदारगोळ दा टु थ्वाळासा पहरेदारगोळ बंदकु पुरा हाल प्रधान याजकगोळ से अनकु केळसदुर. ¹² आग आंदुर पुर्वजगोळ सांगुळ जमा आगकु सम्मतमाळदुर अदकि सपिहीगोळी हापाळ चाँदी नव सकिकागोळ कोटकु अंदुर, ¹³ “ईद अनेतीर की ईळ्लक इक याग नाव मगिकु ईरेव, रा आऊन चेलागोळ बंदकु आऊक काळताना

माळकु ओतुर. 14 अदकि अगर ईद मात न्यायाधीश उन कवि ताका पहुचुसीत, रा नाव आऊक समझुस बुटेव अदकि नीमी जोखमि टु वाचुस कोडेव.”

15 इदुरसाटी आंदुर पैस्या ताकोमकु ह्यांग आंदरी कल्सकु आगीत. हांग अच माळदुर. ईद मात यहूदीगोळ दा दुर दुर ताका फ़ैलुसेत अदकि ईगासताका प्रचलति आद.

यीशु उन कांळसोद अदकि आखरी आग्या

(मरकुस १६:१४-१८; लूका २४:३६-४९; यूहन्ना २०:१९-२३; प्रेरतिगोळ १:६-८)

16 *हन्नेळ चेलागोळ गलील इन आ पहाळ मा होदुर, यारी यारी यीशु हेळीदुन. 17 आंदरी यीशु नव दर्शन सकिदव अदकि आऊक प्रणाम माळदुर, पर यारीकारा यारीकारा शंका आत. 18 यीशु आंदुर हात्ती बंदकु अंदुन, “स्वर्ग अदकि पृथ्वी इन पुरा अधिकार नानी कोटकु आग्याद. 19 *इदुरसाटी नीव होगी, सप्पा जातीगोळ लांकुरी चेला माळी; अदकि आंदरी आप्प, पार अदकि पवतिर आत्मा अनंद हेसुर देल बपतसिमा कोळी, 20 अदकि जो आग्यागोळ ना नीमी कोट्टीन अदुर्द पालन ह्यांग माळतार अद कल्सी. अदकि नोळी, ना युग इन अन्त ताका सदा नीम सांगुळ आईन.”

☆ 28:16 २८:१६ मत्ती २६:३२; मरकुस १४:२८

☆ 28:19 २८:१९ प्रेरतिगोळ

परमेश्वर उन खरा वचन

**The Holy Bible in the Holiya language of India: परमेश्वर
उन खरा वचन**

copyright © 2020 The Word for the World International

Language: Gohllaru (Holiya)

Contributor: The Word for the World International

परमेश्वर उन खरा वचन
व्हाशोद नयिम, 2020

The New Testament in Holiya Language

The Word for the World International

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

3943f9d0-5b35-54ad-8e8f-1b7bf74924c6